



左傳補注

欽定四庫全書提要

左傳補注六卷

國朝惠棟撰棟有周易述已著錄是書皆援引舊訓以補杜預左傳集解之遺本所作九經古義之一以先出別行故九經古義刊本虛列其目而無書目作四卷此本實六卷則後又有所增益也其中最典確者如隱五年則公不射引周禮射人祭祀則贊射牲司弓矢供射牲之弓矢及國語倚相之言證旁引射蛟之誤案此朱子注也蓋因補杜而預及之莊公十四年繩息嬀引呂覽周公作詩以繩文王之德及表記鄭注譽繩也證杜訓譽之由二十八年臧孫辰告糴于齊禮也引周書糴匡解年儉穀不

足君親巡方卿告糴證爲古禮僖五年虞不臘矣引太平御覽舊注及風俗通月令章句證臘不始秦十年七與大夫引王肅詩傳證七當作五二十二年大司馬固諫曰引晉語公子過宋與司馬公孫固相善證固爲人名二十七年夏書曰引墨子明鬼篇證尚書但有夏書商書周書本無虞書文十八年在九刑不忘引周書嘗麥解證爲刑書九篇宣二年以視十朝引毛詩鹿鳴箋儀禮士昏禮注證視爲正字郭忠恕作示爲誤三年不逢不若引郭璞爾雅注作禁禦不若證以杜注逢字在下文知今本譌寫六年以盈其貫引韓非子以我滿貫證貫字成十六年徹七札焉引呂覽愛士篇證鄭康成



一甲七札之說襄二十三年娶于鑄引樂記鄭注證鑄  
卽祝國又踞轉而鼓琴引許慎淮南子注證轉卽軫二  
十五年慎始而敬終終以不困引周書常訓解證不出  
古文蔡仲之命二十七年崔杼生成及彊而寡引墨子  
辭過篇證無妻曰寡昭元年具五獻之籩豆于幕下引  
禮記正義證杜注五獻之誤十五年一歲而有三年之  
喪二引墨子公孟非儒二篇證妻喪三年爲春秋末造  
之禮二十六年鑿而乘於他車引說文證鑿誤作鑿哀  
二十五年轍而登席引少儀證燕必解轍皆根據昭然  
不同臆揣至文二年廢六關引公羊傳注證廢訓置則  
是又引韋昭國語注證置訓廢則非蓋置有二義一爲

建置之置公羊注所言是也一爲棄置之置國語注所言是也此猶亂可訓治而辭離瘼矣不可訓治臭可訓香而逐臭之夫不可訓香古之設關在譏而不在征臧文仲廢六關以博寬大之譽而使姦宄莫詰陰以厲民故誅其心而謂之不仁棟但執反覆旁通之義殊爲偏駁又文十三年其處者爲劉氏孔穎達疏明言漢儒加此一句則爲劉字無疑而必謂原作留字漢儒改爲卯金刀宣二年文馬百駟當以邱光庭兼明書所辨爲是而必引說文畫馬之訓襄十七年澤門之皙謂古皋澤字通又謂諸侯有皋門其說固是然邑中澤門各指所居皋門非所居之地也二十一年公姑姊旣謂注疏皆

非斷爲同宗之女然於姑可解於姊終無解也二十五年執簡以往引服虔說一簡八字證太史書崔杼事亦八字殊嫌牽合三十年亥有二首六身卽指爲孟子之亥唐尤爲附會昭七年余敢忘高圍亞圍引竹書紀年補杜預之闕不知汲郡古文預所目覩預既不引知原

書必無此文未可以後來僞本證其疏漏

案書中屢引竹書紀年蓋

未及詳考今本之僞

至於二十一年鄭翩願爲鸛引陸佃埤雅之

雜說

案鸛井出酉陽雜俎非始於佃

哀六年無疾而死引汲冢瑱語之

野談十二年效夷言謂春秋時已重吳音不始於晉更非注經之體矣他如公卽位之位必欲從古經作立屢豐年之屢必欲從說文作婁亦皆徒駭耳目不可施行

蓋其長在博其短亦在於嗜博其長在古其短亦在於  
泥古也

春秋左傳補註卷一

元和惠棟撰

守山閣藏書

棟曾王父僕菴先生幼

通經氏補註

至耄不

未備者作補註一卷傳

子相授情各四世矣

補註春秋正義

左氏先著竹帛名爲古學故所載古文爲多晉宋以來鄭賈

之學漸微而服杜盛行及孔穎達奉勅爲春秋正義又專爲

杜氏一家之學值五代之亂服氏遂亡嘗見鄭康成之周禮

韋宏嗣之國語純宋先儒之說末乃下以己意令讀者可以

考得失而審異同自杜元凱爲春秋集解雖根本前修而不

著其說又其持論間與諸儒相違于是樂遜序義劉炫規過

之書出焉棟少習是書長聞庭訓每謂杜氏解經頗多違誤

因刺取經傳附以先世遺聞廣爲補註六卷用以博異說祛俗議宗章鄭之遺前修不揜效樂劉之意有失必規其中于古今文之同異者尤悉焉傳之子孫俾知四世之業勿替引之云爾戊戌冬日東吳惠棟定宇序

隱元年經公及邾儀父盟于蔑 蔑本姑蔑定十二年傳費人北國人道之敗諸姑蔑是也隱公名息姑而當時史官爲之諱猶定公名宋哀廿四年傳宗人鬬夏曰孝惠取于商不云宋也古人舍故諱新故哀爲定諱定不爲隱諱汲郡古文云魯隱公及邾莊公盟于姑蔑魏史不爲魯諱則此經爲隱諱明矣

傳都城過百雉國之害也 管子曰國小而都大者弑

先王之制大都不過參國之一中五之一小九之一 周書  
作雒云大縣城方王城三之一小縣立城方王城九之一  
不舉中者從可知此周公相成王作雒所定之制故云先  
王之制

公入而賦大隧之中 徐齊民北征記曰苑陵縣東南有大  
隧澗鄭莊公所闕

其樂也融融 融古文作彤張衡思元賦展洩洩而彤彤舊

注云洩洩彤彤皆和貌李善云左傳曰鄭莊公入而賦大  
隧之中其樂也彤彤融與彤古字通

案穀院碑陰亦以彤爲融

注不皆與今說詩者同 余仁仲左傳字辨曰不皆與今說  
詩者同不皆但臺岳氏本作皆不誤也

贈死不及尸弔生不及哀注諸侯已上既葬則衰麻除無哭  
位諒闇終喪樸庵子惠子曰荀卿云貨財曰賻輿馬曰  
賵衣服曰襚玩好曰贈玉貝曰含賻賵所以佐生也贈襚  
所以送死也送死不及柩尸弔生不及悲哀非禮也贈弔  
及事禮之大也荀卿所稱乃時王之禮故左氏依以爲說  
杜元凱遂借以文其短喪之說誕之甚妄之甚

衛侯來會葬注諸侯會葬非禮也 諸侯五月同盟至先王  
之禮也杜以卅年傳文爲據明同盟惟大夫有是禮乎棟  
聞諸家君云

二年傳修惠公之好 兩國有前好而會盟者謂之修好亦  
謂之尋高誘戰國策注曰溫故曰修溫亦訓尋禮記中庸



溫故而知新鄭注云溫讀如尋溫之溫

亦作

哀十二年傳

云若可尋也亦可寒也賈逵曰尋溫也是尋與修其義一爾

三年經春王二月己巳日有食之

隋志曰推合己巳朔

傳且夫賤妨貴少陵長遠閒親新聞舊小加大淫破義所謂

六逆也君義臣行父慈子孝兄愛弟敬所謂六順也子

惠子曰此所據古亦云然而柳子厚有駁六逆之說蓋唐

以來始有不信古者棟案管子五輔篇曰聖王飭八禮以

道民八者各得其義則爲人君者中正而無私爲人臣者

忠信而不黨爲人父者慈惠以教爲人子者孝弟以肅爲

人兄者寬裕以誨爲人弟者比順以敬爲人夫者敦懷

與

同以固爲人妻者勸勉以貞夫然則下不倍上臣不殺

試音

君賤不踰貴少不陵長遠不閒親新不閒舊小不加大淫  
不破義凡此八者禮之經也周語富辰亦云夫禮新不閒  
舊則八禮之說古矣石碯止舉六者禮諫有五風諫爲上  
碯爲君陳古義倍弑之事非所宜言又公方瞽嬖人夫婦  
之際所宜深諱是純臣之義也

四年傳敝邑以賦 服虔曰賦兵也以田賦出兵故謂之賦  
正謂以兵從也朱子注論語用其說

五年傳則公不射 此指祭祀射牲夏官射人云祭祀則贊  
射牲司弓矢共射牲之弓矢外傳左史倚相曰天子禘郊  
之事必自射其牲諸侯宗廟之事必自射其牛刲羊擊豕  
是也朱子據傳曰則君不射是以弓矢射魚如漢親射蛟

江中之類恐未然

鄭人侵衛牧

詩靜女云自牧歸荑王質以爲卽春秋之牧

邑

邲人侵衛注東平剛父縣西南有邲鄉

羅苹曰郡有剛縣

晉爲東平國之剛平無剛父棟案京相璠春秋土地名曰東郡廩丘縣南三十里有故邲都

使曼伯與子元潛軍軍其後

案荀子議兵篇曰王者不屠

城不潛軍不留衆潛軍之法公羊所謂詐戰非偏戰也

六年經鄭人來渝平注渝變也

案渝讀爲輸二傳作輸廣

雅曰輸更也與釋秦詛楚文變輸盟刺謂變更盟刺耳渝更也平成也故經書渝平傳曰更成也杜注自

明而獨訓渝爲變必俗儒傳寫之譌服虔曰公爲鄭所獲  
釋而不結平於是更爲約束以結之故曰渝平是服亦訓  
渝爲更

桓元年渝盟乃訓爲變古文渝輪  
通此經輪作渝乃古文之僅存者

納諸鄂注鄂晉別邑 案世本居篇云唐叔虞居鄂宋衷曰

鄂地今在大夏

釋例云晉大鹵大原大夏參虛晉陽五  
名然則大夏卽晉地故杜以爲晉別邑

七年傳歆如忘

說文引云歆而忘服虔曰如而也臨歆而

忘其盟載之辭古如而皆通用莊七年經夜中星隕如雨  
昭六年傳火如象之皆讀爲而

八年傳因生以賜姓 王充曰因其所生賜之姓也若夏吞

薏以而生則姓苾氏商吞燕子而生則姓子氏周履大人

跡則姓姬氏

十年傳以王命討不庭 爾雅釋詁庭直也謂諸侯之不直者

十一年傳爭長 服虔曰爭長先登受玉

工則度之 爾雅釋器木謂之度亦作劇廣雅云劇分也

桓元年經公卽位 鄭衆曰古文春秋經公卽位爲公卽立

云古位立同字也棟案古鼎銘位皆作立

見朱氏彝尊吉金貞石志

傳目逆而送之 服虔曰目者極視精不轉也

二年經孔父注孔父稱名者內不能治其閨門外取怨于民身死而禍及其君 棟案孔父孔子之先也傳云孔父嘉

爲司馬是嘉名孔父字古人稱名字皆先字而後名祭仲足是也鄭有子孔名嘉說文曰孔从乙从子乙請子之爲

也乙至而得子嘉美之也古人名嘉字子孔說文此訓蓋指宋鄭兩大夫故先儒皆謂善孔父而書字杜輒爲異說不可從也

傳立華氏也立立證周法也立華氏爲證乃佐成孔父之罪下文所云是也言桓公受賕枉法

肇厲游纓游李善引作旂顏籀同以爲當从偃聲案說文無旂字有游字云旂旗之旒从旂汙聲汙與汙同上形下聲不當音偃顏說非也蔡邕石經論語子游之游亦作旂旂當从旂汙省聲游與旂旗字皆在旂部从本音偃故子游名偃

惠之二十四年唐石經廿四年下惠之三十年唐石經卅年

棟案石經凡經傳中二十字皆作廿三十字皆作卅此古文春秋左氏傳本文也說文廿二十并卅三十并也古文省說文所以謂古文乃孔壁中文也蔡邕石經論語云卅而立又云年卅而見惡焉又云凡廿六章考工輪人云輪人爲蓋部長二尺桯長倍之四尺者二十分寸之一謂之枚鄭注云故書十與上二合爲二十字鐘鼎文如秦權微欒鼎二十字作廿石鼓文周陽侯鐘三十字作卅此又金石文之可爲左證者今九經二十三十字皆當從石經改正

四年經渠伯糾注渠氏案渠周邑昭廿六年傳劉子以王出次于渠注云周地然則伯糾蓋氏于邑者

五年經城祝邱 司馬彪郡國志曰琅邪卽邱春秋時曰祝

邱闕駟十三州記曰卽祝魯之音蓋字承讀變

蔡人衛人陳人從王伐鄭 服虔曰言人者時陳亂無君則

三國皆大夫也故稱人

傳蔡衛不枝 戰國策曰魏不能支高誘云支猶拒也支與

枝同項羽傳莫敢枝梧如淳曰猶枝扞也

旛動而鼓 賈逵曰旛發石一曰飛石范蠡兵法曰飛石重

十二斤爲機發行二百步說文旛建大木置石其上發以

機以追敵也从扌會聲詩云其旛如林三國志太祖爲發

石車擊袁紹注引魏氏春秋曰以古有矢石又傳言旛動

而鼓說曰旛發石也于是造發石車所云說者卽賈侍中



說也杜以旂爲旃蓋本馬融

追古文

注鄭志在苟免王討之非也

劉氏權衡曰此言不可以訓

於世柰之何以其解經且是使亂臣賊子喜也何謂懼乎  
六年經子同生 子惠子曰穀梁子曰疑故志之案桓三年  
夫人姜氏至自齊十八年公與夫人姜氏遂如齊始與齊  
侯亂中間文姜未有如齊之事而于六年始書子同生明  
同爲桓公子此聖人筆削之微意莊四年冬公及齊人狩  
于禚齊有猗嗟之詩爲莊公狩而作也其詩云展我甥兮  
亦嫌文姜之亂而證其爲齊之甥夫子刪詩存之與書子  
同生一例公羊傳曰同非吾子齊侯之子也名敎大閑聖  
人于此安得而不慎乎知此則知聖人刪定六經之意矣

三傳惟穀梁得聖人之旨其真子夏之門人歟

此論始于朱子近日

汪鉅翁朱竹垞亦有論說與此畧同

傳遠章 王符曰盆冒生薦章者王子無鈞也令尹孫叔敖

者薦章之孫也遠與薦同

奉牲以告 周禮充人曰碩牲則贊是也

族蠡 說文曰瘞小腫也一曰族絜張有復古編云族从舛

矢昨木切絜从舛糸力軌切別作族蠡非釋文云族本又

作族蠡說文作瘞

嘉栗旨酒 劉光伯以栗爲穗貌詩云實穎實栗

接以太牢 服虔曰接者子初生接見于父與杜異

與吾同物 物謂六物歲時日月星辰是也與桓公同日故

云同物

古稱六物  
唐稱祿命

八年傳無與王遇

遇敵也戰國策曰盼子復整其士卒與

王遇高誘云遇敵也敵猶當也故少師以爲不當王

十年傳齊人餼諸侯

餼說文引作氣云饋客芻米也

十有一年經宋人執鄭祭仲注祭氏仲名不稱行人聽迫脅

以逐君罪之也

劉光伯以祭仲是字鄭人嘉之又云祭

仲本非行人棟案五年傳云祭仲足爲左拒此年傳云祭

封人仲足世本載姓氏皆先字後名此與孔父嘉一例則

仲字足名確然無疑杜于五年傳注云祭足卽祭仲之字

是專欲違舊法以就其曲說劉氏規之是也

左氏無貶仲  
之文仲爲宋

所迫脅雖死無益于忽故公羊以爲  
行權釋例斥其挾僞以篡其君過矣

傳君多內寵 服虔曰言庶子有寵者多

雍氏宗有寵於宋 服虔曰爲宋正卿故曰有寵

十二年傳坐其北門注坐猶守也 案兵法有立陳坐陳見  
尉繚子立陳所以行也坐陳所以止也傳曰裹糧坐甲又  
云王使甲坐于道又云士皆坐列司馬法曰徒以坐固荀  
子曰庶士介而坐道及此傳坐其北門皆坐陳也杜訓坐  
爲守蓋未通于古義







十三年傳舉趾高 趾漢書引作止高誘曰止足也鄭注士  
昏禮曰古文止作趾

賴人注賴人仕於楚者 案賴卽厲也楚與國詳見後

盧戎 習鑿齒曰中盧縣古盧戎也釋文作廬

莫敖縊于荒谷羣帥囚于冶父 盛宏之荊州記曰荒谷今  
竹林是也又云江陵縣東三里餘有三湖湖東有水名長  
谷又西北有小城名曰冶父酈元曰湖水東通荒谷荒谷  
東岸有冶父城

十六年傳使盜待諸莘 服虔曰莘衛東地京相璠曰今平  
陽陽平縣北一十里有故莘亭道阨限蹊要自衛適齊之  
道也

十七年傳疆場之事慎守其一 古文作易周禮有地  
易地曰君碑曰慎守易蓋用此文隸釋諱慎改爲謹說文曰  
界也以三其界畫也或以土

復惡已甚矣 案韓非子亦載此事復惡作報惡鄭注大司

寇云復猶報也杜訓爲重失之

十八年傳齊侯通焉服虔曰旁淫曰通

莊元年傳不稱姜氏絕不爲親服虔曰夫人有與殺桓之罪絕不爲親得尊父之義善莊公思大義絕有罪故曰禮也此說與杜異案莊廿二年肆大眚然後書葬我小君文姜則服氏之說爲有據矣說苑曰絕文姜之屬而不爲不愛其母正與此同屬謂不稱姜氏也

八年傳戍葵邱京相璠曰齊西五十里有葵邱若是無庸戍之僖公九年齊桓會諸侯于葵邱宰孔曰齊侯不務德而勤遠畧葵邱不在齊也胡公廣言汾陰有葵邱或山陽西北葵城宜在此

瓜時而往曰及瓜而代 服虔曰瓜時七月及瓜謂後年瓜時

請代弗許 尉繚子曰兵戍邊一歲遂亡不候代者法比亡軍故二人謀作亂也

九年高傒 宰相世系表曰齊太公六世孫文公赤生公子高孫傒爲上卿與管仲合諸侯有功桓公命傒以王父字爲氏食邑於盧諡曰敬仲世爲上卿敬仲生莊子虎虎生傾子傾子生宣子固固生厚厚生子麗子麗生止奔燕十年經公敗宋師于葵邱注魯地案應劭地理風俗記曰濟陰葵氏縣故宋葵邱邑也張華博物志亦云古葵邱杜以齊宋次于郎故指爲泰山之葵邱縣但轉戰所及葵勝

逐北豈必盡屬魯地杜氏望文爲義非遂實有所據如十一年傳宋侵我公敗之鄆說文以爲宋魯閒地杜則直云魯地矣

十一年傳禹湯罪己 子惠子曰禹哭罪人湯禱桑林皆罪己之事

臧孫達 世本孝公生僖伯彊彊生哀伯達達生伯氏瓶瓶生文仲辰此傳先載文仲之言不應後錄哀伯之語達當爲辰字之誤也桓二年傳先稱臧哀伯後云臧孫達與此一例

陸渚纂例以臧孫辰爲哀伯子蓋未考世本

十二年經宋萬弑其君捷 賈逵曰公羊穀梁曰接案捷與接古字通易晉卦曰晝日三接鄭注云接勝也禮內則接



以太牢注云接讀爲捷捷勝也音義皆同

傳批而殺之 玉篇引作攙云手擊也與杜注同張有曰攙

反手擊也从手毘別作批非匹齊切

玉篇別有批字云擊也不云見左傳

遇太宰督于東宮之西又殺之注殺督不書宋不以告 家君曰督乃弑君之賊豈可與仇牧同書杜氏之謬也

十四年傳大陵 京相璠曰潁川臨潁縣東北二十五里有故巨陵亭古大陵也

其氣餒以取之 余仁仲左傳字辨曰其氣餒以取之陸德明音義本云炎以音艷案王符潛夫論漢書五行志皆云其氣炎以取之釋文傳作炎注仍作餒尋洛誥餒餒字亦當作炎炎故杜氏引以爲證揚雄解嘲炎炎者滅尙書多

俗字鄭學已亡無可是正

梅福引書云無若火始庸庸此今文尚書

繩息媯

呂覽四月紀曰周公旦作詩以繩文王之德孔鮒

云繩之譽之也杜注本此表記曰君子不以口譽人鄭注譽繩也釋文說文作誨今說文闕廣雅云誨譽也音繩

十有八年經春王三月日有食之隋志曰推合壬子朔

有蜮

服杜皆以爲短狐王伯厚曰沙隨春秋例目云有蜮

或考隸古春秋作蜮蜮音特棟案蜮亦作蠚說文云吏冥冥犯法卽生螟蠚卽詩之螟螣也唐公昉碑又作蠚蜮與蜮字相似呂覽任地曰大草不生又無螟蜮高誘曰蜮或作螣食心曰螟食葉曰螣兗州人謂蜮爲螣音相近也螟蜮皆害苗者故書于春秋若是短狐不須記也

傳閭敖游涌而逸

盛宏之荊州記曰江津東十餘里有中

夏州州之首江之汜故屈原云經夏首而西浮夏首東二十餘里有涌口所謂閭敖遊涌而逸二水之間謂之夏州首尾七百里

十九年傳鬻拳

鄭箴膏肓曰鬻拳楚同姓

廿一年傳鄭伯享主于闕西辟

服虔曰西辟西偏也毀敦

銘云繼治我西偏東偏

廿二年傳弛於負擔

案漢碑負擔字皆作僮說文曰僮何

也从人詹聲然則負僮猶負何也

五世其昌竝于正卿

服虔曰言完後五世與卿竝列

遇觀之否

案之字義訓變漢高祖諱邦荀悅曰之字國惠

帝諱盈之字滿亦此類王充曰卜曰逢筮曰遇尙書金縢  
曰乃逢是古今尙書作并

庭實旅百奉之以玉帛 韋昭曰庭實庭中之實百舉成數  
也棟謂庭實車馬之屬玉帛束帛加璧呂覽曰荀息以屈  
產之棗爲庭實而加垂棘之璧是也

廿三年傳會以訓上下之則制財用之節朝以正班爵之義  
帥長幼之序又云諸侯有王王有巡守以大習之注大習  
會朝之禮 案管子幼官篇曰千里之外二千里之內諸  
侯三年而朝習命二千里之外三千里之內諸侯五年而  
會至習命所謂大習者蓋習會朝之教命也

廿四年傳女贄不過榛栗棗脩正義曰先儒以爲栗取其戰

栗也棗取其早起也脩取其自脩也說本范甯唯榛無說  
棟案榛說文引作𣎵从木辛聲云果實如小栗呂諲字  
林榛木之字亦从辛木云實如小栗曲禮釋文曰榛古本  
又作𣎵然則𣎵與栗同義故先儒不釋𣎵音壯巾反正義  
以爲榛聲近虔失之外傳魯語云夫婦𣎵不過棗栗以告  
虔也不及榛脩明𣎵不訓虔

字林曰榛木叢生也非果實

廿八年經冬築郿 京相璠曰公羊傳謂之微在東平壽張  
縣西北三十里有故微鄉魯邑也棟案公羊釋文云築微  
左氏作麋麋古文眉眉與微古今字特牲饋食禮眉壽萬  
年鄭注云古文眉爲微

蒲與二屈君之疆也 韋昭曰疆竟也二屈屈有南北河東

有北屈則是時復有南屈酈元案汲郡古文曰魏襄王十一年翟章救鄭次于南屈

鄭人將奔桐邱注許昌縣東北有桐邱城京相璠曰今國無而城見存西南去許昌城可三十五里俗名之曰隄其城南卽長堤因洧水之北防也西面桐邱其城邪長而不方蓋憑邱之稱卽城之名矣

謀告曰注謀閒也案周禮環人云搏謀賊注云謀賊反閒爲國賊郭璞曰謀今之細作也

臧孫辰告糴于齊禮也子惠子曰周書糴匡篇年儉穀不足君親巡方卿參告糴故外傳臧文仲曰國有饑饉卿出告糴古之制也辰也備卿辰請如齊凡稱禮皆周制也

廿九年傳水昏正而栽 蔡邕月令章句引傳曰水昏正而栽築卽營室也昏正者昏中也栽築者栽木而始築也

卅二年傳臨黨氏 釋文云黨音掌郭忠恕曰黨氏之黨音之仰反與鄉黨字別襄廿九年傳黨叔定七年公族黨氏哀十一年黨氏之溝同音掌

圉人犂 家君曰圉猶扈也公羊作扈文異義同

能投蓋于稷門 服虔曰能投千鈞之重過門之上杜氏曰蓋覆也走而自投接其屋之桷反覆門上劉炫規過曰公言犂有力焉如杜此說勁捷耳非有力也當謂投車蓋過於稷門棟謂杜說鑿劉說淺服說近之

成季奔陳 服虔曰季友內知慶父之情力不能誅故避難

出奔

閔元年傳親有禮因重固 說文引云種有禮因重固因就也  
也从口大能大者衆圍就之服虔曰重不可動因其不可動而堅固之杜氏从許君說

趙夙注趙衰兄 案世本公明生孟及趙夙夙生成季衰史記以衰爲夙之孫晉語以爲夙之弟無緣繆戾至此且夙與衰世次相縣不應爲弟兄必傳寫之譌史記所見異辭當以世本爲正

焦氏易林云伯夙奏獻衰續厥緒則非兄弟明矣

畢萬注畢萬魏犢祖父 世本曰萬生芒季季生武仲州

禮記

正義引世本云萬生芒芒生季恐非

州生莊子降降生獻子茶茶生簡子取

取生襄子多多生桓子駒駒生文侯斯

禮記正義

州卽犢也降



卽絳也荼卽舒也多卽曼多也宰相世系曰讎生悼子悼  
子生昭子絳史記索隱曰系本云武仲生莊子絳無悼子  
又系本居篇曰魏悼子徙霍則是有悼子系本卿大夫代  
自脫耳昭子徐廣曰世本曰莊子索隱曰系本錯也居篇  
又曰昭子徙安邑與此文同愚案左傳亦作莊子

先爲之極 服虔曰言其祿位極盡於此

爲吳大伯 子惠子曰穆天子傳云大王亶父之始作西土  
封其元子吳大伯于東吳詔以金刃之刑賄用周室之璧  
上文分之都城而位以卿是以大伯之地處之但曲沃在  
近地故欲使逃之以順父志也

以是始賞天啓之矣 服虔曰以魏賞畢萬是爲天開其福

辛廖注晉大夫 劉炫曰若在晉國而筮何得云筮仕於晉  
又辛甲辛有竝是周人何故辛廖獨爲晉大夫服氏以爲  
畢萬在周筮仕於晉是也

二年經齊人遷陽 正義曰杜世族譜土地名闕不知所在  
棟案地理志東海都陽縣注應劭曰春秋齊人遷陽是  
又城陽國陽都縣注應劭曰齊人遷陽故陽國是一國兩  
屬未詳孰是

傳號公敗犬戎于渭汭 服虔本作渭隊注云隊謂汭也  
鶴有棗軒者 服虔曰車有藩曰軒

遂滅衛 詩載馳序云衛懿公爲狄人所滅鄭箋云滅者懿  
公死也君死於位曰滅閭百詩曰下文狄入衛方是入其

國都孔疏傳言滅而經書入引釋例爲從齊桓告諸侯之  
文殊不然

衛侯不去其旗 胡渭生曰去藏也古人以藏爲去棟案鄢  
陵之戰乃納旌于韜中胡說是

立戴公以廬于曹注廬舍也 案公劉詩曰于時廬旅毛傳  
云廬寄也小爾雅同管子中匡篇曰狄人攻衛衛人出旅  
於曹外傳作廬訓爲寄故詩序亦言東從渡河野處漕邑  
詩序漕字从水旁曹傳作曹古文省

與門材 周禮掌舍爲壇壝宮棘門杜子春云棘門或爲材  
門正義云衛文公居楚邱國家新立齊桓共門材先令豎  
立門戶以材木爲門也

東山臯落氏 劉昭案上黨記曰東山在壺關城東南晉申

生所伐今名平臯服虔曰赤狄之都也

有守則從 服虔曰有代太子守則從君

從曰撫軍 服虔曰助君撫循軍士

君其舍之 服虔曰舍之置申生勿使將兵也

不對而退 服虔曰里克不對

公衣之偏衣 服虔曰偏衣偏袷之衣偏異色駁不純袷在

中左右各異故曰偏衣此說詳於杜袷卽督也莊子緣督

以爲經

羗涼 說文引作牝涼云牝牛也牛之雜色者不中爲犧  
牲衣之不純者不得爲太子若以羗爲涼義無所取古文

省少或借涼爲惊

補正引林氏說亦未當

金玦不復 應劭曰復反也金玦猶決去不反意也荀卿子

曰絕人以玦

昔辛伯諗周桓公注諗告也 案說文曰諗深諫也

外寵二政 棟案二讀爲王貳于虢之貳韓非子引此正作

貳

與其危身以速罪也 服虔曰速召也疾也言太子不去自

必危疾召罪孤突知其亂本旣成而太子拘於一節不達  
至孝之義與臯落雖戰勝而歸猶不能免於難而使父有  
悖惑殺子之罪故傳備衆賢之言以迹太子所以死也經  
在僖公五年晉侯殺其世子申生

大帛之冠 鄭康成引作白云大白冠大古之布冠也注蓋

用諸侯諒闇之服家君云此杜預自造之語俗語杜撰本

此棟案服虔曰戴公卒在於此年故杜彌縫其說耳

僖元年經次于聶北 說文引作岳北云讀與聶同

邢遷于夷儀注夷儀邢地 司馬彪郡國志曰東郡聊城有

夷儀聚薛瓚曰今襄國西有夷儀去襄國百餘里

傳諸侯救邢注實大夫也而曰諸侯總衆國之辭 家君曰

實大夫也何得稱爲諸侯此預之妄也

二年傳保於逆旅 案逆旅亦作御旅見荀子 御與迂通周官有掌訝先

鄭云訝讀爲跛者訝跛者之訝案公羊訝作御尚書迂字皆爲御 御迎也與逆通

四年經齊人執陳轅濤塗 釋文作袁 穀梁傳同 云本多作轅案

國三老袁良碑云周之興滿爲陳侯至元孫濤塗立姓曰  
袁法言曰齊桓公欲徑陳陳不果內執袁濤塗皆不从車  
旁今本及唐石經皆作轅王伯厚曰轅與袁同

傳唯是風馬牛不相及也

賈逵曰

春秋正義作服虔

風放也牝牡

相誘謂之風案呂覽曰乃合牝牛騰馬游牝於牧高誘曰  
牝牛父牛也騰馬父馬也皆將羣游從牝於牧之野風合  
之其說與賈侍中蓋同漢儒相傳有是語也

尙書云馬牛其風

爾貢包茅不入 子惠子曰韓非子外儲說曰是時楚之菁  
茅不貢於天子三年矣

無以縮酒

案說文引作茜酒云禮祭束茅加于裸圭而灌

鬯酒是爲茜象神歆之也

鄭少顗說同

一曰茜榼上塞也鄭大

夫讀茜爲縮詩伐木云有酒湑我毛傳曰湑茜之也是先

鄭以來皆作茜讀爲縮也

周伯琦六書正譌云茜从艸酉西卽酒字會意左傳無曰茜酒

俗用縮非汗簡云古文尚書縮作茜案卽爲古文酉是茜卽茜也說文酉部有茜字而艸部又有茜字以爲見葵此必茆字之誤周禮醢人有茆苴詩薄采其茆皆从卯徐邈音切是混茆茆而爲一非也

昭王南征而不復

唐石經云昭王南征沒而不復

案碑沒字後增

或據古本益之高誘呂覽注引此傳與石經同

死王事加二等於是

有以袞斂 賈逵曰死王事謂朝天子

以命用師袞斂上公九命服袞也

且其繇曰 服虔曰繇抽也抽出吉凶也

五年傳遂登觀臺 五經異義云古春秋左氏說曰天子靈

臺在大庑雍之靈沼謂之辟廱諸侯有觀臺皆以望嘉祥



也服虔曰人君入太廟視朔天子曰靈臺諸侯曰觀臺在明堂之中

凡分至啟閉必書雲物爲備故也 服虔曰分謂春秋分至謂冬夏至啟立春夏也陽氣用事爲啟閉立秋冬也陰氣用事爲閉雲五雲也物風氣日月星辰也分至啟閉天地之大節陰陽之分也故遂登觀臺望氣以審妖祥變亂之氣先見于八節審其雲物之形言其所致務爲之備也

虞不臘矣 朱子曰秦時始有臘祭而左氏謂虞不臘矣是秦時文字分明案御覽引舊注云臘祭名也日月會于龍尾百物備合因于是祭羣神也正義云月令孟冬臘門閭及先祖五祀臘之見於傳記者唯月令與此二文而已秦

本紀惠王十二年初臘始皇三十一年更改臘曰嘉平應劭風俗通曰案禮夏曰嘉平殷曰清祀周曰大蜡漢改曰臘此言虞不臘者明當時有臘祭周時臘與大蜡各爲一祭言漢改曰臘不蜡而爲臘耳又案蔡邕月令章句曰夏曰清祀殷曰嘉平周曰蜡秦曰臘棟案如應蔡之說則三代本有清祀嘉平蜡臘之祭歷代因革故秦惠十二年改蜡爲臘始皇三十一年更改臘曰嘉平是臘與嘉平皆三代祭名朱子以秦始有臘祭考之不審耳

丙之晨 子惠子曰師法用辰不用日丙日也子辰也言丙不言子者日在尾故舉日不舉辰辰爲客時爲主人故言丙之晨

均服振振 服虔曰均服黑服也古戎服尚黑戰國策左師

觸龍曰老臣賤息舒祺最少不肖而臣衰竊愛憐之願令

補黑衣之數以衛王宮注云黑衣戎服漢書作衽劉逵注吳都賦

引此傳亦作衽儀禮士冠禮云兄弟畢衽元鄭注曰衽同也古文

衽爲均司馬彪興服志云郊祀之服皆以衽元淮南子曰

尸祝衽衽高誘云衽純服衽黑齋衣也衽衽猶衽元衽字篆書

與衽相似上下皆元故謂之黑服謂均服爲黑服失之衽古文

皆作均杜氏謂戎事上下同服是也管子大匡篇云四年

修兵同甲十萬同甲者均服之謂也呂覽王孫滿謂秦師曰今初服同建左不

賦而右之高誘曰初同也兵服上下無別故曰初服初當作衽傳寫之誤

而修虞祀 子惠子曰終宮之奇之言

六年傳許男面縛 子惠子曰漢書項羽傳馬童面之張晏  
曰背之也師古曰面之謂背之不面向也面縛之亦謂反  
背而縛之杜元凱以爲但見其面非也

七年傳若總

石經作惣孫愔曰此俗字當作總

其罪人以臨之

戰國策曰

楚請道以臨韓魏高誘曰臨猶伐也

定二年傳以師臨我同

會而列姦注列姦用子華

當云用子華爲內臣昭四年傳

云姬在列者言姬姓爲君者也子華欲以鄭屬齊爲附庸  
之君齊若許之是列姦也故下云記姦之位位謂君位杜  
下注云會位失之如杜說何以經仍書鄭世子華乎必不  
然矣

君盟替矣

三體石經作替

說文云替廢一偏下也从立白聲或从日或从荒从日

子華由是得罪於鄭 服虔曰鄭伯罪之也

八年傳不殯于廟 服虔曰廟謂殯宮鬼神所在謂之廟服知周法不殯于廟故以爲殯宮

九年經晉侯詭諸卒 案唐石經及釋文皆作倮惟穀梁傳作詭釋文云左傳作倮又案鄭固碑云造邾倮辭是倮與詭通

傳王使宰孔賜齊侯胙 服虔曰胙腍肉周禮以脰膾之禮親兄弟之國不以賜異姓敬齊侯比之賓客

以是藐諸孤注言其幼賤與諸子縣藐 案呂諶字林曰藐

小兒笑也

文選注

顧君訓藐爲小亦未當

公家之利 高誘呂覽注云公家公之朝也

齊陽朋 王符曰陽氏姜姓

能鬪不過 棟案此卽外傳所謂怒不及色也韋昭曰無色

過

臣聞之唯則定國 子惠子曰呂覽慎大覽引以爲詩詞蓋  
逸詩也

十年傳狐突適下國 服虔曰晉所滅以爲下邑一曰曲沃  
有宗廟故謂之國在絳下故曰下國

余得請於帝 服虔曰帝天帝請罰有罪

七與大夫注侯伯七命副車七乘 服虔曰下大夫與帥七

人屬申生者 棟案服杜二說皆非也晉國之法上大夫

二與二乘中大夫二與一乘下大夫專乘專乘謂一與

見韓

非文公作三行景公時改爲三軍大夫一司馬三行爲六  
與司馬專棄合七興之數後遂以爲官名故襄廿三年傳  
云七興大夫與欒氏蓋自文公以後始有七興獻公時止  
有二行一尉不得爲七興七當爲五古五字如七見王肅詩傳  
遂譌爲之叔堅以下舉里平之黨不必皆在七興之數杜  
以七人爲七興則左右行又何說與

十一年傳賜晉侯命注諸侯卽位天子賜之命圭爲瑞家  
君曰命圭世世守之未聞新君再賜古禮新天子輯瑞諸  
侯薨還圭若國易一君亦易一瑞則古無是禮

十二年經春王三月庚午日有食之隋志曰推合庚午朔  
傳若節春秋杜以賈逵訓節爲時案王肅曰春秋聘享之

節也

應乃懿德 應讀曰膺言膺受女美德也古文皆以應爲膺

尚書康誥曰應保殷民亦古文膺字故徐邈音於應反後人以爲應對之應失之廣雅釋言云應受也

十四年經諸侯城緣陵 薛瓚曰北海營陵縣春秋謂之緣陵

十五年經夏五月日有食之 隋志曰推合癸未朔

齊師曹師伐厲注厲楚與國義陽隨縣北有厲鄉 案桓十

三年傳云楚子使賴人追之杜注與此畧同昭四年經云

楚伐吳遂滅賴公羊傳于此年賴作厲釋文云厲如字又

音賴公羊僖十五年釋文云厲舊音賴則知厲與賴本一

國古音通故或作厲或作賴也 論語云末信則以爲厲已也康成注云厲讀爲賴



司馬彪曰汝南襄侯縣有賴亭故賴國

傳秦穆姬屬賈君注晉獻公次妃案獻公取于賈則是正妃爲惠公之適母何須穆姬之屬唐尙書曰賈君申生妃故僖十年傳云夷吾無禮此爲近之

東盡虢畧司馬彪郡國志云宏農陸渾西有虢畧地

夫狐蠱必其君也狐無喻君之理齊詩有雄狐謂襄公也齊襄通于文姜晉惠通于賈君故以狐爲君

寇深矣戰國策三國攻秦入函谷秦王謂樓緩曰三國之兵深矣高誘曰深猶盛也

步揚御戎注卻犢父世本曰卻豹生義義生步揚步揚生

州州卽犢也

孫備曰食采于步後因氏焉

亂氣狡憤 鄭康成曰憤怒氣充實也

曰上天降災使我兩君匪以玉帛相見而以興戎若晉君朝以入則婢子夕以死夕以入則朝以死唯君裁之 以上

四十二字

釋文云四十七字案文當作四十二字

孔氏正義从定本刪宋以

來又从唐石經采入

北宋本五經正義不載經註南宋以後始增入也

公子縶 韋昭據禮記云縶字子顯盧植曰古者名字相配

顯當爲鞮

無始禍 高誘曰始首也

其卜貳圉也注貳代也 棟謂貳副也坊記曰孝以事君弟

以事長示民不貳也故君子有君不謀仕惟卜之日稱貳

君鄭氏曰卜之日謂君有故而爲之卜也惟卜之時辭得曰君之貳某爾又引此傳以證之周禮有卜立君之文

外傳云其改置以代園故杜訓  
戴爲代兩傳異文似不必牽合

晉於是乎作爰田注分公田之稅應入公者爰之於所賞之  
衆服虔曰爰易也賞衆以田易其疆畔棟謂爰田者猶  
哀公之用田賦也下文作州兵者猶成公之作邱甲也外  
傳爰作轅賈逵曰轅車也以田出車賦說文曰爰籀文以  
爲車轅字春秋左傳多古字古言故以爰爲轅服訓爰爲  
易易田之法本是周制何云作也漢書地理志曰秦孝公  
用商君制轅田豈亦賞衆以田邪外傳所云賞衆是一時  
之事爰田州兵是當日田制兵制改易之始故特書之其  
後文公作執秩而官制又變晉之所以彊者未必不由乎  
此然其後六卿分晉而晉先亡君子于是知舊章之不可

易也

敗于宗邱 案曲禮注邱與區同音故與上姬旗爲協顏師  
古曰今江淮田野之人猶謂區爲邱亦古之遺音也

蛾析 釋文曰本或作蟻婁壽曰古蛾與蟻通漢書白蛾羣  
飛扶服蛾伏陳球後碑蜂聚蛾動仲秋下旬碑蛾附皆與  
蟻同析釋文作哲與石經異

十六年經是月也六鷁退飛過宋都 釋文曰鷁本或作鷁  
案說文引春秋傳亦作鷁或从二傳之文左氏當不爾也  
公子季友卒注稱字者貴之 杜以爲季字友名劉炫以季  
爲氏云季友仲遂皆生賜族非字也

傳吉凶由人 漢書由作繇是也由訓爲生古文𠂔字

吉凶  
生乎

人故云  
由人

十七年傳齊侯好內 服虔曰內婦官也

因內寵以殺羣吏 服虔曰內寵如夫人者六人羣吏諸大夫也

十八年傳無以鑄兵 棟案楚金利鄭刀良故云無以鑄兵

禹貢荆揚二州貢金三品鄭康成曰銅三色考工記云鄭

之刀遷乎其地弗能爲良是也高誘曰鑄讀作祝鑄祝屬注古皆

同音辨見詩古義史記秦本紀云始皇二十六年收天下兵

聚之咸陽銷以爲鍾鐻金人十二重各千石應劭曰古者

以銅爲兵杜氏之注本此

十九年傳次睢之社 張華博物志曰琅邪臨沂縣東界次

睢有大叢社民謂之食人社卽次睢之社

退修教而復之注復在攻之今唐石經及宋本皆云復伐之陸氏以伐爲衍字

廿一年經盟于鹿上注宋地案司馬彪郡國志曰濟陰乘氏縣有鹿城鄉酈元曰春秋之鹿上也

春秋左傳補註卷二

僖廿二年傳螽蟴有毒 平翊夫人碑作螽蟴螽古文螽蟴

說文作螽云或从蚘又云螽蟴屬从虫萬聲非毒蟲也

大司馬固諫曰 顧炎武曰大司馬卽司馬子魚也固諫堅

辭以諫也杜以固爲名謂莊公之孫公孫固者非朱鶴林

案史記宋世家則前後俱子魚之言棟案晉語云公子過

宋與司馬公孫固相善韋昭曰固宋莊公之孫大司馬固

也公子過宋適當襄公之時韋杜皆據世本而言稱大司

馬所以別下司馬也顧氏不見世本而曲爲之說失之史

記疎畧不足取證

大司馬與大宰不在六卿之列文七年穆襄之族殺公孫固時樂豫爲司馬泓

之戰子魚爲司馬明大司馬是宋之孤卿也文七年正義云宋上公禮得有孤且春秋變周不必如禮晉有太師太

傳僭  
爲之

明恥教戰求殺敵也注明設刑戮以恥不果 案吳子曰凡  
制國治軍必教之以禮厲之以誼使有恥也夫人有恥在  
大足以戰在小足以守明恥以教戰者所以厲其勇周書  
曰明恥示教蓋當時之語如此杜解迂回

則如勿傷 何休曰如卽不如齊人語也下同

示之俘馘 說文作俘馘云軍戰斷耳也从耳或聲或从省

案呂諶字林截耳則作耳旁獻首則作首旁杜云馘所載

耳明當从耳旁馘或作馘見漢碑或作國見周禮古國或

鼎文皆然。案周禮無以國爲馘者惟  
五制以訊馘告注云馘或爲國此誤憶

廿三年傳遂取焦夷注焦今譙縣也 案焦譙古通用小黃



門譙敏碑以焦贛爲譙贛是也

策名委質 服虔曰古者始仕必先書其名於策委死之質  
於君然後爲臣示必死節也棟案服讀質爲贄晉語曰臣  
委質于翟之鼓韋昭曰質贄也土贄以雉委贄而退尙書  
稱二生一死贄故云委死之質服說頗勝於杜當从之既  
此而考顧氏補正亦與余同但不引服注故仍存之

杞成公 譙周古史考云惠公生成公及桓公

曹共公 高誘曰共公名襄昭公之子

聞其駢脅 說文作駢脅云并脅也从骨并聲論衡作毗脇  
旣而揮之 振去匱中之水故曰揮何承天曰杜氏訓揮爲

湔正義謂以濕手揮之使水湔汚其衣疑非

廿四年傳軍于郇注解縣西北有郇城服虔曰郇國在解縣東郇瑕氏之虛也酈元案竹書紀年云晉惠公十有五  
年秦穆率師送公子重耳圍合狐桑泉曰衰皆降焉晉師  
狐毛與先軫禦秦至于廬柳秦穆公使公子襲來師言退  
舍次于郇盟于軍京相璠春秋土地名曰桑泉曰衰竝在  
解東南不言解明不至解可知春秋之文與竹書不殊今  
解故城東二十四里有故城在猗氏故城西北鄉俗名之  
爲郇考服虔之說又與俗符賢於杜氏單文孤證矣說文  
云郇讀若泓

秦伯送衛于晉三千人實紀綱之僕 韓非子曰穆公以疇  
駟二千輔公子重耳入之于晉禮記注曰漢律民年二十

傳之疇官各从其父學習騎射故謂之疇騎卽所謂紀綱

之僕也高誘曰衛猶護助也

服虔文七年注云衛從兵也

以志吾過

鄭康成曰志古文識識記也

昭四年傳且曰志之十三年傳歲聘

以志業皆古文識蔡邕論語曰賢者志其大者今作識

伯服

史記作伯楠楠與服古字通詳易考

昔周公弔二叔之不咸故封建親戚以蕃屏周

荀子儒效

篇曰周公兼制天下立七十一國姬姓獨居五十三人而

天下不稱偏焉

召穆公

詩正義曰依世本穆公是康公之十六世孫

詳見服虔

注

好聚鵠冠

子惠子曰鵠一作述逸周書曰知天文者冠述

顏師古以爲子華好與術士遊然案下文服之不衷則不必如顏說也

石甲父 廣韻引作甲石父

省視官具于汜 戰國策曰天子巡狩諸侯避舍納筦鍵攝衽抱几視膳於堂下天子已食而退聽朝也

廿五年傳請隧 杜依賈逵以爲王之葬禮韋昭曰隧六隧之地事見周禮此可備一說

未有代德而有二王 周書芮良父曰觀天下有土之君厥德不遠罔有代德

廿六年經楚人滅夔 古史考云滅歸太康地志曰歸鄉故

夔子國

尚書中候曰伯禹誦首讓于益歸鄭康成注云益歸賢者堯臣歸讀曰夔

傳公使展喜犒師

外傳云以膏沐犒師服虔曰以師枯槁

故饋之飲食高誘淮南子注曰酒肉曰餉牛羊曰犒共其  
枯槁也謹案禮記言犒非古字古文作槁或作槁張揖撰  
廣雅始从牛旁高洪氏隸續載漢碑有勞醕之語醕與槁  
同公羊注云牛酒曰犒故其字一从牛一从酉漢隸皆然  
非古文也說文無槁字周禮小行人云若國師役則令  
槁禮之注云故書槁爲槁鄭司農曰槁當爲槁謂犒師也  
先鄭不言字誤明古槁字本作槁或作槁與服子慎枯槁  
之說合張有復古編云鎬餉也从金高別作槁非五經文  
字注勞師借槁字爲之案說文鎬溫器也以鎬爲槁勞字  
無據

我先王熊摯有疾鬼神弗救而自竄于夔 正義案鄭語孔

晁注云熊繹元孫曰熊摯有疾楚人廢之立其弟熊延熊

摯自弃於夔子孫有功王命爲夔子

韋昭注同

索隱據譙周古

史考熊渠卒子熊翔立卒長子摯有疾少子熊延立

廿七年傳夏書曰注尙書虞夏書也

正義曰此古文虞書

益稷之篇漢魏諸儒不見古文因伏生之謬從堯典至允

征凡二十篇總名曰虞夏書棟案尙書二典皆夏史官所

作故總謂之夏書此孔子刪書之本也故墨子明鬼篇曰

尙書夏書其次商周之書伏生增爲虞夏書梅賾又改爲

虞書皆非孔氏之舊孔穎達又以曲說扶之雅所不取

傳引

二典皆稱夏書惟文十八年云虞書數舜之功此必有誤

欒枝 韋昭曰欒其子之杜注本賈逵

荀林父 世本曰晉大夫逝遨生桓伯林父案僖廿八年林父始將中行故改中行氏

廿八年傳殺子叢以說焉謂楚人不卒戍也 高誘淮南子注云說解也一本謂楚人下有曰字衍文

曹人兇懼 說文云兇擾恐也从人在凶下

欒軒 毛公詩傳云大夫以上赤芾欒軒

且曰獻狀 案獻狀謂觀狀也先責其用人之過然後誅觀狀之皐以示非報惡也顏籀以爲先責不用負羈而欒軒者衆因曰今我之來獻駢脅容狀耳斯蓋蚩弄之言猶言若云謂秦拜賜之師也其說亦通

不有寧也 劉炫規過以傷爲寧不有寧謂不有損傷半農  
先生曰古人多反語如甘爲苦治爲亂皆是以傷爲寧亦  
有理

我曲楚直其衆素飽 周書武稱曰直勝曲飽勝飢武之勝  
也子犯言背楚之惠則我曲楚直且楚强其衆又素飽不  
可爲老也杜訓素爲空言直氣盈飽恐非

原田每每舍其舊而新是謀 說文云每艸盛上出也从艸  
母聲高卬之田艸盛土出故云舍其舊而新是謀周禮三  
卜一曰原兆兆之壘鑿有似原田故鄭氏注云原原田也  
楚子伏 余仁仲曰楚子伏已而監其腦此本伏字絕句岳  
本伏已讀據此則已當音以據岳本則已當音紀陸德明



音義不云音紀則知當以楚子伏爲絕句而已作以音不音紀淳祐九經本亦用伏已絕句更詳之

請與君之士戲 朱國禎曰戲者兵也三軍之號所云戲下是也若云以兵見云耳林堯叟謂得臣輕用民命便解作戲弄之戲夫得臣亦英雄豈有此失杜征南獨不下一字已得其解矣

鞬鞞鞅鞞 說文引作鞬从革顯聲棟案鞬古文以爲顯故傳作鞬从古文省

少長有禮其可用也 子惠子曰應前欲用其民

鄉役之三月 說文引作𡗗云不久也陸氏云本又作𡗗

糾逃王慝 街彈碑云糾剔王慝案魯頌狄彼東南鄭箋云

狄當爲剔剔治也逃與狄同古文作邊又與剔通故或訓爲遠或訓爲治此傳當从古文作邊訓爲治

淮南子云俞兒狄牙嘗溜

澠之水而別之狄牙卽易牙是狄與易通白虎通云狄者易也

瓊弁玉纓 說文引云璿弁玉纓張衡西京賦同薛綜曰弁馬冠也又髦以璿玉飾之纓馬鞅也以玉飾之

寘諸深室 荀卿子曰公侯失禮則幽故寘諸深室

晉侯作三行以禦狄 鄭康成曰行謂軍列周禮有行司馬取名于此案獻公時已有左右行至此復立中行後改爲三軍大夫

卅年傳然鄭亡子亦不利焉 唐石經云雖然鄭亡云云案碑是書丹後改定必有所據

薦用亡鄭以倍鄰 唐石經及宋本皆作陪釋文仍作倍案

注當作倍

若不闕秦將焉取之 新序引云不闕秦將焉取之唐石經  
初刻云不闕秦焉取之正義案沈文何云不闕秦家更何  
處取之案此則若字將字皆衍文俗儒從石經續刻增入  
當刪宋本云由不闕秦焉取之亦誤

請無與圍鄭許之 服虔曰晉善蘭不忘本國故也

卅一年傳自洮以南 酈元曰今酈城西南五十里有桃城  
或謂之洮案酈城漢屬濟陰

卅二年傳將殯于曲沃 鄭衆周禮注曰將葬朝于祖考之  
廟而後行晉宗廟在曲沃故曰曲沃君之宗也又丙午入

于曲沃丁未朝于武宮

孟子 唐石經初刻作孟兮後改子釋文作孟子云本或作孟兮

中壽 三體石經作驚

卅三年傳超乘 高誘曰超乘巨踊車上也

厲兵秣馬 高誘曰厲利其兵釋文曰秣音末穀馬也說文作餽云食馬穀也

鄭之有原圃猶秦之有具囿 高誘曰原圃在今河南中牟具圃在馮翊池陽一名陽紆

其爲死君乎 猶言不爲死君乎君正殯故稱死君顧氏補

正以死其君爲解案成十三年絕秦書曰文公卽世穆爲

不弔蔑我死君則顧之說未盡然也

子墨衰絰 賈逵曰墨變凶

遂墨以葬文公 服虔曰非禮也

康誥曰父不慈子不祗兄不友弟不共不相及也 昭廿年

傳在康誥曰父子兄弟罪不相及孔氏謂非康誥之全文

引其意而言之棟謂此康誥之闕文也法言曰酒誥之篇

俄空焉伏生引酒誥曰王曰封惟曰若圭璧今酒誥無此

文故漢藝文云酒誥脫簡一梓材今王惟曰以下文義不

屬蓋康誥三篇皆有脫誤孔以爲引其意而言之非也

外僕髡屯禽之以獻 崔憬易注曰禽古擒字擒猶獲也

陽子宣言曰 高誘戰國策注曰宣徧也案高注本爾雅

文元年經叔孫得臣 世本曰桓公生僖叔牙牙生戴伯茲  
茲生莊叔得臣得臣生穆叔豹

傳來錫公命 唐石經及宋本錫作賜釋文同云本或作錫  
覲禮云天子賜舍注云今文賜作錫

役夫 管子曰處里爲下陳處師爲下通謂之役夫

宜君王之欲殺女而立職也 案韓非子作廢女上云黜商  
臣合作廢

能行大事乎 服杜皆以爲弑君案高誘戰國策注云大事  
兵事傳曰國之大事在祀與戎故下云以宮甲圍成王  
二年傳秦伯猶用孟明 鄭注儀禮云猶者守故之辭

大事于大廟躋僖公逆祀也 古文左氏說曰大廟周公之

廟饗有禮義者也祀國之大事也惡其亂國之大事於大廟故言大事也躋登也登僖公於愍公上逆祀也

夏父弗忌 禮器云夏父弗綦鄭詩大叔于田云叔善射忌

又良御忌鄭箋云忌讀如彼己之子之己案曹詩候人彼己之己作其其可讀爲記則忌亦可讀爲其古基字期字皆省作其與綦同音是弗忌讀爲綦如厥愍爲厥銀居吾語汝爲姬魚語女字隨讀變從而辨之可識古音

表記引候人云

彼記之子不稱其服釋文云記本又作已然則鄭引曹風詩从三家說也

廢六關 家語云置六關王肅曰六關關名魯本無此關文

仲置之以稅行者故云不仁棟案廢與置古字通公羊傳

曰去其有聲者廢其無聲者鄭志答張逸曰廢置也

何休曰廢

置也置者不以廢爲置猶以亂爲治徂爲存故爲今曩爲去也齊人語

以廢爲置猶以亂爲治徂爲存故爲今曩爲

擲苦爲快臭爲香藏爲去郭璞所謂詁訓義有反覆旁通

美惡不嫌同名也杜氏云六關所以禁絕末遊而廢之周

禮建國有門關關安可廢況後傳塞關陽關皆有明文豈

旋廢之而旋復之與杜氏此說昧于義矣小爾雅亦以廢

爲置杜集解頗用孔鮒之說獨不及此何也 上文云下

展禽下猶去也

見周禮司民注論語柳下惠爲士師三黜

廢六關廢猶置也廢

與下文相對

周語富辰曰小怨置大德韋昭曰置猶廢也彼此互訓

三年傳取王官及郊

括地志云王官故城在同州澄城縣

西北九十里又云南郊故城在縣北十七里又有北郊故

城又有西郊故城



遂自茅津濟 史記秦本紀云繆公元年自將伐茅津劉伯  
莊云戎號也司馬彪郡國志云河東大陽有茅津劉昭引  
杜注云在縣西南有茅亭卽茅城括地志云茅亭及茅城  
在陝州河北縣西二十里水經注云茅亭茅戎號  
封殽尸而還 賈逵曰封識之案易繫曰不封不樹虞翻注  
云穿土稱封封古窆字但殽尸多不能用葬禮故杜云埋  
藏之

四年傳圍邠新城 服虔曰秦邑新所作城也

諸侯敵王所愾注愾恨怒也 案說文引作釳从金氣聲云  
怒戰也許氏所據多古文必得其實

六年經季孫行父如陳注行父季孫友子 案世本云公子

友生齊仲齊仲生無逸無逸生行父

穀梁疏云世本云季友生仲無佚佚生行

父范甯云行父季友孫

行父生夙案文當云季友孫乙孫友衍子字

傳寫誤也

六年傳以子車氏之三子奄息仲行鍼虎爲殉

服虔曰殺

人以葬璇環其左右曰殉

道之以禮則

案唐石經無以字俗儒所加後人遂以則字

屬下句

士會注隨季也

世本曰范氏晉大夫隰叔之子士蔦之後

蔦生成伯缺缺生武子會會生文叔燮燮生宣叔句句生獻子鞅鞅生吉射棟案范氏本陶唐氏之後襄廿四年傳范宣子曰昔句之祖在夏爲御龍氏注云謂劉累也又云

在周爲唐杜氏汲郡古文曰成王八年王師滅唐遷其民  
于杜杜伯之子隰叔違難奔于晉生子與卽土薦也土薦  
生土穀土𦔻𦔻生會食邑於范是爲范武子故宣子曰晉  
主夏盟爲范氏焦弱侯曰土穀土會土皆當作土傳譌耳  
讀爲杜土姓杜伯之後土卽古杜字棟案古土字皆作土  
見牧史記曰有邦有土今呂刑作土周頌曰保有厥土義  
作土呂覽任地曰后稷曰子能吾土靖而畊浴土乎高誘  
曰土當作土周牧敦亦以土爲土焦氏以爲傳譌非也土  
本古杜字鄭康成周禮注校人云世本曰相土作桀馬書  
亦作荀卿子曰杜作桀馬楊倞案世本相土作桀馬今左  
作相土毛詩自土沮漆齊詩作自杜又云徹彼桑土韓詩  
从古文

作桑杜毛詩左氏傳皆出孔壁中故多古文范氏在夏爲  
劉氏周以前爲唐氏昭元年傳云唐人是因以服事夏商  
是也周以後爲杜氏春秋時爲范氏士會之帑留秦者又  
爲劉氏白虞以來世次秩然故宣子以爲死而不朽焦氏  
讀士爲士訓爲杜其言亦卓余故存而論之

晉語范氏曰  
隰叔子違周

難於晉國生子與爲理韋昭曰理士官也班固亦言晉主  
夏盟爲范氏范氏爲晉士師是范氏先以官爲氏以士爲  
杜恐未必然  
也存考

殺諸郕 博物志云殺之郕邵云河東垣縣有郕邵之阨襄  
廿三年云戍郕邵此其地也

將焉寘此 服虔曰寘置也此太子

頓首于宣子 少儀曰婦人吉事雖有君賜肅拜注云婦人

以肅拜爲正凶事乃手拜耳孔正義曰言肅拜婦人之常  
左傳穆嬴頓首於宣子之門有求於宣子非禮之正也愚  
謂穆嬴有襄公之喪以非喪次故用吉拜而頓首也

此子若才吾受子之賜 服虔曰如子爲善教誨此子使之  
有賢才知人君之道也則吾受子之賜賜猶惠

不才吾惟子之怨 服虔曰才而受賜美其教也不才怨子  
惡其教不至也

今君雖終言猶在耳 服虔曰君沒未久而言聲語氣尙在  
耳

宣子與諸大夫皆患穆嬴且畏偪 服虔曰患穆嬴以君顧  
命之言責已也畏他公子相逼迫也

叔仲惠伯 世本曰桓公生僖叔牙叔牙生武仲休休生惠伯彭彭生皮爲叔仲氏

惠伯成之 周禮調人職曰凡有鬪怒者成之鄭衆曰成之謂和之也猶今二千石以令解仇怒

正德利用厚生 賈逵曰正德人德利用地德厚生天德八年傳梁益耳 東觀漢記曰其先與秦同祖出於伯益別封于梁

九年傳秦人來歸僖公成風之襚注追贈僖公并及成風注非也成風者僖公之母莊公之妾母以子貴故上經書夫人風氏母以子氏故此經書僖公成風

十年傳麋子 麋亦作麇注不釋其地所在案盛宏之荊州

記云當陽本楚之舊左氏傳云楚潘崇伐麇至于錫穴穎容釋例云麇在當陽

十一年經承匡注在陳留襄邑縣西 圈稱云襄邑本襄陵承匡鄉也宋襄公所葬故曰襄陵縣西三十里有承匡城傳錫穴 司馬彪郡國志曰漢中錫縣春秋時曰錫穴

瘞其喉 鄭康成引作春

子駒之門 王符潛夫論曰魯之公族有子駒氏

以人氏其門者猶哀

十一年黨氏之溝

敗狄于長邱 張華博物志曰陳留封邱有狄溝春秋之長

邱也

十二年傳邾人立君 服虔曰立君改立君不問天子也

邲邲 子惠子曰服虔以邲邲爲邲邲之家寶圭太子以其國寶與地夫鐘來奔也然則邲不於邑

不有君子其能國乎 呂覽云國不虛存必有賢者

若使輕者肆焉 服虔曰肆突言使輕銳之兵往驅突晉軍案詩云是伐是肆鄭箋曰肆犯突也杜謂肆爲暫往而退此釋輕非釋肆也

裹糧坐甲 昭廿七年傳云吳王使甲坐于道荀卿子云庶士介而坐道故云坐甲

入瑕 京相璠曰今河東解縣西南有故瑕城

十三年傳繞朝贈之以策 服虔曰繞朝以策書贈士會劉勰曰春秋聘繁書介彌盛繞朝贈士會以策子家與趙宣



以書蓋用服說

杜氏以策爲馬過

韓非子曰繞朝之言當矣其爲

聖人於晉而爲戮於秦也此不可不察是繞朝因贈策之言而戮也左氏不載似韓非據秦史而言

吾謀適不用也

白氏六帖引注云以有策而不用也

其處者爲劉氏

宰相世系曰會適秦歸晉有子留於秦自

爲劉氏生明明生遠遠生陽十世孫戰國時獲於魏遂爲魏大夫秦滅魏徙大梁生清徙居沛生仁號豐公生煬字執嘉生四子伯仲邦交邦漢高祖也家君曰處者爲留謂留於秦者遂以爲氏漢人改爲劉以合卯金刀之說

十四年傳王叛王孫蘇

劉向九歎云始結言於廟堂兮信

中塗而叛之王逸章句曰叛倍也倍與背同

王初與王孫蘇後復背之

文七年傳云乃皆  
先蔑此其類也

十五年傳齊人或爲孟氏謀 魯三家慶父叔牙季友慶父  
之後當云慶氏稱孟氏者鄭康成論語注云慶父斬死時  
人爲之諱故云孟氏杜云慶父爲長庶故或稱孟氏案公  
羊傳慶父曰吾不得人矣於是抗斬經而死疏云鄭氏云  
慶父斬死者正取此文又案禮緯含文嘉曰文家稱叔質  
家稱仲嫡長稱伯庶長稱孟杜依此爲說

十六年經盟于鄆邱 釋文云鄆音西賈逵云公羊曰箇邱  
穀梁曰師邱今公羊作犀邱鄆本有西音釋文是毛詩衡  
門云可以棲遲前發碑作西遲此其證也

傳師于大林 伍瑞休江陵記曰城西北六十里有林城春

秋至于阜山師于大林卽此城也

御覽

百濮 劉伯莊史記地名曰濮在楚西南周書王會曰伊尹爲四方獻令正南曰百濮爾雅云南至于濮鈇

十七年傳畏首畏尾身其餘幾 高誘曰畏始畏終中身不畏凡有幾何言常畏也較杜注尤明晰

十八年經六月癸酉葬我君文公冬十月子卒注先君旣葬不稱君者魯人諱弑以未成君書之子在喪之稱 家君曰杜預旣葬稱君之說至此而辭窮矣

傳申池 杜氏依京相璠說言申池在齊城南非也申池在海隅齊之藪多竹木故云納諸竹中若近在城南不須言歸舍爵也詳見襄十八年

在九刑不忘 棟案九刑謂刑書九篇也周書嘗麥解曰維  
四年孟夏王命大正正刑書王陟階在東序乃命大史尙  
大正卽居于戶西南向九州□伯咸進在中西向宰乃承  
王中升自客階作筴執筴從中宰坐尊中于大正之前太  
祝以王命作筴筴告太宗王命□□祕作筴許諾乃北向  
繇書于內楹之間衆臣咸興受大正書乃降大史筴刑書  
九篇以升授大正乃左還自兩柱之間□箴大正曰欽之  
哉諸正敬功爾頌審三節無思民因順余臨獄無頗正刑  
有撥夫循乃德式監不遠以有此人保寧余國克戒余服  
世世是其不殆維公咸若大史乃降大正坐舉書乃中降  
再拜稽首太史乃藏之于盟府以爲歲典此周作九刑之

事也案其文云毀則爲賊掩賊爲藏竊賄爲盜盜器爲姦其後李悝著法經六篇始盜賊次网捕其亦師九刑之意乎

饗饗 饗說文引作飮貪也从食殄省聲

宣二年傳戎昭果毅以聽之之謂禮 大戴禮論四代之政

刑云祭祀昭有神明燕食昭有慈愛宗廟之事昭有義率

禮朝廷昭有五官無廢甲冑之戒當作戎昭果毅以聽然則

戎爲句昭果毅以聽古語也下四字乃左氏益之耳杜注

殊不的

今日之事 高誘曰今日之事御事也

文馬百駟 說文引作馮馬云畫馬也周書王會曰犬戎馭

馬

金本  
文馬

此馬當畫赤鬣縞身之形非真吉黃之藥也

補正  
載邱

光庭說文馬馬之毛色  
有文采者此應說也

于思于思注于思多須之貌

賈逵曰白頭貌案毛詩瓠葉

云有兔斯首鄭箋云斯白也今俗語斯白之字作鮮齊魯  
之間聲近斯正義曰服虔以于思爲白頭貌字雖異蓋亦  
以思聲近鮮故爲白頭也後漢書朱儁傳賊多髭者號于  
氏根注引杜注爲證案此則于爲須思爲白于思爲白須  
也

從臺上彈人而觀其辟丸也

高誘曰從高臺上引彈觀其

走而避丸以爲樂也

寘之畚 何休曰畚草器若今市所量穀者也齊人謂之鍾

三進及溜

釋文曰溜屋霤也案熊氏經說云古有中霤禮

蓋儀禮之逸而不傳者霤者屋有複穴開其上以取明雨則霤之因名中庭曰中霤鄉飲記有磬階霤卽中霤也大記有東霤注云危棟上也雜記有門內霤卽賓執脯賜鍾人之處

民之主也

高誘曰大夫稱王因曰民之主案昭五年傳宴

子謂子罕能用善人民之主也亦謂大夫曰王

觸槐而死

高誘曰觸畜也杜氏云槐趙盾庭樹顧君以爲

魔退而觸槐則非趙盾庭樹棟案呂覽曰觸庭槐而死外傳云觸廷之槐而死韋昭曰廷外朝之廷也周禮王之外朝三槐三公位焉則諸侯之朝三槐三卿位焉此說得之

蓋當時魔退而觸靈公之廷槐者歸死于君也

遂扶以下公嗾夫獒焉

釋文扶服虔注作跣嗾服本作嘔

正義曰服虔本扶作跣注云趙盾徒跣而下走又云嗾嘔也夫語辭獒犬名公乃嘔夫獒使之噬盾是服讀嗾爲嘔非作嘔此文宋本與今本有異故錄之

以視於朝

毛詩鹿鳴曰視民不忼鄭箋曰視古示字士昏

禮曰視諸衿輦注云視乃正字今文作示俗誤行之郭忠恕曰鄭君此說大與說文石經相乖郭氏不識古文其說非也

我之懷矣自貽伊戚

王肅曰此邶風雄雉之詩案今詩感

作阻惟小明詩作感而上句又異王子雍或見三家之詩



據以爲衛詩

三家惟齊詩亡于魏代  
自餘杜氏猶及見之

爲法受惡

服虔曰聞義則服案聞義則服弟子職文也王

肅曰爲書法受弑君之名李厚庵曰此真非夫子之言也

趙盾爲旄車之族

鄭氏詩箋旄作軓陸氏曰一本作軓服

虔曰軓車戎車之倅

三年傳觀兵于周疆

服虔曰觀兵陳兵于周也

定王使王孫滿勞楚子

服虔曰以郊勞禮迎之也

不逢不若

張平子東京賦云禁禦不若以知神姦螭魅魍

魎莫能逢旃爾雅釋詁云若善也郭景純注引左傳曰禁

禦不若今左傳作不逢不若案下傳云莫能逢之杜氏云

逢遇也旣云不逢又云莫逢文旣重出且杜氏不應舍上

句注下句此晉以後傳寫之譌當从張衡郭璞本作禁禦  
不若

余爲伯儵

說文作百鰈云黃帝之後姑姓

釋文作儵非也

楚人酖之 子惠子曰楚滅江惡其所出爲害故酖之

四年傳囹圄伯羸 子惠子曰月令省囹圄蔡邕章句云囹圄

也囹止也所以止出入皆罪人所舍也然則囹圄亦周時

之獄焦氏答崇精曰囹圄秦獄恐未然

汰轉 唐石經作汰說文曰泰滑也从升从水大聲徐鉉云

音他達切左傳作汰非昭廿六年傳云齊子淵射洩聲子

中楯瓦繇胸汰轉匕入者三寸杜云汰矢激明汰爲滑也

楚人謂乳穀謂虎於菟 唐石經云楚人謂乳爲穀謂虎爲

於菟說文曰楚人謂虎爲烏鶻漢書又作於擇方言注云  
今江南夷呼虎爲鶻音狗竇鄭康成尙書注曰於者鳴聲  
則於爲古文烏鶻廣雅作鶻奴口反

箴尹 高誘呂覽注曰楚有箴尹之官諫臣也

王思子文之治楚國也 戰國策曰穰侯之治秦也高誘曰  
治猶相也

改命曰生 子惠子曰劉向改名更生本此更生出莊子

六年傳以盈其貫注貫猶習也 劉光伯據梅賾泰誓商罪

貫盈以爲紂之爲惡如物在繩索之貫不得爲習其說是  
也而所據之書非也案韓非子曰有與悍者鄰欲賣宅而  
避之人曰是其貫將滿也或曰子姑待之答曰吾恐其以

我滿貫也遂去之此說與劉合可以規杜過矣

王子伯廖注鄭大夫 子惠子曰王子疑非鄭大夫

十年傳崔杼 正義曰何休膏肓以爲公羊譏世卿而難左

氏蘇氏釋云崔氏祖父名不見經傳則知非世卿云云案

宰相世系曰崔氏出自姜姓齊丁公伋嫡子季子讓國叔

乙食采於崔遂爲崔氏濟南東朝陽西北有崔氏城是也

季氏生穆伯穆伯生沃沃生野八世孫天生杼爲齊正卿

云云又案僖廿八年傳有齊崔天蘇寬謂崔子祖父名不

見經傳非也

世系所云  
蓋見世本

十一年經辰陵注潁川長平縣東南有辰亭 酈元曰今此

城在長平城西北長平城在東南或杜氏不謬傳寫之誤

耳

傳令尹薦艾獵城沂服杜皆云薦賈之子孫叔敖案世本

艾獵爲叔敖之兄又孫叔敖碑云君名饒字叔敖以艾獵

爲叔敖名此服杜臆說世本是也襄十五年傳薦子馮爲大司馬注云叔敖從子

案世本焉是艾獵之子此明文可據者正義曲說又以爲世本轉寫之誤非也

使封人慮事注慮謀慮計功顧氏補正云慮籌度也此解

非棟案大司馬職云大役與慮事屬其植先鄭亦謂謀慮

其事服虔曰封人司徒之屬官

因縣陳廣韻縣郡縣也釋名曰縣懸也懸于郡也古作寰

楚莊王滅陳爲縣縣名自此始也家君曰縣字見周官似

非自楚莊王始然古文作寰亦非無本而說文無寰字似

縣卽寰也集韻云寰通作縣

吾儕小人 說文曰儕等輩也鄭康成曰儕猶輩類

謂之夏州 子惠子曰服虔曰言取討夏徵舒之州車武子  
撰桓溫集云夏口城上數里有州名夏州盛宏之荊州記  
曰史記蘇秦說楚威王東有夏州今江陵夏口城有州名  
夏州

十二年傳卜臨于大宮且巷出車吉 賈逵曰臨哭也巷出  
車陳于街巷示雖困不降必欲戰也案下鄭復修城則賈  
說良是

甲寅克之 時鄭石制爲內閒故楚得以克鄭

至于達路注塗竝九軌曰達 詩正義曰爾雅九達謂之達

周禮經塗九軌不名曰達杜意蓋以鄭之城內不應有九出之道故以爲竝九軌於爾雅不合今杜注塗方九軌

兼弱攻昧武之善經也 周書武稱曰□強攻弱而襲不正武之經也

筭路藍縷以啟山林 方言引作縷縷又啟作肩說文曰稠謂之縷縷縷無緣也服虔曰言其縷藍藍然

廣有一卒卒偏之兩 服虔曰左右廣各十五桀百人爲卒言廣有一卒爲承也五十人爲偏二十五人曰兩廣既有士卒爲承承有偏偏有兩故曰卒偏之兩棟謹案禮說言杜氏據司馬法以釋偏兩之法司馬穰苴齊湣王時人其所論兵法與周制異且與左氏傳乖牾不合當从服虔之

說

摩壘而還

鄭康成曰摩猶迫也軍壁曰壘

左射以敢

服虔曰凡兵車之法射者在左御者在中戈盾

在右

御下兩馬

鄭康成引作柄徐仙民曰兩或作柄案此則兩

本柄字故服杜訓爲飾古文省故作兩邵寶以爲掉兩馬之鞅非也

挑戰

李奇曰挑身獨戰不復須衆也挑音茶了反薛瓚曰

挑戰擣撓敵求戰古謂之致師

楚人藥我

賈逵國語注曰藥陵也陵亦侵也

養由基爲右

高誘戰國策注云養姓由基名楚之善射人



也

潘黨望其塵 孫子曰塵高而銳者車來也

使潘黨率游闕四十乘注游車補闕者 棟案游闕游車闕車也外傳曰戎車待游車之裂周禮車僕有闕車之倅

駒伯注郤克 棟案郤錡字駒伯克之子也大夫門子得从父于軍鄢陵之戰范匄從文子於軍此其證也

屈蕩尸之 錢謚益曰家藏淳熙九經及長平游御史本巾箱本俱作尸字棟案淳熙正義亦作尸也

楚人碁之注碁教 說文引云楚人卑之云舉也黃顥說廣車陷楚人爲舉之案此則碁當作卑傳遂謂楚人將毒害之而晉人乃脫扃拔旆投衡而出非也詳見定四年訓碁

爲教蓋本小爾雅

趙俚在後 俚與叟同見無極山碑說文作𡗗云𡗗或作𡗘

知莊子 案世本晉大夫逝遨生桓伯林父及莊子首本姓

荀自林父將中行

世本以爲荀偃

別爲中行氏知邑名括地志云

故智城在蒲州虞鄉縣西北四十里古今地名云解縣有

智城蓋謂此也博物志云河東解縣有智邑

每射抽矢敢注敢好箭 案旣夕禮云御以蒲敢鄭注云蒲

敢壯蒲莖也古文敢作駟賈公彥云據左氏傳蒲非直得

策馬亦爲矢幹漢書鼂錯傳云材官駟發矢道同的如淳

曰駟矢也小顏曰駟謂善矢也左氏傳作敢字其音同耳

則知古敢字作駟

屢豐年

案說文無屢字當从毛詩作婁漢書皆以婁爲屢

今毛詩亦有作屢者俗作之

取其鯨鯢

說文引作鯨鯢云海大魚也或从京漢書薛宣

傳曰古者明王伐不敬取其鯨鯢小顏曰鯨古鯨字汗簡

云鯨古作鯨出馬日磧集羣玉古文古京字讀爲畱

歸于怙亂者也夫

子惠子曰王荆公新經詩義本此

十四年傳衛人以爲成勞復室其子

周禮司勳云事功曰

勞室祿也周書有一室之祿謂祿其子襲父位自一室至

千室卿之祿也周禮謂之宅田注謂以女妻之非是世本

曰莊叔達生得閭叔穀穀生成叔烝鉏鉏生項叔羅羅生

昭叔起起生文叔圉圉生悝

其子謂得閭叔穀也

屨及於室皇

高誘呂覽注引此傳作經皇與莊十九年經

皇一也

蒲胥之市

呂覽作蒲疏胥疏古字通

十五年傳高下在心

服虔曰高下猶曲中也

國君含垢

淮南子云老子曰能受國之垢是爲社稷主

使解揚如宋

劉向曰解揚霍人字子虎後世言霍虎

登諸樓車

服虔曰樓車所以窺望敵軍兵法所謂雲梯也

使華元登子反之牀注兵法因其鄉人而用之必先知其守

將左右謁者門者舍人之姓名因而利道之

案此注皆

見孫子用閒篇曹公孫子注曰因敵鄉人知敵表裏虛實

之情故舊而用之可使伺候守有官職在者謁告也上告

事者也門者守門者也舍人守舍之人也又先知爲親舊有急卽呼之則不何止亦因以之知敵情

虐我伯姬

上云酆舒爲政而殺之

王符引作虐

此云虐者案尙

書呂刑惟作五虐之刑墨子引作五殺之刑論語不教而

殺謂之虐又十八年傳云凡自內虐其君曰弑皆以虐爲

殺也

論語陰嬖譏曰庚子之旦金版尅書出地庭中曰臣族虐王禽宋均云謂殺關龍之後庚子旦庭中地有

此版異也龍同姓稱族王虐殺我必見禽也是虐爲殺又一證

敗赤狄于曲梁

注云廣平曲梁縣迴遠非也劉昭案上黨

記曰潞濁漳也縣城臨潞晉荀林父伐曲梁在城西十里

今名石梁此傳潞字漢書作路

劉寬碑陰潞作路

案三體石經仍

作潞說文同

羊舌職 宰相世系表曰晉武公子伯僑生文文生突羊舌大夫也突生職職五子赤肸鮒虎季夙

十六年傳禹稱善人 玉篇引云禹偁善人云與稱同尔疋曰偁舉也與杜訓同當从人

十七年傳晉師還 家君曰晉未嘗出師而云晉師還者豈斷道討貳之師歟似有闕文

十八年傳自虐其君 唐石經云自內虐其君案正義同今本皆脫內字

袒括髮 士喪禮曰主人髻髮袒鄭注云古文髻作括是括爲古文髻也

左傳補註卷二

春秋左傳補註卷三

成元年傳瑕嘉 周禮典瑞注引作段嘉蓋古人止作段讀  
爲遐也今本亦作瑕唯陸氏周禮釋文猶存古字

二年傳隕子辱矣 說文引云耘子辱矣耘有所失也戰國  
策齊宣王曰寡人愚陋守齊國唯恐夫耘之墨子天志曰  
國家滅亡耘失社稷廣雅亦云耘失也案呂覽季夏紀云  
昭王耘于漢中高誘曰耘隊音曰顛隕之隕史記東越列  
傳曰不戰而耘此耘字之誤漢書作殞知耘與隕通耘古  
字也隕今字也徐廣曰耘義當取耘除失之

朝夕釋憾 唐石經憾作感案古本左傳憾字皆作感从省  
文

師之耳目在吾旗鼓進退從之 孫子引軍政曰言不相聞故爲之金鼓視不相見故爲之旌旗夫金鼓旌旗所以一人之耳目也人既專一則勇者不得獨進怯者不得獨退此用衆之法也荀卿子云將死鼓御死轡

將及華泉 京相璠曰華泉華不注山下泉水也

韓厥執縶馬前 縶說文引作馵從馬口其足讀若輒或從

糸執聲

穀梁傳云馵者何也曰兩足不能過齊謂之縶楚謂之馵衛謂之縶

辟女子注使避君 棟謂下云乃奔則辟當讀爲趨與五年

伯宗辟重同周禮大司寇云使其屬趨康成曰故書趨作避杜子春云避當爲辟元謂趨止行也古趨字有作辟注訓爲避非也



蕭同叔子 干寶曰蕭同叔子惠公之妾頃公之母史記作

桐

物土之宜而布其利注播殖之物各從土宜 棟謂物讀如  
旣夕禮家人物土之物鄭氏云物猶相也大司徒職云以  
土宜之灋辨十有二土之名物周書大聚曰因其土宜以  
爲民資

司馬司空輿帥候正亞旅 司馬司空軍司馬軍司空也輿  
衆也輿帥領其衆在軍之後者候正軍候主候望者高誘  
說如此

殺御叔 韋昭曰御叔陳公子夏之子靈公之從祖父嬀姓  
也

王曰止 高誘曰止禁止也

誰居註居辭也釋文云居音基 案檀弓云何居我未之前聞也注云居讀爲姬姓之姬齊魯之間語助也列子黃帝篇云關尹謂列子曰姬魚語女張湛云姬音居魚當作吾是居姬互訓蓋古音同也

侵敗王略注法度 案略封也昭七年傳曰天子經略天子謂之略諸侯謂之封

三年傳伐麇咎如討赤狄之餘焉 案僖廿三年傳狄人伐麇咎如賈逵曰赤狄之別種隗姓杜注亦同赤狄種類已盡惟麇咎猶在故復討其餘劉炫以爲麇咎之國卽是赤狄之餘杜以爲餘民散入其國豈其然乎 成十三年注

云季隗嬭咎如赤狄之女也是杜自相矛盾

荀騅 案世本騅諡文子

齊侯朝于晉將授玉 史記晉世家云齊頃公如晉欲上尊  
晉景公爲王景公讓不敢王劭案張衡曰禮諸侯朝天子  
執玉旣授而反之若諸侯自相朝則不授玉齊頃公戰敗  
朝晉而授玉是欲尊晉侯爲王太史探其旨而言子惠子  
曰授玉古文左傳作授王司馬子長謂齊欲尊晉爲王蓋  
晉作六軍擬於王矣故齊欲尊之猶戰國東帝西帝之例  
也古文不可見存之以備異說棟案古玉字皆作王左氏  
傳多古字古言故玉从王定五年傳云改步改玉晉語作  
改玉改行荀卿王霸篇又云改王改行是古玉作王之證

西漢劉子駿治左氏始改王爲玉周禮九嬪職云凡祭祀  
贊玉璫註云故書玉爲王杜子春讀爲玉是古文皆以王  
爲玉之證 上文云晉作六軍擬于王矣故史記以授玉  
爲尊晉爲王 諸侯相朝授玉此僭禮也下年傳云鄭伯如  
晉授玉于東楹之東是有授玉之事平子之

說未  
允

六年傳沃饒而近鹽 服虔曰土平有漑曰沃

有汾澮以流其惡 周書曰地有五行不通曰惡

七年傳讒慝貪怵 子惠子曰方言曰貪殺也楚謂之貪怵

殘也又云殺人而取其財曰怵二子殺巫臣之族而分其  
室故曰怵

八年經晉侯使韓穿來言汶陽之田 聘禮云若有言則以

束帛如享禮注引此傳爲證又云無庭實也

宋公使公孫壽來納幣服虔曰不稱主人母命不通故稱使婦人無外事

傳祁奚高誘呂覽注云祁奚高梁伯之子祈黃羊也又云黃羊祈奚字

九年傳執諸銅鞮劉昭案上黨記曰銅鞮晉別宮墟關猶存有北城去晉宮二十里羊舌所邑

操南音劉達曰商角徵羽各有引鍾儀楚人思在楚故操南音南音始于塗山之女見呂氏春秋

雖有絲麻無棄菅蒯蒯玉篇引作蔽云與蒯同李登聲類曰蒯草中爲索苦怪切

雖有姬姜無棄蕉萃 淮南說林曰有榮華者必有憔悴有  
羅紉者必有麻蒯蕉萃猶憔悴也

十年傳太子州蒲 應劭舊君諱議引作州滿陸氏云本或  
作滿劉子元曰州滿今春秋左氏本皆作州蒲誤也當爲  
州滿事見王邵續書志棟謂王氏當據仲遠說

晉侯夢大厲 李頤莊子解云死而無後曰厲

忠爲令德非其人猶不可況不令乎 陸粲曰非其人謂叔  
申本非賢者雖欲效忠不見信於君適以自害耳棟案陸  
氏此言是教人慎勿爲善非君子之言也呂覽曰賢主之  
所悅不肖之所誅高誘引此傳以爲證杜氏之說未可非

也

近代李厚庵亦以  
于忠肅事況之

十二年傳道路無壅

唐石經作雍棟案古壅字皆作雍

說文

作無从土者

十三年傳民受天地之中以生所謂命也 以五行言則五  
六爲天地之中以爻位言則二五爲天地之中以四時言  
則春秋爲天地之中天地之中命也民受之以生卽所謂  
性也性爲中情爲和中庸之中和卽天地之中也故曰天  
命之謂性易曰各正性命保合太和在易又謂之利貞故  
曰利貞者情性也

戮力同心 唐石經及宋本皆作勦說文曰勦并力也从力  
麥聲戰國策曰勦力同憂高誘曰勦力勉力也其字从力  
詛楚文又作繆力蓋古字假借

蔑死我君 唐石經初刻云蔑我先君後改从今本陸氏曰  
本或以我字在死上案僖卅三年傳欒枝曰其爲死君乎  
尋文義當云蔑我死君鄭康成易注云蔑輕慢也

十四年傳宗卿之嗣注同姓之卿 國之宗臣故曰宗卿書  
曰記宗功是也宗臣兼同異姓故漢之蕭曹亦爲宗臣  
衛侯饗苦城叔 王符曰郤犇食采於苦號苦成叔又曰苦  
成城名也在河東鹽池東北

十五年經宋華元自晉歸于宋 傳止華元于河上則華元  
未至晉時在晉境耳而云自晉者魚石以華元有平晉楚  
之功懼以晉討爲復之故書法亦曰自晉著其所自復耳  
蔣杲云



傳盜憎主人民惡其上 子惠子曰盜憎主人民怨其上周  
廟金人銘也其詞曰古之慎言人也無多言多言多敗故  
云子好直言必及於難

十六年傳瀆齊盟 崔憬易注云瀆古黷字傳皆以瀆爲黷  
范文子曰我若羣臣輯睦以事君多矣 唐石經云我若退  
羣臣輯睦以事君多矣又何求案碑退字又何求三字皆  
旁增當是晁公武據蜀石經益之

陳於軍中而疏行首 司馬法曰凡陳行惟疏淮南子曰疏  
隊而擊之高誘曰疏分也

其卦遇復曰南國蹙射其元王中厥目 子惠子曰此與僖  
十五年傳干築三去三去之餘獲其雄狐皆夏商之易也

或據周易以解之皆不得其義蓋夏商占七八周易占九  
六其辭義各有異同不可強解也

蹲甲而射之徹七札焉

蹲古文作踐蹲猶立也羣經音辨

云蹲才九切鄭康成讀七札一甲之度也揚雄太元曰比  
札爲甲賈公彥周禮疏云一葉爲一札呂覽愛士篇云韓  
原之戰晉惠公之右路石奮投而擊繆公之甲中之者已  
六札矣言六札者惟一札未陷耳知甲以七札爲數也徹  
七札者猶貫甲也

楚子使工尹襄問之以弓

穀梁傳云聘弓鏃矢麋信曰古

者以弓矢相聘問故左傳云楚子問郤至以弓

有韎韐之跗注

詩瞻彼洛矣云韎韐有奭毛傳云韎韐茅

蒐染草也鄭箋云茅蒐𨮒𨮒聲也又駁五經異義云𨮒草名齊魯之間言𨮒𨮒聲如茅蒐字當爲𨮒陳留人謂之𨮒韋昭國語注云昭謂茅蒐今絳草也急疾呼茅蒐成𨮒也鄭康成雜問志曰𨮒𨮒之不注不讀如跗跗幅也注屬也幅有屬也以淺赤韋爲弁又裁韋如布帛之幅而連屬以爲衣而素裳白鳥也棟案不與跗古字通見詩箋以跗注爲不注者鄭所受春秋異讀也

識見不穀而趨棟案識當爲適外傳作屬訓爲適高誘曰不穀不祿也人君謙以自稱也

三肅使者而退子惠子曰爲十七年樂書譜卻至張本好以暇唐石經初刻無以字

展車馬注展陳也 康成曰展整也

子叔聲伯使叔孫豹請逆于晉師 服虔以爲叔孫豹先在齊矣此時從國佐在師聲伯令人就齊師使豹豹不忘宗國聞白國佐爲魯請逆家君曰玩下召豹於齊及昭四年傳則服說爲長

公還待于鄆 京相璠曰公羊作運字今東郡廩丘縣東八里有故運城卽此城也

僑如曰不可以再罪奔衛 唐石經曰遂奔衛今本皆脫遂字

十七年傳匡句須吉 應劭風俗通曰匡魯邑句須爲之宰其後氏焉

聲伯夢涉洹

酈元曰許慎說文曰枕字林竝云洹水出晉

魯之間御覽隋圖經曰洹水出隆慮縣西北俗謂安陽河  
卽聲伯夢涉之所源出林慮山東平地

盈其懷

王逸楚辭章句曰在袖曰懷

余恐死故不敢占也

服虔曰聲伯惡瓊瑰贈死之物故畏

而不言也

皆尸諸朝

康成論語注曰大夫於朝士於市昭十四年尸

雍子與叔魚於市正義曰晉殺三郤皆尸於朝此尸於市

者以其賤故也棟案論語尸諸市朝孟子若撻之於市朝

索隱謂市之行列有如朝位故曰市朝王制謂刑人於市

則此尸諸朝疑卽市朝或云朝或云市隨文言之非有二

所

一朝而尸三卿 韓非子載厲公語曰吾一朝而夷三卿子不忍盡也周禮凌人曰大喪共夷槃冰鄭氏云夷之言尸也尸之槃曰夷槃牀曰夷衾曰夷衾移尸曰夷于堂皆依尸而爲說是夷與尸古字通又古夷字作尸與尸相近故或從尸或从尸也

十八年傳周子有兄而無慧 案大戴禮曰慧種生聖癡種

生狂故昌邑王清狂不惠

惠與慧古字通

羊舌職 子惠子曰說苑作羊殖殖爲舌職合聲

籍偃 韋昭曰籍偃晉大夫籍季之子籍游也世本曰襄生

司功大伯伯生候季子子生籍游游生談

爵不踰德 荀卿子曰爵賞不踰德是以爲善者勸

以塞夷庚注夷庚吳晉往來之要道 案繁欽辨惑曰吳人

者以船楫爲輿馬以巨海爲夷庚臧榮緒晉書曰司徒王  
謐議曰夷庚未入棄輿旋館陸機辨亡論曰旋皇輿於夷  
庚然則夷庚者通謂車馬往來之大道以其在彭城故屬  
之吳晉也

小尔正曰  
夷通也

襄元年經楚公子王夫 匡謬正俗曰楚公子王夫字子辛  
今之學者以其字子辛遂改王夫爲王夫按楚有公子午  
字子庚庚是十幹午是十二支法有相配辛壬同是十幹  
與庚午不類當依本字讀爲王夫

傳宣諸瓠邱注河東垣縣有壺邱亭 案壺與瓠通見毛公

傳

二年傳正輿子 子惠子曰荀子曰萊不用子馬而齊并楊  
倛曰或曰正輿子字子馬

三年傳組甲三百被練三千注組甲漆甲成組文被練練袍

馬融曰組甲以組爲甲裏公族所服被練以練爲甲裏

卑者所服賈逵曰組甲以組綴甲

同服虔

車士服之被練帛

也以帛綴甲步卒服之凡甲所以爲固者以盈竅也帛盈

竅而任力者半卑者所服組盈竅而盡任力尊者所服棟

謹案禮說稱賈氏義爲長少儀曰國家靡敝則甲不組滕

逸周書曰年不登甲則纓滕孔晁曰縷繩甲不以組

引見初學

記蓋組甲之工靡于被練故凶歲不組滕所以節財也考



工函人云凡察革之道眊其鑽空欲其窻也空窻則堅窻滿則固帛粗故任力者半組細故盡任力呂覽有始篇曰邾之故法爲甲裳以帛高誘曰以帛綴甲卽被練是也公息忌謂邾君曰不若以組甲凡甲之所以爲固以滿窻也今窻滿矣而任力者半耳且組則不然窻滿則盡任力矣邾君以爲然高誘曰組甲以組連甲賈氏之說蓋本於此乃盟於郚外 京相璠曰今臨淄惟有濇水西北入沛卽地理志曰如水矣郚如聲相似然則濇水卽郚也

其將來辭 韋昭曰辭陳其辭狀也

軍法有死無犯爲敬 韋昭曰有死其事無犯其令是爲敬命案晉語韓獻子爲司馬趙孟使人以其棄車干行獻子

執而戮之宣子召而禮之曰夫軍事無犯犯而不隱義也  
韋說頗勝於杜

反役與之禮食 韋昭曰反役自役反禮食公食大夫之禮  
士富爲侯奄 晉語曰使范獻子爲侯奄韋昭曰獻子范文  
子之族昆弟士富也是范氏有兩獻子矣

四年傳文王帥殷之叛國以事紂 周書程典曰維三月旣  
生魄文王合六州之侯奉勤於商孔晁曰三分天下有其  
二以服事殷也

季孫曰略注不以道取曰略 匠慶請用蒲圃之木故季孫  
曰略正義言令匠慶略他木失之

有窮后羿 玉篇引作窮說文曰窮夏后時諸侯夷羿國也

从邑窮省聲

生澆及豷 澆說文引作敖論語作梟尙書云無若丹朱傲

劉向引作敖管子云若敖之在堯說文引書作傲云讀若

傲論語梟蕩舟

說文上

是敖與梟通今傳作澆者敖澆音相

近師讀各異故也

敗於狐貍

禮記作臺貍淮南子墜形曰沂出臺貍術篆文

臺壺字相似壺又與狐通故傳作狐貍杜氏以爲卽番縣

之目台山案目台卽淮南子目貍山溜水所出杜說非也

目台山今杜解本作目台亭非是劉昭補註亦引作目台山

靡奔有鬲氏

汲郡古文曰帝相廿八年寒浞使其子澆弑

帝伯靡出奔鬲杜氏以爲夏遺臣事羿者案羿死于帝相

八年言夏遺臣是也言事羿者非也

六年傳甲寅堙之注堙土山也 孫子謀攻篇曰攻城之法  
脩櫓鑕輶三月而後成距堙杜牧云距堙者踊土稍高而  
前以附其城也

環城傳於堞 淮南子兵略曰設渠塹傳堞而守高誘曰傳  
守也

七年傳公登亦登注禮登階臣後君一等 聘禮曰至於階  
三讓公升二等注云先賓升二等君行一臣行二韓非子  
載穆叔語曰今子不後寡君一等是其證也

八年傳子國曰國有大命 荀卿子引詩云國有大命不可  
以告人妨其躬身故下云童子言焉將爲戮矣

一介行李 唐石經及釋文宋本皆作个徐鉉曰个字不合  
六書之體當作介

九年傳陳曾局 唐石經作柶正義曰其字從手此臆說也  
漢書引此傳云陳畚耨耨音菊與柶同音史記河渠書云  
山行則柶耨昭曰柶木器如今舉牀人舉以行也然則耨  
與柶音義皆同故孔氏書正義以爲柶耨本一字古篆變  
易形字體改易說者不同未知孰是

以出內火 漢書引云以出入火案周毛伯鄭敦云毛伯內  
門立中庭內讀爲入立讀爲位古文春秋經公卽位爲公  
卽立出入火爲出內火皆古文也尙書云九江內錫大龜  
史記內作入是古入字皆作內徐邈音內爲納非也

相土因之故商主大火 汲郡古文曰帝相十五年商侯相  
土作棗馬遂遷於商邱鄭康成注周禮校人引世本亦云  
相土作棗馬古文士土相亂如盥和鐘以土爲土牧敦以  
土爲土之類詳見上土又與杜通故荀子云杜作棗馬左傳  
外古文故以土爲杜

遇艮之八 服虔曰爻在初六九三六四六五上九惟六二  
不變連山歸藏之占以不變者爲占棟案易乾鑿度曰陽  
動而進陰動而退故陽以七陰以八爲彖易一陰一陽合  
而爲十五之謂道陽變七之九陰變八之六亦合於十五  
則彖變之數若之一也鄭康成注云彖爻之不變動者九  
六爻之變動者繫辭曰爻效天下之動也然則連山歸藏

占彖本質性也周易占變者效其流動也彖者斷也如鄭

此言連山歸藏占彖故下文雖引周易仍用二易以彖爲

占顧氏補正其說支離不可从也

晉語曰公子筮之得貞屯悔豫皆入也筮史占

之皆曰不吉閉而不通爻無爲也蓋以不變爲占故云爻無爲也司空季子曰是在周易皆利建侯又董因曰臣筮之得泰之八日是謂天地配亨小在大來是雖用周易而仍占彖夏殷之法也

隨其出也 虞翻注易隨卦曰隨陰隨陽謂隨卦三陰皆隨

陽故卦名隨陰隨陽猶母隨子故隨其出也

門于剽門 張揖廣雅曰門守也

斬行栗 毛詩國風東門之栗毛傳云栗行上栗也

次于陰口而還 服虔曰參南曰陰口者水口也

國君十五而生子冠而生子 賈服說皆以爲人君禮十二

而冠案高誘淮南子注曰三十而娶者陰陽未分時俱生  
於子男從子數左行三十年立於巳女从子右行二十年  
亦立於巳合夫婦故聖人因是制禮使男三十而娶女二  
十而嫁其男自已數左行得寅故人十月而生於寅男子  
數从寅起女自已數右行得申亦十月而生於申故女數  
从申起歲星十二歲而周天天道十二而備故國君十二  
歲而冠冠而娶十五生子重國嗣也故不从制說文曰元氣起於子  
子人所生也男左行三十女右行二十俱立於巳爲夫婦  
裏妊於巳巳爲子十月而生男起巳至寅女起巳至申故  
男年始寅女年始申也案高注與說  
文同故宋人亦以淮南爲許慎注也

冠乎成公之廟 服虔曰成公衛曾祖故以祧爲曾祖廟時  
不冠于衛之始祖以非巳廟故也



祈以幣更 呂覽二月紀是月也祀不用犧牲用圭璧更皮幣高誘曰更代也以圭璧代犧牲也管子四時篇曰除神位謹禱弊幣通梗周禮女祝掌以時梗禴禱之事注云鄭大夫讀梗爲亢謂招善而亢惡去之杜子春讀梗爲更元謂梗禦未至也案此則更讀爲梗杜元凱謂以幣更牲未之考也詳見禮說

十年經會吳于柵注柵楚地 京相璠曰柵宋地今彭城偃陽縣西北有柵水溝去偃陽八十里司馬彪郡國志曰彭城偃陽有柵水

偃陽 釋文云偃徐仙民甫曰反棟案徐音是也古今人表作福陽知古皆作福音也

傳士莊伯

服本

云云其將不免乎

服虔曰免脫也言將不脫

罪禍不以壽終也傳舉此者爲十九年齊殺其大夫高厚

二十五年崔杼弑其君光起本也

聊人紇

唐石經及宋本皆作聊酈元引作鄆論語同案聚

字古或省文作取說文曰聊魯下邑孔子鄉

建大車之輪而蒙之以甲以爲櫓

正義曰建立也立此大

車之輪而覆之以甲以爲櫓也

子惠子曰甲覆楯非覆

輪當云立之大車之輪

右拔戟以成一隊注百人爲隊

高誘曰軍二百人爲隊

淮南

司馬法云五人爲伍十伍爲隊

見李衛公兵法

是又以五十人爲

隊國語曰百人爲徹行行頭皆官師賈逵云百人爲一隊

也官師隊大夫也故杜據以爲說

余羸老也 高誘曰羸劣人也

親受矢石 後漢書堅鐔傳曰輒先當矢石注石謂發石以投人也墨子曰備城者積石百枚重十鈞以上者

桑林 莊子湯有桑林之舞司馬彪曰桑林湯樂也崔瑗曰宋舞樂名

偁陽妘姓也使周內史選其族嗣納諸霍人禮也 高誘淮南子注云天子不滅姓古之政也

獻兆於定姜 高誘曰兆契龜之兆世所以占吉凶者也

爾車非禮也 唐石經曰爾車多非禮也案注當有多字

尉止 尉止尉翩以尉爲氏謂之尉氏圈稱陳留風俗傳曰

尉氏鄭國之東鄙弊獄官名鄭大夫尉氏之邑故欒盈曰  
臣將歸死于尉氏是也

諸侯之師還鄭而南 釋文曰還本亦作環棟案鄭氏士喪  
禮注云古文環作還哀三年傳道還公宮同公羊傳云以  
地還之也又云師還齊侯皆與環同

簞門閨竇 說文引云簞門圭窬康成禮記注云簞門荆竹  
織門也圭窬門旁窬也穿牆爲之如圭矣玉篇亦引作窬  
窬與竇同物同音

十一年傳西濟于濟隧注濟隧水名 京相璠曰鄭地也又  
曰滎澤在滎陽縣東南與濟隧合濟隧上承河水於卷縣  
北河南逕卷縣故城東又南逕衡雍城西

同盟于亳 案經云同盟于亳城北二傳皆云京城北公羊疏云服氏之經亦作京城北與此傳同棟案亳城當依服氏作京京鄭地在滎陽隱元年傳謂之京城是也亳無考非也

司慎司盟 服虔曰二司天神司盟司慎不敬者監司察盟者

女樂二八 王逸楚辭章句曰二八二列大夫有二列之樂韋昭曰八人爲列備八音也

書曰居安思危注逸書 案周書程典曰於安思危於始思終於邇思備於遠思近於老思行不備無違嚴戒

十二年傳同姓於宗廟 毛萇詩傳云同姓同祖也

楊梁 京相璠曰楊梁宋地今睢陽東南三十里有故楊梁  
今曰楊亭也俗名之曰緣城非西北去梁國八十里劉昭  
引杜注云有地名楊亭與京相說同

王使陰里結之 先鄭有婚禮結言結字本此傳

十三年傳什吏 周書大聚曰十夫爲什以年爲長卽什吏  
也

窀穸 孔宙碑作窀夕說文云窀葬之厚夕說文無穸字明  
不从穴也

先王卜征五年而歲習其祥祥習則行 國語引大誓曰朕  
夢協于朕卜襲于休祥禮記云卜筮不相襲注云襲因也  
棟案襲與習通周禮大司徒屬胥各掌其所治之政襲其

不正者康成云故書襲爲習是習爲古文襲左氏从古文故以習爲襲也哀十五年傳云卜不襲吉注云襲重也金縢云乃卜三龜一習吉又鄭注士喪禮云古文褶爲襲是襲與習通

十四年經衛侯出奔齊 不修春秋曰孫林父甯殖出其君仲尼修之曰衛侯衍出奔齊臣逐君不可以訓猶召君也杜注謬諸侯失國名公穀皆有衍字左傳脫也

傳執莒公子務婁 徐邈云務莫侯反禮說云務與牟古音同莊子務光荀子作牟光徐音是也

君義嗣也 王肅曰義宜也嫡子嗣國得禮之宜周書曰王義嗣德

蘧伯玉 高誘呂覽注曰伯玉衛大夫蘧莊子無咎之子瑗

諡曰成子

庸知愈乎 司馬彪莊子注曰庸猶何用也

厚成叔 釋文曰厚本或作邱世本曰魯孝公生惠伯革其

後爲厚氏陸淳曰邱成叔孝公八世孫外傳曰魯文公欲

弛邱敬子之宅韋昭云邱敬子魯大夫邱惠伯之後元孫

敬伯同也昭廿五年傳云季邱之難闕徐廣史記注曰一

本作厚世本亦然棟案呂氏春秋有邱成子與右宰穀同

時以傳考之卽厚成叔也厚與邱通世本作厚內傳作邱

禮記又作后左傳或作厚或作邱字異而實同

說文曰厚古作厚从

后土或从高誘曰邱氏惠伯華之後

世本作惠伯革鄭氏禮記注革作鞏高作



華禾詳孰是

以字爲氏因爲郈氏郈成子郈敬子國之子

國疑同字

之誤郈青孫也皆據世本而言然則厚成叔乃敬伯同之子

也

高氏日以字爲氏則郈非采邑古今人表有厚昭伯師古曰卽郈昭伯也

成國不過半天子之軍 高誘呂覽注云成國成于棄之

國也

師曠 王逸楚辭章句曰師曠聖人字子壘生無目而善聽

纂乃祖考無忝乃舊 棟案舊謂祖考之舊法也管子牧民

篇云恭祖舊

詩曰行歸于周萬民所望 服虔曰逸詩也都人士首章有

之康成緇衣注云此詩毛氏有之三家則亡案西漢毛詩

不列于學者故服氏謂之逸詩猶鄭氏尙書古文二十四

篇也

十五年經秋八月丁巳日有食之 隋志曰推合丁巳朔  
傳王及公侯伯子男甸采衛大夫各居其列所謂周行也  
左氏說詩此古訓也詩云古訓是式漢時謂之故訓又謂  
之詁訓詁訓者雅言也魯語曰詩書執禮皆雅言也周之  
古訓仲山式之子之雅言門人記之爾雅以觀于古故又  
謂之爾雅俗儒不信爾雅而仲山之古訓夫子之雅言皆  
不存矣後之學者省諸爾雅釋故釋訓乃周公所作以教  
成王故詩曰古訓是式

十六年傳戰于湛阪 京相璠曰昆陽縣北有蒲城蒲城北  
有湛水者是酈元曰湛水出犍縣北魚齒山西北東南流

歷魚齒山下爲湛浦今水北悉枕翼山阜於父城東南湛水之北山有長阪蓋卽湛水以名阪故有湛阪之名

方城之外 戰國策曰楚不守方城之外高誘曰方城楚塞也外北也

十七年傳遂幽其妻 漢書幽作就

瘕狗 說文引作猘从犬折聲云狂犬也

澤門之哲 詩正義引云皋門之哲陸氏釋文云本或作皋

者誤棟案古皋澤字相同孫叔敖碑云收九罫之利婁壽

以爲澤字但皋爲白下本土刀切罫爲四下本本一字漢碑

从四下芊者誤今馬援傳注亦誤芊服虔漢書注云皋澤也詩鶴鳴

于九皋王仲任薛夫子薛漢父撰韓詩章句皆以爲九折之澤諸侯

本有皋門何獨宋不然也

晏嬰麤衰斬 鄭康成曰麤衰斬者其縷在齊斬之間謂縷如三升半而三升不緝也斬衰以三升爲正微細焉則屬於粗也

唯卿爲大夫 鄭康成曰此平仲之謙辭也言已非大夫故爲父服士服耳王肅聖證論曰喪禮自天子以下無等故曾子云哭泣之哀齊斬之情饘粥之食自天子達且大國之卿與天子上士俱三命故曰一也晉士起大國上卿當天子之士也平仲之言唯卿爲大夫謂諸侯之卿當天子之大夫非謙辭也春秋之時尊者尙輕簡喪服禮制遂壞羣卿專政晏子惡之故服麤衰枕艸於當時爲重是以平

仲云唯卿爲大夫遜辭以避害也杜氏从王說

十八年傳跪而戴之李登聲類曰跪跽也

齊侯禦諸平陰塹防門而守之廣里京相璠曰平陰齊地

也在濟北盧縣故城西南十里

杜氏云在縣東北非也

平陰城南有

長城東至海西至濟河道所由名防門去平陰三里司馬

彪郡國志曰濟北盧縣有平陰城有防門有光里京相璠

曰防門北有光里齊人言廣音與光同杜氏以爲平陰城

南有防防有門於門作塹橫行廣一里皆臆說也

巫山京相璠曰巫山在平陰東北

必旆而疏陳之淮南子曰疏隊而擊之高誘曰疏分也司

馬法曰凡陳行惟疏戰惟密

有班馬之聲注夜遁馬不相見故鳴班別也

棟案班還也

郭璞引作般齊師夜遁馬鳴聲漸遠故云班馬之聲尙書班瑞于羣后史記班作還古字通

戊戌及秦周 子惠子曰呂覽慎大篇曰齊達子帥其餘卒以軍于秦周高誘曰秦周齊城門名也案秦周當是齊地名杜氏以爲魯大夫失之

伐雍門之萩 戰國策孫子謂田忌曰使輕車銳騎衝雍門高誘曰雍門齊西門名也萩鄭元引作萩案王篇音且留切云蒿也當从萩又七肖反釋文云本又作秋

斬其櫛以爲公琴

棟案公琴頌琴也頌與公古字通

焚申池之竹木

淮南子墜形訓曰申池在海隅高誘曰海

隅戴劉逵據以注齊都賦京相璠言申門卽齊城南面第一門外爲申池杜于文十八年傳依京氏爲說非也

以枚數闔注枚馬槓也 案枚猶个也廿一年傳云識其枚數則枚不得爲馬槓

扣馬

呂諶字林曰扣牽馬

史記注

甚雨及之 甚古文湛字見詛楚文莊子天下篇云沐甚雨櫛疾風崔瑗本甚作湛音淫湛雨猶久雨也或云檀弓云雨甚至甚當讀如字亦通

吾驟歌北風又歌南風南風不競多死聲 服虔曰北風夾鐘無射以北南風姑洗南呂以南南律氣不至故死聲多吹律而言歌風者出聲曰歌以律是候氣之管氣則風也

故言歌風

十九年傳先吳壽夢之鼎注以璧馬爲鼎之先 子惠子曰  
馬爲庭實未聞以馬爲先且馬不上堂安得先之先吳鼎  
亦不辭先吳猶言先秦先漢歟

痺疽 玉篇引作疽多但切

作林鐘而銘魯功 呂諶字林曰銘題勒也

亡之道也 唐石經云亡之道也

顏懿姬駸聲姬 杜此注全用服氏服氏又云傳家從後言  
之故舉諡也

諸子注諸妾姓子者 杜亦用服注此當从傳遜說以諸子  
爲內官也



屬諸戎子

服虔曰戎子子牙養也棟案養謂養母也

廢常不祥

服虔曰立長爲祥立而廢之爲不祥也

閒諸侯難

服虔曰閒犯爲光已列於諸侯難成

是專黜諸侯

服虔曰專獨也光比於諸侯列於會盟不可

黜也

而以難犯不祥也

服虔曰以難成之事犯不善

崔杼微逆光

服虔曰微隱匿也棟案哀十六年傳其徒微

之是微爲隱匿也

疾病而立之

服虔曰立爲太子

子孔當罪

鄭康成曰當謂值其罪音丁浪反

問守備焉以無備告揖之乃登

服虔曰彭仲博以爲齊侯

號衛衛慙而下云問守備焉問衛之守高唐者衛無恩信  
故令守者以無備告齊侯善其言故揖之乃命士卒登城  
此說近之棟案經典序錄曰汝南彭汪字仲博說先師奇  
說及舊注又昭廿七年傳云母老子弱是無若我何彭仲  
博云當言是無我若何我母無我當如何我字當在若上  
正義所載惟此二說

廿年傳陳慶虎慶寅 王符曰慶氏媯姓

廿一年經漆閭邱注南平陽縣西北有顯閭亭 闕駟十三  
州記曰山陽南平陽縣有閭邱鄉伍氏從征記曰杜氏謂  
顯閭邱今案漆鄉在縣東北漆鄉東北十里有邱鄉顯閭  
非也

公姑姊 子惠子曰成公同宗之女于公爲姑姊故云公姑姊注及正義皆失考

妬叔虎之母美而不使 唐石經云而不使視寢

二字增論衡

引此傳與石經同

深山大澤實生龍虵 王充曰妖氣生美好故美好之人多

邪惡火有光耀亦有容貌龍虵東方木含火精故美色貌麗膽附於肝故生勇力火氣猛故多勇木剛強故多力也

欒盈過於周周西鄙掠之 唐石經云欒盈奔楚過於周又

一本云欒盈出奔楚過於周周西鄙人略之

得罪于王之守臣注范宣子爲王所命故曰守臣 子惠子

曰守臣指晉君書句同爲上卿書稱陪臣句稱守臣有是

左傳補註卷三  
理乎范氏矯君命逐盈故盈以爲得罪于晉君

使候出諸轅轅 棟案候候人也周禮夏官候人職云若有方治則帥而致于朝及歸送之于竟

臣食其肉而寢處其皮矣 鄭康成曰古者殺牲食其肉坐其皮

左傳補註卷三

春秋左傳補註卷四

廿二年傳焉用聖人 風俗通曰聖者聲也言聞聲知情故  
曰聖家語顏回曰武仲世稱聖人何休膏肓曰說左氏傳  
者春秋之志非聖人孰能修之言夫子聖人乃能修之御  
叔謂臧武仲爲聖人是非獨孔子元箴之曰武仲者述聖  
人之道魯人稱之曰聖今使如晉過御叔御叔不說學見  
武仲而雨行敖之云焉用聖人爲左氏傳載之者非御叔  
不說學不謂武仲聖與孔子同

與執燔焉釋文云燔又作膳 案僖廿四年傳及成十三年  
傳皆作膳說文曰繡宗廟火孰肉从炙番聲春秋傳曰天  
子有事繡焉以饋同姓諸侯此傳燔字當从繡轉寫誤爲

燔耳

執事實重圖之 高誘曰重深

貴而能貧 能猶耐也

未益祿而有馬數十乘 荀卿子曰大功已立士大夫益爵

官人益秩庶人益祿未益祿而有馬士庶同于卿

三日棄疾請尸 周禮掌戮曰凡殺人者肆之三日

廿三年傳禮爲鄰國闕 服虔曰鄰國尙爲之闕樂況甥舅

之國乎顧氏補正用其說而不稱服註

右撫劔 案古制舞劔于左軍禮從右

斐豹 廣韻引作斐甫微切

戊午邵 棟案卽邵晉二邑文六年傳云趙孟殺公子樂于

郛說文曰郛晉邑司馬彪郡國志曰河東垣縣有郛亭張華博物志曰垣縣東九里有郛邵之阨

晏釐 徐邈音來棟案外傳作萊古字通徐音是也

新樽絜之 釋文云本亦作尊又昭十五年傳樽以魯壺釋文云樽本或作尊又作蹲棟案曹憲文字指歸云檢字無此从缶从木者說文云字从酉寸酒官法度也今之尊卑从此得名故尊亦爲君父之稱

禍福無門唯人所召 無門言同一門出入也荀卿子曰禍與福鄰莫知其門管子禁藏篇曰福不擇家禍不索人

美疢不如惡石 服虔曰砭石也戰國策曰扁鵲怒而投其

石高誘曰石砭所以砭彈人癰腫也

砭石見山海經

娶于鑄注鑄國 樂記曰武王未及下車封帝堯之後于祝  
康成云祝或爲鑄高誘曰鑄讀作祝古音通故或作鑄或  
作祝

蓋以其犯門斬關 周禮司盟曰盟萬民之犯命者故孟椒  
欲用之當其罪

季孫用之 疾疢之言驗矣

下妾不得與郊弔 子惠子曰賤者野受弔謂之郊弔所謂  
君遇柩於路使人弔者庶人則然士喪君視斂則郊弔非  
士也注與正義皆失之

不穴於寢廟 子惠子曰廟日祭月祀朝聘饗燕皆行之於  
廟故鼠不穴疏以爲廟幽靜失之



廿四年傳旣歿其言立 高誘呂覽注曰立猶見也

恕思以明德 周書程典曰慎德必躬恕恕以明德李登聲

類曰恕人心度物也

文選

輔躒 說文引作趨釋文曰本又作櫟

部婁無松栢 說文引作附婁云小土山也應劭風俗通曰

部者阜之類也今齊魯之間田中少高卽名之爲部矣周  
伯琦六書正誤畝从自仅聲俗用培塿非

皆踞轉而鼓琴 傳遜曰轉當爲軫棟案文選注引許慎淮  
南子注曰軫轉也或是古軫字有作轉耳方言曰軫謂之  
枕郭璞曰車後橫木

敢問降階何由 君禮臣有降階之儀程鄭下人非所宜問

故云惑也

廿五年經諸侯同盟于重邱 應劭地理風俗記曰安德縣北五十里有重邱鄉故縣也

傳困于石往不濟也據于蒺藜所恃傷也 往不濟謂九四爲石所恃傷謂九二爲蒺藜初至四互未濟故往不濟公拊楹而歌 服虔曰公爲姜氏不知己在外故歌以命之也一曰公自知見欺恐不得出故歌以自悔

陪臣干掇 史記作爭趣棟案左傳掇字亦有作趣者昭廿年傳云賓將掇杜子春注周禮引此作趣史記宋作于趣

徐廣云

後人改爲爭趣非也

掇趣二字古皆从取聲

故君爲社稷死則死之爲社稷亡則亡之 服虔曰謂以公

義爲社稷死亡也如是者臣亦隨之死亡案杜其未完  
若爲己死而爲己亡非其私暱誰敢任之 服虔曰言君自  
以己之私欲取死亡之禍則私近之臣所當任也

南史氏 新序云南史氏是其族也

執簡以往 服虔曰古文篆書一簡八字案齊崔杼弑其君  
光則一簡之文也

四翼 高誘呂覽注曰翼棺飾也畫黼黻之狀如扇於僂邊  
天子八諸侯六大夫四也又淮南子注曰翼狀如今要扇  
畫文插置棺車箱以爲飾多少之差各從其爵命之數也  
翼本作𦏧古文也周禮縫人云衣翼柳之材注云故書翼  
柳作接櫝鄭司農云接讀爲𦏧櫝讀爲柳皆棺飾檀弓曰

周人牆置娶春秋傳曰四翌不蹕先鄭引檀弓作娶引左傳作翌明古文春秋傳本作翌杜氏改爲娶失之矣

當陳隧者 高誘曰隧也司空治軍隧道王肅以爲墓道非也

昔虞闕父 陳球碑作遏高誘曰闕讀曰遏止之遏然則闕遏同音故或作遏也

爲周陶正 王應麟曰有虞氏上陶舜陶河濱器不苦窳周陶正猶以虞闕父爲之

以備三恪 說文引作憲从心客聲敬也義雲章亦以憲爲恪魏封孔羨碑又作恪焦弱侯以爲恪卽古客字未詳

正義熊氏云周之三恪越少昊商辛遠存黃帝者取禮具制作之人故易繫辭云神農氏沒黃帝堯舜氏作

授手于我 手古首字土喪禮云載魚左首進鬻注云古文首爲手成二年經曹公子首公羊作手是字通之證

天子之地一圻 鄭康成引作畿高誘曰方千里爲畿方百里爲同周禮大司馬九近之籍先鄭司農云近當言畿蓋古圻字或作近禮記相近于坎壇王肅讀近爲祈齊侯鍾鐘云用芹眉壽芹本古文近字通爲祈詩有祈父尙書酒誥作圻父鄭康成詩箋云祈圻畿同

書曰慎始而敬終終以不困注逸書 案周書常訓解云慎

微以始而敬終乃不困正義以蔡仲之命云云證之此晉

時僞古文襲左傳而爲之者也

徐幹中論引書云慎始而近終以不困

廿六年傳頌之而已 說文引作頌云低頭也玉篇引杜氏

注亦作鎮又音欽曲頤也列子云巧夫鎮其頤而歌合律  
注云鎮猶搖頭也

子產其將知政矣 呂覽仲冬紀曰申侯伯如鄭三年而知  
鄭國之政高誘曰知猶爲也

乃立囚 子惠子曰立囚爲證也

赤而毛 服虔曰其身色赤而生毛也

平公入夕 服虔曰視夕也

而視之尤 服虔曰尤過也意悅之視之過也

姬納諸御 服虔曰納之平公之御

嬖生佐惡而婉大子痤美而很 服虔曰婉順也佐貌惡心  
順太子貌美而心很很戾不從教案後傳云元公無信多

私不得如服注惡而婉謂內惡而外婉也美而很謂內美而外很也以伊戾之讒慝小人而不爲太子所寵而元公獨嬖寺人柳則二人之賢不肖顯然矣

寺人惠牆伊戾 服虔曰寺人宋閹士惠牆皆發聲實爲伊戾以公寺人爲太子內師掌內官

過宋 服虔曰楚客道過宋

夫不惡女乎 服虔曰夫謂太子伊戾無寵於太子故曰夫不惡女

縱有其其外莫其其內 服虔曰言我內師也當其內使加書徵之 服虔曰以書爲之徵驗也書盟書

欲速 服虔曰速疾也欲疾代公得位故與楚客謀弑其父

也

固聞之 服虔曰固人也久聞太子欲爲亂

唯佐也能免我 佐內惡而外婉太子不知而謂其能免我  
實不然也

左師聞之 服虔曰聞太子與佐期日中

乃縊而死 服虔曰經書宋公殺其世子痤平公用伊戾之  
譖信夫人左師之言世子無罪而死故稱宋公殺罪之也  
左師見夫人之步馬者 廣韻曰駙馬習馬孫愐案左傳步  
馬字不從馬

君夫人氏也 正義曰夫人氏者氏猶家也棟案正義非也  
奔本芮司徒女與宋同姓故不云某氏始言君夫人氏後



言君之妾奔也公羊傳曰宋三世無夫人三世內娶也

君與夫人不善是也唐石經云君與大夫下云君大夫謂椒舉石經是也案林堯叟本仍作夫人知傳譌已久韋昭曰是理也

楚之良在其中軍王族而已唐固國語注云族親族同姓也韋昭曰族謂部屬棟案韋說是也成十六年傳云欒范以其族夾公行劉光伯曰族者屬也非謂公族之兵

欒范易行以誘之鄭衆曰易行中軍與上下軍易卒伍也中軍之卒良故易之賈逵又一說見正義皆勝杜注

廿七年傳皆取其邑而歸諸侯諸侯是以睦於晉劉光伯云晉宋古本皆不重言諸侯則唯謂齊魯宋三國睦耳棟

案不重言諸侯是也謂唯三國睦非也上文云使諸侯僞效烏餘之封者是時三國皆在故下云皆取其邑而歸爲絕句重言諸侯者衍文也

唯卿備百邑注此一棄之邑正義曰一棄之邑每邑方十里棟案熊安生禮記義疏云卿備百邑者鄭志以爲邑方二里與百棄別

欲弭諸侯之兵 弭亦作彌周禮小祝彌敖兵杜子春讀弭如彌兵之彌康成云彌讀如救救安也

仲尼使舉是禮也以爲多文辭 服虔曰以其多文辭故特舉而用之後世謂之孔氏聘辭以孔氏有其辭故傳不復載也此與公羊昭廿五年齊侯唁公于野井以遇禮相見

孔子曰其禮與其辭足觀矣皆仲尼之所取者也

楚氛甚惡 王逸楚辭章句曰氛惡氣也

晉楚爭先 子惠子曰楚人衷甲爲爭先也

以誣道蔽諸侯 陸氏曰服虔王肅董遇竝作弊婢世反云  
踣也正義曰服本作弊云斃踣也一曰罷也棟案蔽與弊  
通昭十四年傳云叔魚蔽罪邢侯周禮大司寇職云以邦  
成弊之鄭衆曰弊之斷其獄訟也是蔽與弊通

何以恤我我其收之 顧炎武云見周頌棟案頌云假以溢  
我說文及廣韻引詩云譏以謚我譏與何音相近伏生尙  
書云維刑之謚哉古文作恤恤慎也故毛傳亦訓謚爲慎

釋詁

今傳作恤與毛傳義合古謚謚字通

莊子齊物曰以言其是也

文云漁本亦作溢古書篆作立心與水相近故恤誤爲漁又爲溢也鄭氏訓爲盈溢失之杜氏訓漁爲憂尤誤說文云譏嘉善也毛傳訓假爲嘉義亦同

齊崔杼生成及彊而寡 墨子辭過篇曰內無拘女外無寡夫又云天下之男多寡無妻女多拘無夫顧炎武案小尔疋云凡無夫無妻通謂之寡

棠無咎 唐石經無作无棟案无字見衛宏古文奇字今易无咎字皆从此釋文云本亦作无

崔宗邑也 案宰相世系表崔氏之先齊丁公之嫡子季子讓國叔乙食采於崔遂爲崔氏故曰宗邑猶晉之曲沃也崔明來奔 宰相世系表曰子明奔魯生長十五世孫意如

爲秦大夫封東萊侯

廿八年傳歲在星紀而注于元枹注星紀在丑斗牛之次元

枹在子虛危之次漢律歷志星紀在子元枹在丑正以

歲星右行于天星紀爲子而貞于丑故在丑其次元枹貞

于丑則在子如是則十二辰皆合樂用焉漢法陽左行

陰右行右行者每退一辰以次爲貞故星紀貞于丑時俗

以星紀爲丑元枹爲子失之合辰合樂本坤  
象喪朋之說

子雅子尾注二子皆惠公孫棟案高誘呂覽注云子雅惠

公之孫公子樂堅之子竈也子尾惠公之孫公子高祈之

子薑也杜氏高氏皆據世本唐時世本已非全書故正義

不詳所出韓非子曰子夏子尾者景公  
之二弟也夏與雅古字通

得慶氏之木百車于莊注六軌之道 下云反陳于獄注云  
獄里名案莊亦里名昭十年傳云又敗諸莊哀六年戰于  
莊孟子曰莊獄之間趙岐曰莊獄齊街里名

樂高陳鮑之徒注樂子雅高子尾 案樂堅高所以字爲氏  
故曰樂高

慶封汜祭 鄭康成讀汜與寔同補鄧反

吳句餘注句餘吳子夷末也 司馬貞曰計餘祭襄十九年  
卒則二十八年賜慶封邑不得是夷末棟案服虔以句餘  
爲餘祭是也

朱方 顧夷吳地記曰朱方秦改曰丹徒

在外不得宰吾一邑 得罪出亡在外則不得宰一邑故下

云恐失富也正義以宰爲益失之

夫民生厚而用利於是乎正德以幅之使無黜嫚 子惠子曰此夏書九歌中三事之義疏也

武王有亂臣十人 唐石經無臣字石經論語亦然又昭廿四年傳引大誓亦無臣字後人皆據晉時所出古文大誓以益之非也辨見論語考

榮成伯 王符曰榮氏魯公族韋昭曰成伯魯大夫聲伯之子名欒

以徵過也 子惠子曰徵讀從楚辭不清徵其然否之徵

廿九年傳璽書追而予之 高誘曰璽讀如移徙之徙印也韋昭曰古者大夫之印亦稱璽璽書璽封書也應劭漢官

儀曰封太山以金泥銀澠印之以璽璽施也信也古者尊卑共之月令曰固封璽春秋傳璽書追而與之是也秦漢以來尊者以爲名乃使避衛宏漢舊儀曰秦已前民皆以金銀銅犀象爲方寸璽各服所好漢以來天子獨稱璽又以玉羣臣莫敢用也棟案璽惟周禮月令及此傳有明文餘無聞焉唐六典引周書曰湯放桀大會諸侯取天子之璽置天子之座云云據此則商以前已有璽名矣

祇見疏也 棟謂疏當爲詭字之誤也呂覽先識篇云無由接而言見詭高誘曰詭讀爲誣妄之誣下云欺其君何必使余明疏爲誣欲之而言叛非誣乎杜氏好改古文故古文古義存者少矣



固辭 鄭康成曰固之言如故也言如故辭者重辭也

注投壺

唐石經云辭固疑非

不尙取之 服虔曰不尙尙也尙當取女叔侯殺之

武獻以下兼國多矣 呂覽曰獻公卽位五年兼國十九

毋寧夫人而焉用老臣 服虔曰毋寧寧也寧自取夫人將

焉用老臣乎劉炫是服說

請觀于周樂 服虔曰周樂魯所受四代之樂

猶未也 賈逵曰言未有雅頌之成功也服同

吾聞衛康叔武公之德如是 賈逵曰康叔遭管叔蔡叔之

難武公罹幽王褒姒之憂故曰康叔武公之德如是

爲之歌王 服虔曰王室當在雅哀微而列在風故國人猶

尊之故稱王猶春秋之王人子惠子曰王者采風畿內故  
有王風周官六詩比賦興風雅頌安得謂王者無風後儒  
以詩亡爲雅亡失之甚矣

其細已甚民弗堪也 服虔曰其風細弱已甚攝乎大國之  
間亡遠慮持久之風故曰民不堪將先亡也

泱泱乎大風也哉 服虔曰泱泱舒緩深遠有大和之意其  
詩風刺辭約而義微體疎而不切故曰大風

國未可量也 服虔曰國之興衰世數長短未可量也

此之謂夏聲 服虔曰與諸夏同風故曰夏聲棟案後世言

秦夏本此

大而婉險而易行

賈逵曰其志大直而有曲體歸中和之

德難成而易行案史記險作儉古文也漢劉修碑云動乎儉中今易作險

則明王也 史記作盟主案古盟字从冏賈侍中說讀與明同嘯堂集古錄載齊侯罍鐘曰繼命于外內之事中敷盟荆盟荆卽明刑也毛詩黃鳥曰此邦之人不可與明箋云明當爲盟釋名盟明也告其事於神明也

怨而不言 王肅曰非不能言畏罪咎也

其周德之衰乎 服虔曰此歎變小雅也自鹿鳴至菁菁者

莪道文武修小政定大亂致大平樂且有儀是爲正小雅陳文王之德武王之功自文王以下至鳧鷖是爲正大雅遷而不淫 服虔曰遷徙也文王徙鄴武王居鄩

若有他樂吾不敢請已 服虔曰周用六代之樂堯曰咸池  
黃帝曰雲門魯受四代下周二等故不舞其二季札知之  
故曰有他樂吾不敢請

子速納邑與政 服虔曰入邑與政職於公不與國家之事  
子惠子曰古者有政便有邑邑者田邑也古祿以田

慎之以禮 服虔曰禮所以經國利社稷也

辨而不德必加於戮 服虔曰辨若鬪辨也夫以辨爭不以  
德居之必加於刑戮也

吾子好直 服虔曰直不能曲撓以從衆

裨諶 古今人表作卑湛師古曰卑音脾湛音諶風俗通曰  
卑氏鄭大夫卑湛之後漢有卑躬爲北地太守杜改卑爲

裨俗又改湛爲湛古文盡亡矣釋文猶作湛

卅年傳正月甲子朔四百有四十五甲子矣其季於今三之一也熊朋來曰魯襄公三十年歲次戊午二月辛酉朔初四日甲子二十三日癸未日其季於今三之一者言甲子數至癸未日正得二十日是三分六十甲子之一也季者餘數也積四百四十四甲子零二十日算得二萬六千六百六十日除五十三日在本年正二月戊午正月大該三十日二月二止有二萬六千六百零七日逆推得絳縣老人是魯文公十一年乙丑歲三月生故曰臣生之歲正月甲子朔注謂夏正月若以周正則三月也本合云七十四年此時方是二月若夏正則十二月故除本年不算曰七十三年

也

亥有二首六身 子惠子曰史趙以亥字推算其年者蓋以  
亥乃絳縣人之名卽孟子之亥唐韓非子言晉平公於唐  
亥云云或孟子傳寫倒其名氏也

或叫于宋大廟曰譖譖出出 叫說文引作訕云大呼也唐

石經作叫傳遜曰說文云譖痛也案說文引傳云譖譖出  
出云譖然从言矣聲說文訓譖爲痛與此傳無涉傳氏非

也

鄭氏周禮注引  
作譖譖訕訕

公焉在 士喪禮曰升公卿大夫繼主人東上鄭注云公大  
國之孤四命也賈疏典命云公之孤四命鄭爲伯爵不應  
言孤但良霄鄭之公族大夫貴重之極比于大國之孤故

家臣尊其主亦號爲公耳

印段 說文作𣪠字子石

介于襄庫 案介甲也取襄庫之甲以入伐襄廿六年齊烏餘襲高魚介其庫注云入高魚之庫而介其甲是也襄廿七年傳云介慶氏之甲

上下有服 高誘曰服法服也君子小人各有制

斗城 案水經注斗城在陳留沙水所經也

吾其與之 高誘曰與猶助也

卅一年傳古之道也 何休膏肓曰若其以下隱桓之禍皆

由此作乃曰古制固亦謬矣鄭箴之曰立長以嫡不以賢固立長矣立予以貴不以長固以貴矣若長均貴均何以

別之故須卜禮有詢立君卜立君是有卜也

是謂不度顏籀曰不度不遵禮度也棟案孝經拔神契云

天子之孝曰就諸侯曰度在戚而有嘉容故謂之不度

猶有童心服虔曰言其無成人之志案士冠禮曰弃尔幼

志順尔成德幼志猶童心也諸侯十二而冠昭公十九年

矣猶有童心故不終

荀子曰天子諸侯十九而冠弃尔幼志今有童心故不終也

高其閤闔注閤門也

匡謬正俗曰下文云門不容車杜元

凱云門庭之內迫迤又有牆垣之限尔正云所以止扉謂

之閤郭景純云門辟旁長櫺也左傳曰高其閤闔案若館

門實高而直庭內迫迤者即當云庭不容車不應云門也

又高爲門戶非關止盜之方文伯所稱不應云以無憂客



使若門得車入則子產止須引車入門何勞壞垣云不可踰越蓋是門旣不大而止扉又高以牢固扞禦寇賊子產爲其不容車入故壞垣耳尋文究理郭說得之

繕完葺牆 李涪刊誤曰案文當云繕字葺牆書云峻字彫牆足以爲比

圻人以時塡館宮室 劉逵引此傳塡作冪云塡也館宮室諸侯傳舍也

天厲不戒 正誤曰天厲注疏及臨川本作天地之天興國本及建本作天闕之天據注當作天然經中有言厲疾天札則天厲亦不爲非姑侯達者

子太叔美秀而文 案說苑政理篇亦載此事蓋本左傳乃

云子太叔善決而文善決訛爲美秀

於孫揮能知四國之爲而辨於其大夫之族姓班位

說苑

政理篇作族姓變立愚案變立即古文班位字也古讀變爲辨辨爲班古文位作立劉歆傳曰春秋傳多古字古言乃知向所據者皆古字也

故委政焉 倉頡篇曰委任之也

文選

令尹似君矣 正義曰服虔云言令尹動作以君儀故云以

君矣服言以君儀者明年傳云二執戈者前矣是用君儀也俗本作似君若云似君不須言矣今定本亦作似君恐非棟案古以字作目與似通故誤作似此條正義見宋槧本故備錄之

衛詩曰 十九年傳歌邶鄘衛季札曰是其衛風乎知邶鄘  
衛皆爲衛詩詩序亦云

紂囚文王七年諸侯皆從之囚 汲郡古文曰帝辛廿三年  
囚西伯于羑里廿九年釋西伯諸侯逆西伯歸于周周書  
程典商王用宗譏震怒無疆諸侯不娛逆諸文王

昭元年傳伍舉爲介 孫叔敖碑作五舉案唐石經初刻亦

作五後改从人非也伍尙伍員字同

古今人表伍子胥亦从人

梁其蹕 孫恂曰梁其蹕魯伯禽子梁其之後

牆之隙壤 韓非子曰牆之壤也必通隙

周有徐奄 案周書周公相天子殷東徐奄从三叔爲亂又

汲郡古文云成王二年奄人徐人及淮夷入于邶以叛賈

景伯杜元凱皆云徐卽淮夷失之

趙孟欲一獻 鄭元曰一獻士飲酒之禮

具五獻之籩豆於幕下注朝聘之制大國之卿五獻 禮記

正義曰卿大夫俱三獻故昭六年傳云得貺不過三獻五獻者亂世之法非禮之正也

大國省檣而用之 周書程典曰生檣省用不濫其度

弁冕端委注弁冕冠也 案釋文云弁端委無冕字石經及

正義皆云弁冕端委說文云覓古弁字冕也故杜訓爲冕冠

弁冕之冕衍文也

子盍亦遠績禹功而大庇民乎 周譜云定王五年河徙故

道及穀雒鬬後河勢愈甚劉子以治河事委趙孟故有是

言齊人城郊晉未聞焉鄭大叔曰晉國不恤宗周之闕是也

諺所謂老將知而毫及之者 大雅抑詩曰借曰未知亦事既毫蓋當時之語云亦然

徐吾犯 廣韻曰鄭公子有食采於徐吾之鄉後以爲氏據此則子南子皙爭同姓以爲室也

及衝擊之以戈 說文引云及衝以戈擊之

將行子南 鄭康成詩箋云行亦放也

下文子將行之同

周公殺管叔而蔡蔡叔注蔡放也 釋文云上蔡字音素葛

反說文作粦从殺下米玉篇云粦粦散也書作蔡字

正義

同漢書宣帝元康三年詔曰骨肉之親粦而不殊稽康琴

賦云新衣翠粲李善云子虛賦翕呬翠粲張揖曰翠粲衣

聲也案子虛賦又作萃蔡愚謂漢書文選粲字皆粲字之

誤粲本與蔡通故又作蔡禹貢曰二百里蔡鄭康成注云

蔡之言殺

鄭注尚書大傳云蔡哀也哀猶殺也

滅殺其賦滅殺者猶末滅也

叔非首謀慮从末滅之科故不殺而囚之如此則不必改

字而義亦得矣

上文云余不女忍殺宥女以遠亦謂从末滅

小余正曰蔡法也

造舟于河

徐堅曰在蒲反夏陽津今蒲津浮橋是其處

鮮不五稔

王充曰王者有過異見於國不改災見草木不

改災見於五穀不改災至身若年穀和孰不至及身而亡

故云鮮不五稔

兩於前伍於後專爲右角參爲左角偏爲前拒

服虔引司

馬法曰五十乘爲兩百二十乘爲伍八十一乘爲專二十  
九乘爲參二十五乘爲偏阮逸謂荀吳用車法雖舍車而  
法在其中服氏之說未可非也

實沈臺駘爲祟 說文曰祟神禍也

曠林 賈逵曰曠大也

遷闕伯於商邱 賈逵曰商邱在漳南

主辰 服虔曰主祀也

及成王滅唐而封太叔焉 史記封作國家鄭世棟案尙書序

云武王旣勝殷邦諸侯又康誥序云以殷餘民邦康叔孔

氏云國康叔爲衛侯此傳依史記當云邦大叔古字邦封

同見書正義漢諱邦改爲國故云國大叔也論語邦域之中今作封域是字同之

驗下文封諸汾川同

宣汾洮 正義曰洮水闕子惠子曰洮卽涑川酈氏以爲涑水一名洮水水出河東聞喜縣黍葭谷俗謂之華谷至周陽與洮水合司馬彪曰洮水出聞喜縣故王莽以縣爲洮亭

山川之神則水旱癘疫之災於是乎禳之日月星辰之神則雪霜風雨之不時於是乎禳之 鄭康成注周禮引此傳

云日月星辰之神則雪霜風雨之不時於是乎禳之山川之神則水旱癘疫之災於是乎禳之賈公彥曰鄭君所讀春秋先日月與賈服不同說文曰禳者設縣繩爲營以禳風雨雪霜水旱癘疫於日月星辰山川也是許君所讀春



秋亦與鄭同

史記所載  
同於服賈

中聲以降 荀卿子曰詩者中聲之所止也楊倞曰詩謂樂章所以節聲音至乎中而止不使流淫也

風淫末疾 賈逵以末疾爲首疾謂風眩也逸周書曰元首曰末易卦初爲本上爲末故上爲首爲角杜據素問以四支爲四末故謂末疾爲四支然不及賈注之當

穀之飛亦爲蠱

釋器云康謂之蠱郭璞曰米皮簸之揚之

康秕在前故云穀之飛外傳云蠱之慝穀之飛實生之

將會孟子餘

史記趙世家云趙夙生共共生孟孟生衰古

今人表云趙孟夙子生衰世本云公明生共共生孟及夙案文

當云共孟及衰史記分共孟爲兩人傳寫之誤孟子餘謂

共孟及衰

甲辰朔烝于溫 服虔曰甲辰朔夏十一月朔也祭人君用

孟月人臣用仲月

二年經叔弓注叔老子 世本曰叔肸生聲伯嬰齊齊生叔

老老生叔弓

傳見易象與魯春秋曰周禮盡在魯矣吾乃今知周公之德

與周之所以王也 古謂易爲象故曰易象九家說卦云

乾爲衣坤爲裳繫曰黃帝堯舜垂衣裳而天下治蓋取諸

乾坤尙書皋陶謨帝曰子欲觀古人之象古人之象卽易

也法乾坤而制衣裳觀象方知故欲觀古人之象古人當

謂黃帝伏羲畫八卦神農重之黃帝通之杜子春以歸藏

爲黃帝易有以也在天成象伏羲法之作八卦故謂之象  
商謂之坤乾周謂之易左氏稱易象猶不失古意觀書于  
太史氏上自易象下至魯春秋中舉周禮而周禮一書于  
宣子口中敘出此左氏行文之妙也周禮爲周公致治之  
書觀周禮故知周公之德易爲聖人贊化育之書故觀易  
象而知周之所以王謂文王也讀者不考周禮一語遂謂  
易象爻辭乃周公所作以實周公之德一語失之遠矣  
季氏有嘉樹焉宣子譽之注譽其好也服虔曰譽游也宣

子游其下夏諺曰一游一譽爲諸侯度今孟子作豫趙岐  
章句曰豫亦遊也春秋傳曰季氏有嘉樹宣子豫焉周易  
序卦曰豫必有隨鄭康成注引孟子吾君不豫以爲證則

知此傳譽字本作豫故服虔互引爲證孫子兵法曰人效死而上能用之雖優游暇譽令猶行也外傳作暇豫李善曰譽與豫古字通

三年經北燕伯欵出奔齊 此與衛侯衎出奔齊一例杜注

謬

傳張趯 宰相世系表曰周宣王時有卿士張仲其後裔事晉爲大夫張侯生老老生趯趯生駘

豆區金鐘 顧氏補正云毛晃曰豆當爲斗後人誤作俎豆之豆用之考工記一獻而三酬則一豆矣豆古斗字棟案考工梓人云爵一升觚三升獻以爵而酬以觚一獻而三酬則一豆矣一獻三酬則十升不得爲四升之豆故鄭注

云豆當爲斗陶人云庾實一觥先鄭云觥讀爲斛觥受三斗聘禮記有斛案聘禮記云十斗曰斛安得云觥受三斗故鄭據旗人云豆實二而成觥則觥受斗二升明觥不得爲斛豆不得爲斗矣

三老凍餒注三老謂上壽中壽下壽皆八十已上不見養遇服虔云三老者工老商老農老棟案杜說是也晉姜鼎銘云保其子孫三壽是利魯頌曰三壽作朋三代養老之法于國老中取三人焉謂之三老于庶老中取五人焉謂之五更

道殣相望 荀悅曰道殣謂之殣亦作堊韋昭依毛傳曰道冢爲堊

女富溢尤 周書酈謀十敗所謂女貨速禍也

君曰不悛以樂悖憂注悖藏也 棟案悖過也言君不思悛

改可憂而樂與日俱悖

謝悖爲過見七詩傳

劉光伯云悖慢也好音

樂而慢易憂禍義亦通

讒鼎之銘 韓非子說林曰齊伐魯索讒鼎魯以其雁往齊

人曰雁也魯人曰眞也是古鼎之名

紀見國紀聞

蓋當時鼎已

在齊故晏子述之

公事有公利無私忌 韓非子曰私怨不入公門一說忌忌

曰故云私忌

小人冀除先人之敝廬 聘禮卿館于大夫游言卿也張趯

大夫也吉送少姜葬館焉故今云冀除先人敝廬舍廟中

故云先人

左傳補註卷四





春秋左傳補註卷五

昭四年傳冀之北土馬之所生 盧毓冀州論曰冀州北接

燕代

初學記

後世謂代爲馬郡故呂覽曰馬郡宜馬

以亨神人注亨通也 亨古文享字杜訓爲通故古文獨存  
新序載此事作享

冬無愆陽 周書時訓曰草木不黃落是爲愆陽

秋無苦雨 服虔曰害物之雨民所苦

夏啟有鈞臺之享 汲郡古文曰夏啟元年帝卽位于夏邑

大饗諸侯于鈞臺歸藏啟筮曰昔夏后啟筮亨神於大陵  
而上鈞臺枚占臯陶曰不吉連山易曰啟筮亨神於大陵  
之上酈元曰卽鈞臺也魏大饗碑云夏啟均臺之亨均古

鈞字亭古亭字

商湯有景亳之命

汲郡古文云帝癸二十八年昆吾氏伐

商商會諸侯于景亳遂征韋商師取韋遂征顧

成有岐陽之蒐

汲郡古文曰成王六年大蒐於岐陽晉語

云昔成王盟諸侯于岐陽楚爲荆蠻置茅蕝設望表與鮮

牟守燎故不與盟

康有豐宮之朝

汲郡古文曰康王元年朝于豐宮服虔曰

豐宮成王廟所在也

穆有塗山之會

汲郡古文曰穆王三十九年會諸侯于塗

山

寡君將墮幣焉

服虔曰墮輸也子惠子曰墮幣謂祭也周

禮肆師大祀用玉帛又守祧藏墮大祝墮釁小祝贊墮特牲少牢又有墮祭然則禮神之幣亦曰墮謂祭後乃相見故曰敢謝後見如服杜解則與上文宗祧之事不相連屬而文亦不順蓋楚之武城有先君之廟也服云將受宋之幣於宗廟謂薦陳之亦可備一說

夏桀爲仍之會有緡叛之 汲郡古文曰帝癸十一年會諸侯于仍有緡氏逃歸遂滅有緡

商紂爲黎之蒐東夷叛之 汲郡古文曰帝辛四年大蒐于黎韓非子曰紂爲黎邱之蒐而戎狄叛之服虔曰黎子姓周幽爲大室之盟戎狄叛之 汲郡古文曰幽王十年春王及諸侯盟于大室明年申人緡人及犬戎入宗周弑王

無或如齊慶封弑其君弱其孤以盟其大夫 呂氏春秋載

此事曰母或如齊慶封弑其君弱其孤以亡其大夫弱其孤謂殺崔成崔彊亡其大夫謂崔杼強而死哀六年傳云不必亡一大夫左氏傳世既久或先秦以來所據本異當以呂覽爲正

鄭子產作邱賦 服虔曰作邱賦者賦此一邱之田出一馬

三牛復古法耳邱賦之法不行久矣今子產復修古法民以爲貪故謗之子惠子曰春秋作邱賦當从服說作邱甲

當从穀梁說

下引詩禮義不愆何恤於人言若依杜注加賦病民何不愆之有服注是也

詩曰禮義不愆何恤於人言 荀卿子載是詩云長夜漫兮

永思騫兮大古之不慢兮禮義之不愆兮何恤人之言兮

愆當作謖从籀文見尔正疏

法于涼注涼薄也

說文曰尔正愆薄也从无京聲廣雅

曰愆禡也曹憲曰良音世人作愆禡之愆水旁著京失之矣禡卽薄字郭忠恕汗簡云古尔正涼作愆

姬在列者注在列國案列位也言姬姓之君僖十五年傳云入而未定列

入棘櫟麻酈元曰汝水東逕櫟亭北春秋之棘櫟也今城在新蔡故城西北半淪水杜預以爲在東北未詳司馬貞曰解者以麻卽襄城縣故麻城是也

曰唯皇侃禮記義疏曰唯謂人應爾是也

饗大夫以落之服虔曰饗以豕爲落

牛謂叔孫見仲而何 正義曰牛謂叔孫曰以仲見君何問  
何故以仲見君其說非是案韓非子載此事云豎牛謂叔  
孫何不見王於君乎叔孫曰孺子何足見也豎牛曰王固  
已數見於君矣君賜之玉環已佩之矣玩傳義與韓非合  
夫子疾病不欲見人 秦越人難經五十一難曰病有欲見  
人者有不欲見人者欲見人者病在府也不欲見人者病  
在藏也府者陽也陽病者欲得寒之又欲見人藏者陰也  
陰病欲得溫又欲閉戶獨處惡聞人聲

牛弗進則置虛命徹 張衡集舊注引傳云牛不進叔孫覆  
器空而還之示君已食蓋增益傳文而爲之或本左氏舊  
說意亦與杜注同也

五年傳毀中軍於施氏成諸臧氏 棟案臧氏爲司寇古者  
兵獄同制故質成于臧氏

葬鮮者自西門 列子曰越東有輒木之國其長子正則鮮  
而食之張湛注引此爲證云鮮謂鮮少也

卿喪自朝注從生存朝覲之正路 服虔云言卿葬三辭於  
朝從朝出正門卿佐國之楨幹君之股肱必過於朝重之  
也案杜臆說當从服氏

旣葬而行注善杜洩能辟禍 唐宰相世系曰杜洩避季平  
子之難奔於楚生大夫綽綽生段段生赫赫爲秦大將軍食  
采於南陽衍世稱爲杜衍

使亂大從注使從於亂 服虔曰使亂大和順之道案從順

也服注是

故有十時亦當十位 古言時皆謂四時此十時謂分一日

爲十時以當王至臺之十位杜注用十二時與傳不合時

據日十二時據辰

明而未融 服虔曰融高也謂日高也

純離爲牛 荀九家序卦曰離爲牝牛

菟氏 酈元曰野兔水上承兔氏亭北野兔陂鄭地也陂水

東北入八里溝溝水南逕右倉城西又南逕兔氏亭東鄭

伯勞屈生於兔氏卽此

子家羈注羈莊公元孫懿伯也 司馬貞曰子家駒魯大夫

仲孫氏之族字懿伯楊倞曰子家羈公子慶之孫歸父之



後名羈字駒案仲孫氏出自桓且懿伯爲子家諡非字也

司馬失之世本云述產子家歸父述與遂古字通楊氏謂羈爲歸

父之後則是桓公元孫非莊公也世本已亡無可是正

索氏 索音柵故水經或作柵

朝聘有珪 案說文珪古文圭

羊舌四族注四族銅鞮伯華叔向叔魚叔虎兄弟四人 案

世本叔向兄弟有季夙故服氏數伯華叔向叔魚季夙正

義以季夙卽叔虎非也叔季兄弟之次且叔虎已死不得

與四族之數劉氏以爲別有季夙而規杜氏其言是也宰

相世系曰羊舌職五子赤肸鮒虎季夙赤字伯華肸字叔

向鮒字叔魚虎字叔羆號羊舌四族

揚胖 漢名臣奏載張衡說云晉大夫食采於揚爲揚氏食

我有罪而揚氏滅揚字从手不从木宰相世系曰晉公族

食邑於羊舌凡三縣一曰銅鞮二曰揚氏三曰平陽

六年傳昔先王議事以制不爲刑辟 李奇曰先議其犯事

議定然後乃斷其罪不爲一成之刑著於鼎也

聳之以行 漢書引此傳作懣晉灼曰古悚字

裴光遠集綴亦以懣爲悚

見汗簡案十九年傳云駟氏聳說文引作懣云懼也从心雙

省聲

說文耳部云生而聳曰從人耳從省聲不得爲懼

因驗左氏古文爲後人竄

易者多矣

商有亂政而作湯刑 汲郡古文曰祖甲二十四年重作湯

刑外傳云元王勤商十有四世帝甲亂之七世而隕祖甲

賢君事見尙書止以改作湯刑故云亂之呂氏春秋孝行覽云商書曰刑三百罪莫大於不孝高誘曰商湯所制法也荀子正名篇云刑名從商康誥云殷罰有倫蓋自祖甲以後刑始頗矣

周有亂政而作九刑注周之衰亦爲刑書謂之九刑案九刑者刑書有九篇成王時所造

見周書

周衰重作之定爲

成科亦若祖甲之作湯刑也

火未出而作火以鑄刑器藏爭辟焉火如

漢書作而

象之不火何

爲古春秋左氏說曰火星出於周五月而鄭以三月作

火鑄鼎刻刑辟書以爲民約是爲刑器爭辟故火星出與五行之火爭明爲災其象然也服氏解誼从其說棟案漢

書五行志許叔重五經異義所載左氏說及古春秋左氏說皆前漢諸儒傳左氏者之言唐人正義以爲賈逵非也顧君補正亦采五行志數條而不言左氏說沒其義矣寡君以爲驪也左氏懽字皆作驪此古文之異者高誘戰國策注云懽猶合也

見於左師子惠子曰向戌與寺人比而害太子華亥與寺人比而逐右師戌亥黨寺人則同而戌之罪浮于亥也戌不思前事而責亥此目睫之論耳其後元公并逐華向有以哉

以其棄鄭氏引良馬八匹私面鄭康成曰面亦見也其謂之面威儀質也又云私面私覲也

主不恩賓 鄭康成曰恩猶辱也杜訓爲患从小尔正

七年傳天子經畧 劉逵曰天子經畧土地定城國制諸侯

畧分界也一曰遠界爲經畧也

願與諸侯落之 庾蔚之禮記畧解曰落謂與賓客燕會以

酒食澆落之

日月以冀 案索隱冀亦作幾讀曰冀

使長鬣者相注鬣須也 說文引作儼云長壯儼儼也子惠

子曰杜訓鬣爲須亦臆說

正義汲冢書瑣語 案御覽備引汲冢瑣語乃其工事非鯨

也

張叔皮論 張姓叔名叔曾作反論引見御覽作皮誤也

傳余敢忘高圉亞圉注二圉周之先也爲殷諸侯亦受殷王  
追命者正義曰二圉之受殷命無文也 子惠子曰二圉  
受命見竹書紀年棟案杜氏此注蓋本汲郡古文外傳云  
高圉大王能帥稷者也周人報焉故服虔注此傳云周人  
不毀其廟報祭之馬融曰周人所報而不立廟杜氏以經  
傳無報亞圉之文故異說

孟僖子病不能禮

今本禮上有相字

下云苟能禮者從之則相字衍

蓋襲

上文相儀之誤當从釋文

聖人有明德者若不當世 王肅曰武仲謂弗父何殷湯之  
後而不繼世爲宋君

或樵悴事國

漢書引此傳作盡顓與詩同如淳曰顓古悴

字

何謂六物對曰歲時日月星辰是謂也 服虔曰歲星之神  
左行于地十二歲而一周時四時也日十日也月十二月  
也星二十八宿也辰十二辰也是爲六物

八年傳或馮焉 子惠子曰漢書引云神或馮焉案注當有  
神字

莫保其性 宋淳化元年本保作信案漢書五行志引此傳  
亦作信顏籀曰信猶保也戰國策甘茂曰以曾子之賢與  
母之信也而三人疑之則慈母不能信也高誘曰信猶保  
也

商衛 子惠子曰宋衛稱商衛踊爲定公諱也昭公事當紀

于定公時也

賓德於遂 世本曰陳舜後宋衷曰虞思之後箕伯直柄中  
衰殷湯封遂於陳以祀舜

自幕至于瞽瞍無違命 賈逵曰幕舜後虞思也至于瞽瞍  
無聞違天命以廢絕鄭衆曰幕舜之先也裴駰从賈侍中  
說杜用先鄭說

九年傳以夷濮西田益之 京相璠曰以夷之濮西田益也  
暴蔑宗周 唐石經及宋本皆如此俗本蔑作滅非

辰在子卯謂之疾日 賈逵曰桀以乙卯亡紂以甲子喪惡  
以爲戒張晏曰云夏殷以亡不推湯武以興此說非也翼  
奉曰北方好行貪狼申子主之東方怒行陰賊亥卯主之



貪狼必待陰賊而後動陰賊必待貪狼而後用二陰竝行  
是以王者忌子卯也禮經避之春秋諱焉孟康曰北方水  
水生於申盛於子東方木木生於亥盛於卯李奇曰北方  
子也卯又陰賊故爲二陰王者忌之不舉樂翼奉又言師  
法用辰不用日甲乙爲日子卯爲辰故云辰在子卯

孟僖子如齊殷聘

大行人職云凡諸侯之邦交歲相問也

殷相聘也鄭氏注云小聘曰問殷中也久無事又於殷朝  
者及而相聘也先鄭引此傳以證之服虔云殷中也自襄  
二十年叔老聘於齊至今積二十年故中復修盛聘之禮  
十年傳邑姜晉之妣也李厚庵曰邾應韓皆無國矣武之  
穆惟晉存故曰邑姜晉之妣也然不自齊者以出于婺女

故推本邑姜

齊惠嬖高氏

棟案惠公子嬖堅高祈後皆爲氏故云嬖高

詳襄廿七年注

正義作子嬖子高蓋  
樂高字堅祈名也

彊於陳鮑氏

余定曰彊當也言其族盛與陳鮑相當值

請斷三尺焉而用之

服虔曰斷三尺使至於較

孤斬焉在衰絰之中注旣葬未卒哭故猶服斬衰

家君曰

預旣葬除喪之說至此乃窮故復作遁辭下云喪禮未畢

如預說則卒哭而喪禮遂畢乎葬與卒哭爲時無幾諸大

夫何不少待

十一年經厥懋釋文云懋魚斬反徐五巾反

棟案公羊作

屈銀是懋讀爲銀徐音是也說文云懋从心𦣻聲又犬部

云欬从犬來聲讀又若銀是古音皆以愁爲銀

傳擇子莫若父擇臣莫若君 管子大匡云鮑叔曰先人有

曰知子莫若父知臣莫若君

五大不在邊五細不在庭 此當用賈逵鄭衆之注

鄭京櫟實殺曼伯注厲公得櫟又并京 案楚語范無宇曰

叔段以京患嚴公鄭幾不封櫟人實使鄭子不得其位明

京屬叔段櫟屬厲公左氏約舊史而爲傳取其文勢之便

兼舉京櫟而單舉曼伯此傳之漏義得櫟并京旣無明文

何必遷就而曲爲之說也

十二年傳司墓之室有當道者 家君云周官墓大夫帥其

屬而巡墓居其中之室以守之故云司墓之室有當道者

請免喪而後聽命

此與下六月葬鄭簡公杜二注繆戾皆

當刪之李厚庵曰未葬而朝晉有是理乎李以傳爲未可  
信棟謂非傳之誤乃杜以免喪之語而移其傳之次也

六月葬鄭簡公

杜注云經書五月誤此謬耳古文左傳當

在齊侯衛侯鄭伯如晉之前鄭伯欲如晉故速葬而往杜  
預欲附會短喪之說而移其次于後耳亂左氏者非預而  
誰

供養三德爲善

董遇注本爲共養解云盡其所以養成三

德棟謂古供字作共董季直本是也訓爲盡共恐未然三  
德謂黃裳元也注亦誤

且可飾乎

漢儒言易以黃裳元吉爲坤五降乾二乾二升

坤五故曰且可飾乎

司馬袞 唐石經作督釋文音篤云本亦作袞棟案督與袞通說文云袞背縫莊子養生云緣督以爲經亦謂背縫也  
方言云繞緇謂之襦掩郭氏云衣督脊也

王孫牟注衛康叔子康伯 世本云衛康伯名髡宋衷曰卽王孫牟也事周康王爲大夫司馬貞曰牟髡聲相近故不同耳譙周古史考無康伯而云子牟伯立蓋以不宜父子俱諡康故因其名曰牟伯也棟案馬融王肅尙書傳皆云康國名在千里之畿內旣滅管叔更封爲衛侯其子始以康爲諡索隱之說未盡然

鍼秘 高誘曰鍼音七

摩厲以須 說文曰摩研也从手麻聲

祇宮 子惠子曰祇宮在南鄭見竹書

祈招之惜惜 韓詩章句曰惜惜和悅兒李登聲類曰惜惜

和靜兒

形民之力 家語作刑案古刑字皆作形王肅曰形以刑傷

民力

十三年傳將欲入鄢 服虔曰鄢別都

卜尹 服虔曰卜尹卜師大夫官

康王跨之 服虔曰兩足各跨璧一邊

再拜皆厭紐 王充曰後共王死招爲康王傳作昭至子失之

圉爲靈王當作

及身而弑子干爲王當作

十有餘日子皙

不立又懼誅死皆絕無後棄疾立竟續楚祀如其神符

城外屬焉 史記云方城外屬焉故杜注云城方城也

苛慝不作釋文云苛音何本或作荷 棟案古苛字本作荷  
檀弓曰泰山婦人曰無苛政釋文曰苛本亦作荷毛詩序  
云哀刑政之荷今本作苛漢書酈食其傳云好荷禮師古  
曰荷與苛同漢張表碑亦以荷爲苛

齊桓晉文不亦是乎 服虔曰皆庶子而出奔

鄭伯男也 董仲舒春秋繁露云周爵五等春秋三等合伯

子男爲一爵故云伯男外傳作伯南古南男字通 公羊

桓十一年鄭忽出奔衛傳云忽何以名春秋伯子男一也

辭無所貶何休云春秋改周之文從殷之質合伯子男爲

子服湫從湫徐邈音椒 案湫本與椒同音說文湫从水秋

聲荀卿子引詩曰鳳凰秋秋其翼若干其聲若簫秋與簫

協韻明秋亦作椒音惠伯名椒獨此作湫者聲之誤也晉

以來唯徐仙民識古諸儒皆不及也

文九年經楚子使椒來聘穀梁椒作萩五

經文字云萩子逢反見穀梁及春秋左氏傳史記伍子胥列傳云夫差二年敗越于夫湫注云湫音椒今傳作椒古

今人表有楚湫舉師古云卽椒舉周語亦作湫舉

及中人注中山望都縣西北有中人城 杜此注本京相璠

春秋土地名酈元謂望都城東有一城名堯始城本無中

山之傳璠或以爲中人未詳張華博物志曰中人在唐縣

西四十里



十四年傳司徒老邗慮癸 當用服虔注

然丹簡上國之兵 鄭康成曰簡謂比數之

收介特注介特單身民也 馬融廣成頌察淫侈之華譽顧

介特之實功注介特謂孤介特立也杜氏以爲單身民非

馬義也

蔽罪邢侯 先鄭引曰弊獄邢侯

耐也鬻獄 周書豐保曰十敗六曰佞說鬻獄韋昭曰鬻賣

也

乃施邢侯 服疑曰施罪於邢侯施猶劾也邢侯亡故劾之

韋昭曰施捕也周禮卿士云辨其獄訟異其死刑之罪而

要之鄭氏云要之爲其罪法之要辭如今劾矣晉語云秦

人殺冀芮而施之韋昭云陳尸曰施愚謂施陳也謂殺而  
陳其罪哀廿七年傳云國人施公孫有山氏是羅泌曰施  
者殺而肆之也內則施羊亦如之施麋施鹿施麇皆如牛  
羊秦施冀芮晉施邢侯與叔魚於市山海經殺而施之晉  
語人從欒氏者大戮施莊子云萇宏施史拖陳餘蓋同也  
開元五經文字作弛云廢亦非

十五年傳吾見赤黑之祲非祭祥也喪氣也 祲說文引作  
禋云精氣感祥从示侵省聲王逸楚辭章句云禋惡氣貌  
韋昭曰寡禋氣象也凶曰氣吉曰祥

叔氏 顏籀曰叔父之使故謂之叔氏

闕鞏之甲 說文引作砮从石巩聲

定四年傳封唐叔以闕砮局

及辛有之二子董之晉 晉語曰秦伯納公子董因迎於河  
韋昭曰因晉大夫周太史辛有之後也引此傳爲證

王一歲而有三年之喪二焉 子惠子曰喪妻三年春秋之

末造也事見墨子棟案墨子公孟篇云子墨子謂公孟子  
曰喪禮君與父母妻後子死三年喪服伯父叔父兄弟期  
族人五月姑姊舅甥皆有數月之喪後子爲後之子猶太  
子也又非儒篇云儒者曰親親有術尊賢有等言親疏尊  
卑之異也其禮曰喪父母三年妻後子三年伯父叔父弟  
兄庶子其戚族人五月若以親疏爲歲月之數則親者多  
而疏者少矣是妻後子與父同也若以尊卑爲歲月數則  
是尊其妻子與父母同而親伯父宗兄而卑子也逆孰大

焉墨子所據喪禮與傳合與喪服傳異喪服傳云父必三年然後娶達子之志也又云爲妻何以期也妻至親也必三年然後娶不得爲三年喪服也且天子絕期安得引以爲證公孟子卽公明儀

三年之喪雖貴遂服注天子諸侯除喪當在卒哭今王旣葬而除故譏其不遂雖貴遂服指后世子之喪若父母之喪無貴賤一也安得爲此抑揚之語乎預邪說亂經孔氏扶非皆不足取

十六年傳幾爲之笑而不陵我當用服注

刑之頗類服虔曰類讀爲類頗偏也類不平也

宣子有環其一在鄭商注玉環同工共朴自共爲雙淮南

子曰元玉同工高誘曰二玉爲一工故云同工昭卅二年傳云賜子家雙琥倉頡篇云雙玉爲珏是共朴也

不亦銳乎注銳細小也正義曰說文云銳芒也鋒芒尖故爲細小言得利小也服虔云銳拆也銳是鋒芒不得爲拆

自說文云至銳拆也二十四字今本脫去宋本有之故備錄焉

執政弗義 高誘戰國策注云弗義不以爲義也

庸次比耦 庸傭也廣雅次比代也言代爲傭代爲耕也

習實爲常 周書曰習實爲常口美惡一也

十七年傳唯正月朔至庶人走 古文左傳說曰正月謂周

六月夏四月正陽純乾之月也愚謂陰爻也冬至陽爻起

初故曰復至建己之月爲純乾無陰爻而陰侵陽爲災重故伐鼓用幣責陰之禮降物素服也不舉去樂也移時避正堂須時移災復也嗇夫掌幣吏庶人其徒役也

少皞氏鳥名官何故也 子惠子曰周書嘗麥曰乃命少皞

清司馬鳥師以正五帝之官昭子見周志有是言而未之詳也故問之棟案史記言黃帝二子其一曰元囂是爲青陽降居江水張衡集條上司馬遷所敘與典籍不合者十餘事其一事曰帝系黃帝產青陽昌意周書曰乃命少皞清即青陽也今宜實定之故世本及春秋緯皆言青陽即是少皞黃帝之子代黃帝而有天下號曰金天氏史記言青陽降居江水不爲帝故張平子正之汲郡古文云或

曰少皞名清不居帝位帥鳥師居西方以鳥紀官蓋本周書之說律歷志引考德曰少昊曰清清者黃帝之子清陽

也

考德者考五德之書也

九扈

說文作雇或作鷦籀文作鴈

請有事於雒與三塗 高誘曰三塗之山陸渾之南故假道於周

蓂宏 淮南子曰蓂宏周室之執數者也天地之氣日月之行風雨之變律歷之數無所不通

天事恒象 先鄭司農曰象謂災變雲物如衆赤鳥之屬有所象似易曰天垂象見吉凶

夏數得天 周書周月曰萬物春生夏長秋收冬藏天地之

正四時之極不易之道夏數得天百王所同商周改正以垂三統至於敬授民時巡守祭享猶自夏焉故易乾鑿度曰三王之郊一用夏正

若火作其四國當之唐石經此下又云六物之占御覽八

百七十五卷所引有此四字蓋據賈服本如此

案石經四字旁增當

是晁公武據蜀石經增入晁曾以蜀石經校唐石經碑中所增疑皆出晁氏之手學者計焉蓋蜀時或服虔左氏猶也存

水火之牡也其以丙子若壬午作乎水火所以合也子惠

子曰水爲夫火爲妻夫從妻所好故以合日爲災

十八年傳毛得以濟侈於王都薛綜曰濟謂度也度於奢

侈謂僭也



是謂融風火之始也注東北曰融風淮南子墜形曰東北曰炎風高誘曰艮氣所生也一曰融風張晏曰融風立春木風也火之母也火所始生也

七日其火作乎張晏曰火以七爲紀

使司寇出新客禁舊客勿出於宮高誘曰有新客搜出之爲觀釁也禁舊客爲露情也

屏攝韋昭曰周氏云屏者并攝主人之位昭謂屏屏風也攝形如要扇皆所以分別尊卑爲祭祀之位近漢亦然先鄭司農曰攝束茅以爲屏祭神之處草易然故巡行之案周氏者漢儒說春秋者周仲文也

祈于四鄺案鄺水庸也

十九年傳許悼公瘧 服虔曰悼公靈公之子許男買瘧寒疾也

書曰弑其君 服虔曰禮醫不三世不使君有疾飲藥臣先嘗之親有疾飲藥子先嘗之公疾未瘳而止進藥雖嘗而不由醫而卒故國史書弑告於諸侯

若大城城父而寔太子焉以通北方王收南方 高誘曰城父楚北境之邑今屬沛國北方宋鄭魯衛也南方謂吳越也

駟氏聳 說文引作𨔵云懼也廣韻引作𨔵詳六年注

諺曰無過亂門 呂覽引詩云無過亂門所以遠之也高誘曰逸詩

沈尹戍注莊王曾孫葉公諸梁父也 王符潛夫論曰左司馬戍者莊王之曾孫也葉公諸梁者戍之第三弟也高誘呂覽注曰沈尹戍莊王之孫沈諸梁葉公子高之父也三說不同

廿年傳自以爲猶宋鄭也 高誘呂覽注曰猶如

其事集矣 高誘曰集合也

棠君尙 風俗通作堂云堂楚邑大夫伍尙爲之其後氏焉

廣韻案堂與棠古字通見魯峻碑

賓將擷 杜子春引作趣讀爲造次之造謂擊鼓夜戒守也

又云趣與造音相近

造與遭同故云與趣音相近

故曰終夕與燎賈公

彥曰賈服讀字與子春異棟案子春受學于劉歆歆傳左

氏春秋以趣爲趣必有據依

史記亦以趣爲趣

賈服後于劉杜唐

人咸所尊尙故不以其說

終夕與於燎

於字衍當从釋文刪古本無於字杜子春注

可據

若琴瑟之專壹

董遇本作搏司馬貞曰搏古專字管子

內業

篇

史記樂書皆以搏爲專

蒲姑氏

亦作薄姑古文通闕駟曰周成王時薄姑與四國

作亂周公滅之以封太公陸澄地理書曰呂尙封於齊郡

薄姑故城在臨菑縣北五十里近濟水

取人于萑苻之澤

唐石經初刻作藿蒲後改萑苻案韓非

子內儲說引此事作藿詩小弁曰萑葦淠淠韓詩作藿

外傳

古字通也

遺愛 賈逵曰愛惠也

廿一年傳天子省風以作樂 應劭曰風土地風俗也有中和之風以作樂然後可移惡風易惡俗也

小者不窕 高誘呂覽注云窕不滿密也

窕則不咸 釋文云本或作咸漢書同唐石經初刻作成後作減愚案咸本古文咸故下云心是以咸从咸爲是也

王心弗堪 漢書作成孟康曰古堪字尙書西伯戡黎說文

引作成郭璞尔正注又作堪黎

釋文本又作成

古文作成堪通詳見

尙書考

張句尤之 小尔正云尤怪也杜訓從之

是何物也注物事也 子惠子曰歲時日月星辰謂之六物  
是何物也謂六物之占當何屬也注未詳

鄭翩願爲鵠 陸佃引舊說江淮謂羣鵠旋飛爲鵠井則鵠  
善旋飛盤薄霄漢與鵠之成列正異故古之陳法或願爲  
鵠也

不死伍乘 衛詩曰死生契濶與子成說鄭箋云從軍之士  
與其伍約死也尉繚子云凡伍臨陳若一人有不進死於  
敵則教者如犯法者之罪

軍之大刑也 周禮條狼氏職曰凡誓執鞭以趣於前且命  
之誓僕右曰殺誓馭曰車轅

廿二年傳盟于稷門之外 劉向別錄曰齊有稷門齊城門

也齊地記曰齊城西門側系水出故曰稷門古側稷音近耳司馬貞云棟案稷齊地名昭十年傳云戰于稷顧炎武曰七國時齊有稷下館

鄆肸伐皇 肸周大夫

水經注作肸

食采于鄆因氏焉說文鄆周

邑

焚諸王城之市

焚如之刑周法也

敗績于前城

服虔曰前讀爲泉周地也京相璠曰今洛陽

西南五十里伊闕外前亭

毀其西南

顧炎武曰唐石經此下有子朝奔郊四字棟案

碑四字非初刻當是晁公武據蜀石經增入非杜本也案

下傳云二師圍郊郊鄆潰杜氏云二邑皆子朝所得是杜

本無奔郊之支

廿三年經狄泉注時在城外 京相璠曰今大倉西南地水  
名狄泉舊說狄泉本在洛陽北莫宏城成周乃繞之  
傳尹辛敗劉師于唐 司馬彪郡國志云洛陽有唐聚  
去備薄威 尉繚子曰兵有去備徹威而勝者以其有法故  
先君之力可濟也 服虔曰獻公亦欲立子猛不欲令子朝  
得國今南宮極震死爲天所弃先君之功事可成也

遼遼注楚地

酈元曰服虔或謂之邑又謂之地京相璠亦

云水際及邊地名也禹貢曰道漢水過三澨春秋傳有句

澨雍澨及此而三

水經注  
作蓬澨

明其伍候注使民有部伍爲候望正義曰賈服王董皆作五



候 賈逵曰五候五方之候也敬授民時四方中央之候也王肅云五候山候林候澤候川候平地候也董遇云五候四方及國中之姦謀也杜作伍候棟案周書程典曰協其三族固其四援明其伍候習其武誠依其山川通其舟車利其守務古伍字皆作五傳本文也杜氏依周書爲說故从人旁

廿四年傳今王室實蠡蠡焉

說文引作蕙蕙云亂也三體

石經作蠡

尙書蠡字說文引作蠡古蠡字皆作蠡俗作蠡

日過分而陽猶不克

孟康曰謂春分後陰多陽少爲不克

陽勝則盛故言甚

王子朝用成周之寶珪于河

漢書曰湛于河釋文云本或

作沈于河

與之東訾注鞏縣西南訾城是也 司馬彪曰縣有東訾聚  
今名訾城王隱晉書地道記曰在縣之東  
吳鍾楚 依說文當作種種相迹也

左傳補註卷五

春秋左傳補註卷六

廿五年經宋公佐卒于曲棘 圈稱陳留志曰外黃於春秋  
爲宋之曲棘里故宋之別都矣

傳天地之經而民實則之 案古文孝經實作是是卽古實  
字見尙書秦誓及詛楚文鄭康成詩箋云趙魏之東寔實  
同聲故此傳又作實

生好物也死惡物也 周書度訓曰凡民之所好惡生物是  
好死物是惡

有鸛鵒來巢書所無也 服虔曰鸛鵒不隮濟今隮宜穴而  
又巢故曰書所無也

吾聞文武之世童謠有之 唐石經作文成謂魯文公成公

時也史記漢書論衡皆作文成舊本左氏傳亦有作成者  
若云周之文武上下數百年豈能逆知童謠爲魯昭徵驗  
乎今本皆作文武俗誤行之久矣

微褰與襦 方言曰袴齊魯之間謂之襦郭璞云傳云微褰  
與襦音騫

郈氏爲之金距 服虔曰金距以金踏距高誘呂覽注云以  
利鐵作鍛距胥其距上胥卽踏也又淮南子注云金距施  
芒于距

郈昭伯 案世本昭伯名惡

臧昭伯之從弟會 賈逵曰昭伯臧伯賜也案世本臧會臧  
頃伯也宣叔許之孫與昭伯爲從父昆弟也司馬貞曰爲

讒于臧氏史記爲作偽

月令云無或作爲淫巧注云今月令無于時作爲爲詐僞左傳僞字

亦有作爲者定十二年傳云子僞不知釋文作爲讀爲僞

拘臧氏老服虔曰老臧氏家之大臣

萬者二人其衆萬於季氏吳仁傑曰淮南書亦云禱于襄廟舞者二人案傳氏言四人爲列尙不成樂况二人乎人當作八傳文誤也

請以五樂亡服虔曰言樂自省約以出

曰入慝作周禮環人察軍慝康成曰慝陰姦也謂軍中有爲慝者

司馬遷戾鄭康成曰大夫家臣爲司馬者

大子樂黃伯思曰祕閣古寶器有宋公絳餽鼎考汲冢師

春書絲乃宋景公名與鼎銘合董道曰竹書有宋景公絲而史爲頭曼孫炎以絲爲頭曼合聲以辨周秦之語則絲爲古文變也

橢枅所以藉幹者 說文引云橢部薦榦云橢部方木也幹脅也

計於季氏 上計也

廿六年傳百兩一布 先鄭云布泉也墨子曰商人用一布布不敢繼苟而讎焉必擇良者

齊子淵捷 王符曰齊子淵氏姜姓

鑿而櫟於它車注鑿一足行正義云說文云鑿金聲也 棟

案說文鑿讀若春秋傳曰鑿而櫟它車則傳本作鑿

五經文字

亦誤作鑿

故杜氏訓爲一足行若从金輕聲與斷足無涉必傳

寫之譌正義失考

女寬 韋昭曰女齊之子叔褒

是亂國而惡君王也 服虔曰廢而不立是謂亂國追惡君

王也

國有外援不可黷也 服虔曰外援謂太子任秦之外孫黷

易也秦爲任外援不可易

奉周之典籍以奔楚 周之典籍盡在楚矣三墳五典八索

九邱左史倚相觀射父讀之而楚檣杌之書頗可觀國語

采之流及屈宋而楚騷比于周雅書之益人如是乎

王愆于厥身 汲郡古文云夷王八年王有疾諸侯祈于山

川王陟

諸侯釋位以閒王政 服虔曰諸侯釋其私政而佐王政案  
閒氣爲臣故云閒

宣王有志 鄭康成周禮注云志古文識有志謂長而有知  
識也王伯厚以爲有撥亂之志恐非外傳曰宣王長而立  
之箴之亂宣王尙少至始有知識乃授之政猶周公復子  
明辟也

賈瀆鬼神 說文引作攢訓與杜同

君無違德 論衡引作回德回邪也與下文回亂合

廿七年傳與吳師遇於窮 京相璠曰今安豐有窮水北入  
淮水經曰淮水又東北窮水入焉注云水出安豐縣窮谷



窮音戎唐石經窮下有谷字酈元所引同正義曰此爲定  
七年敗尹氏于窮谷涉彼而誤非也

左尹郤宛 王符曰郤氏之班有州氏祁氏伯宗以直見殺  
其子州黎奔楚郤宛直而和故爲子常所妬受誅其子嚭  
奔吳爲太宰懲祖禰之行仍正直遇禍也乃爲諂諛而亡  
吳徐廣史記注云伯州犂者晉伯宗之子也伯州犂之子  
曰郤宛郤宛之子曰伯嚭宛亦姓伯又別氏郤司馬貞曰  
郤宛州犂子伯嚭郤宛子伯氏別族案定四年傳云楚之  
殺郤宛也伯氏之族出注云郤宛黨又云伯州犂之孫爲  
吳大宰楚世家云宛之宗姓伯氏子嚭則嚭乃宛之族也  
與左傳合王符徐廣司馬貞皆以爲郤宛子非也韋昭又

以爲伯州犁子尤誤趙長君又以卻宛卽伯州犁

此時也服虔曰時言可殺王時也

不索何獲服虔曰不索當何時得也

我王嗣也注光吳王諸樊子也故曰我王嗣正義曰吳世

家云餘昧之子僚公子光者王諸樊之子公羊云云世本

云夷昧及僚夷昧生光服虔云夷昧生光而廢之僚者夷

昧之庶兄夷昧卒僚代立故光曰我王嗣也是用公羊爲

說也杜言光吳王諸樊子用史記爲說也棟案司馬遷

採世本爲史記然亦有旁采諸國之書不與世本左傳合

者今以左傳證之服氏之說是也襄公卅一年傳吳屈狐

庸曰若夫所啟其在今嗣君乎有吳國者必此君之子孫

實終之注云嗣君謂夷昧則光夷昧之子審矣世本左傳本出一人之手正義以世本多誤不足依馮豈其然乎

母老子弱是無若我何 正義曰彭仲博云當言是無我若何我母無我當如何我字當在若上 案彭注說唐時已亡此當采自服氏解誼

王使甲坐於道 荀卿子曰庶士介而坐道楊倞曰庶士軍士也介而坐道被甲坐於道側以禦非常

鉞交於胷 唐石經初刻作匈古文胷

以待天命 服虔曰待其天命之終也

不足以辱令尹 高誘呂覽注曰辱屈辱也

吾無以酬之 高誘曰酬報也

或取一秉秆焉 秆說文引作桿或从干

邇無極也 邇讀爲爾燕禮曰公南鄉爾卿爾大夫鄭注云

爾近也移也揖而移之近之也

使宰獻而請安注比公于大夫也 案管子幼官篇云三千

里之外諸侯世一至置大夫以爲廷安齊君飲昭公酒故

使宰獻而仍用廷安之禮非卑公也杜氏以爲比公于大

夫失之

廿八年傳慙使吾君聞勝與臧之死也以爲快注慙發語之

音 棟案慙願也言鈞死耳願使吾君先聞二人之死以

爲快注言發語音非外傳云吾慙置之於耳以慙御人又

云慙庇州犁韋昭皆訓爲願大夫稱主今稱君者蓋其臣

三世仕於祁氏矣詩云不懋遺一老箋云懋者心不欲自  
彊之辭也釋文云懋亦足願也強也且也韓詩云懋闇也  
懋讀爲銀與寧同音又讀爲甯古  
寧甯同字說文寧與甯皆訓爲願

其母欲取其黨 案論衡叔向之母姬姓

吾懲舅氏矣 列子曰北山愚公懲山北之塞出入之迂注  
韓詩外傳云懲苦也

樂正后夔取之 伏生書大傳曰樂正定樂名八伯貢樂九  
奏具成則自唐虞已有樂正之名尙書不詳耳

成鱣曰昔武王克商光有天下其兄弟之國者十有五人姬  
姓之國者四十人 案荀子以爲天下立七十一國姬姓  
獨居五十三人與此異也

心能制義曰度 服虔曰心能制事使得其宜言善揆度事也棟案自此至經緯天地曰文皆見周書諡法惟闕曰莫曰君張守節所引諡法云賞慶刑威曰君孔晁注云能行四者德正應和曰莫注云正其德應其和

德正應和曰莫 服虔曰在己爲德施行爲正發號施令天下皆應和之言皆莫然無謹譁也

照臨四方曰明 服虔曰豫見安危也

教誨不倦曰長 服虔曰教誨人以善不懈倦言善長以道德也

慈和徧服曰順 服虔曰上愛下曰慈和中和也爲上而愛下行之以中和天下徧服從而順之

擇善而從之曰比 服虔曰比方損益古今之宜而從之

經緯大地曰文 服虔曰德能經緯順從天地之道故曰文

閻沒 韋昭曰閻沒閻明

不夕食 服虔曰昨顧酒醉故不夕食案二人謂昨不夕食

故始饋而恐不足耳杜注不及服氏之分明

厭而已 韋昭曰屬適也厭飽也已止也適小飽足則自

節止

廿九年傳主君 服虔曰大夫稱主

豢龍氏御龍氏 賈逵曰豢養也穀食曰豢

乃擾畜龍 應劭曰擾音柔擾馴也能順養得其嗜慾案玉

篇擾當作擾

尙書擾而穀條廣曰擾一作柔字本作擾音柔今人字與音皆失之廣雅曰馴擾也

其後有劉累

後古文作后服虔曰后劉累之爲諸侯者夏

后賜之姓

以更豕韋之後

史記更作受

夏本紀

周禮巾車云歲時受讀

杜子春云受當爲更儀禮燕禮及大射儀注皆云古文更

爲受是更與受古今字也

汲郡古文云孔甲元年廢豕韋氏使劉累祭龍

魯縣

汲郡古文曰孔甲七年劉累遷於魯陽班固曰南陽

魯陽縣有魯山古魯縣御龍氏所遷

遂濟窮桑

服虔曰濟渡也言四叔子孫世不失職遂渡少

皞之世

遂賦晉國一鼓鐵以鑄刑鼎

服虔曰鼓量名也曲禮曰獻

米者操量鼓取晉國一鼓鐵以鑄之禮記音義隱義曰東



海樂浪人呼容十二石者爲鼓以量米王肅曰三十斤謂之鈞鈞四謂之石石四謂之鼓與隱義合顧氏云蓋用四百八十斤鐵

卅一年傳十二月辛亥朔日有食之是夜也趙簡子夢童子羸而轉以歌旦占諸史墨曰吾夢如是今而日食何也對曰六年及此月也吳其入郢乎終亦弗克入郢必以庚辰日月在辰尾庚午之日始有謫火勝金故弗克服虔曰是歲歲在析木後六年在太梁太梁水宗十一月日在星紀爲吳國分楚之先顓頊之子老童童子楚象行歌象楚走哭姬姓日日在星紀星紀之分姬姓吳也楚衰則吳得志吳世世與楚怨楚走去其國故曰吳其人郢吳屬水

水數六十月水位故曰六年及此月也有適而食故知吳終亦不克後六年定四年十一月閏餘十七閏在四月後其十一月晦庚辰吳入郢在立冬後復此月也十二月辛亥日會月於龍尾而食庚午日初有適故曰庚辰一曰日月在辰尾尾爲亡臣是歲吳始用子胥之謀以伐楚故天垂象午火庚金也火當勝金而反有適故爲不克晉諸侯之霸與楚同盟趙簡子爲執政之卿遠夷將伐同盟日應之食故夢發簡子 周禮占夢職以日月星辰占六夢之吉凶鄭注云日月星辰謂日月之行及合辰所在春秋昭三十一年史墨云云此以日月星辰占夢者其術則今八會其遺象也鄭志張逸問占夢注云云不知何術占之前

問不了

前問載鄭志今無考

答曰日月在辰尾夏之九月辰在房末

有尾星建戌厭寅

建戌則辰在卯寅與申對辰與戌對

對猶

衡也申近庚

孝經援神契曰斗指申處暑指庚白露敢知申近庚

辰與戌對故知庚辰

辰下爲主人故知爲主人

翼奉曰辰爲客時爲主人

金侵火故不勝雖

不勝卽復故云弗克日有適氣時九月節者以庚午在甲

子篇辛亥在甲辰篇也

古五子書每甲爲一篇也

中有甲戌甲申甲午

成一月也從庚午以下四日從甲辰至辛亥八日并之十

二日通同四十二日如是庚午之日當在八月十九日故

言時得九月節也言雖不勝卽復者以其庚金午火位相

連故云雖不勝卽復也言雖不勝者吳君臣爭宮秦救復

至不能定楚是其不勝不能損吳是明卽復也問曰何知

有此厭對之義乎答曰按堪輿黃帝問天老事云

藝文志堪輿金

四卷

十四月陽建於巳破於亥

巳亥爲建爲破

陰建於未破於癸

是爲陽破陰陰破陽故四月有癸亥爲陰陽交會十月丁

巳爲陰陽交會言未破癸者卽是未與丑對而近癸也

援神

契曰斗指癸小寒指丑大寒故知丑近癸爲未所破也

交會惟有四月十月也若有

變異之時十二月皆有建厭對配之義也問曰周之十二

月夏之十月日體正應在析木而云在星紀何答曰據此

月中有十一月節

析木十一月星紀十一月

故舉言之成長以爲誤也

賈公彥曰今八會其遺象者按堪輿大會有八小會亦

有八賈不疏八會者賈蓋據鄭志唐時堪輿已亡故不詳

也案越絕書言太歲八會淮南天文曰北斗之神有雌雄

十一月始建於子月從一辰雄左行雌右行五月合午謀

刑十一月合子謀德太陰所居辰爲厭日

雄爲建雌爲厭厭在日前一次

謂之陰建

厭日不可以舉百事堪輿徐行雄以音知雌故爲奇

辰數從甲子始子母相求所合之處爲合十日十二辰周

六十日凡八合合於歲前則死亡合於歲後則無殃卽八

會法也蓋六十日之中大合八小合八

詳禮說

卅二年傳史墨曰不及四十年越其有吳乎越得歲而吳伐

之必受其凶

服虔曰歲在星紀吳越之分野蔡復之歲

歲在大會距此十九年昭十五年有事於武宮之歲龍度

天門龍歲星也天門在戌是歲越過故使今年越得歲龍

東方宿天德之貴神其所在之國兵必昌向之以兵則凶

吳越同次吳先舉兵故凶也或歲星在越分中故云得歲  
史墨知不及四十年越有吳者以其歲星十二年一周天  
存亡之數不過三紀三者天地人之數故歲星三周星紀  
至元枹哀二十二年越滅吳至此三十八年

遲速衰序注衰差也

案襄廿九年正義云衰者差也九章

算術謂差分爲衰分是衰與差通故訓衰爲差土冠禮記  
云以官爵人德之殺也注云殺猶衰也亦以衰爲差

定二年傳闔乞肉焉

子惠子曰諸侯燕禮賓醉而出必取

所薦脯重君賜也以所執脯賜鐘人于門內霑廣君惠也  
夷射姑私出無脯奪杖敲闔無禮甚矣

三年傳闔以餅水沃廷

韓非子云捐水郎門雷下類溺者

之狀

有兩肅爽馬

子惠子曰當用賈逵注載見正義漢注多舊

典遺言杜預盡去之而益以臆說正義所載者千百之十

一而已

四年經許遷于容城

地理志南郡華容縣應劭曰春秋許

遷于容城是

戰于柏舉

高誘呂覽注云柏舉楚鄢邑京相璠曰柏舉漢

東地夏有汨水或作舉疑卽此也

柏二傳皆作伯郭璞

穆天子傳注云古伯字多从木

傳社稷不動

劉炫以社稷動爲軍行是也杜注非

君以軍行被社稷鼓

案卽周禮大祝所謂設軍社也

夏后氏之璜

高誘曰半圭曰璜夏后氏之珍玉也

封父之繁弱

鄭康成曰封父國名荀卿子曰繁弱鉅泰古

之良弓也繁亦作蕃古字通上林賦云彎繁弱文穎曰蕃

弱夏后氏良弓之名

備物典策釋文云本又作冊或作箒

說文云冊符命也諸

侯進受於王也象其札一長一短中有二編之形古文作

箒从竹今作策从俗

命以伯禽

當用劉炫說伯禽唐詒百篇不載封伯禽事別

見洛誥唐叔有歸禾故皆不載也

孔子刪書亦用春秋一書不再書之例

管蔡啟商甚聞王室注甚毒也

棟案甚當訓爲教

宣十二年注訓

甚爲教

言管蔡開商叛周之心而教之藥間以圖王室張衡



西京賦云天啟其心人憇之謀與傳意合左傳憇字凡四見宣十二年傳楚人憇之當依說文作𢇛哀元年傳少康憇澆當訓爲毒說文云憇毒也廿七年傳趙襄子憇知伯當訓爲忌小余正云憇忌也此傳當訓爲教小余正云憇教也杜唯哀元年注得之餘皆非也

無始亂 賈逵曰無爲亂始

還塞大隧直轅冥阨 案冥阨九塞之一高誘曰在楚史記

蘇秦傳云塞鄢阨徐廣曰鄢江夏鄢縣棟謂鄢阨卽冥阨

也墨子非攻篇曰吳闔閭次注林出於冥隘之徑隘卽阨傳亦作

隘戰於柏舉中楚國而朝當子常不從司馬之計濟漢轉

戰至於柏舉其時吳已出隘而西楚事不可爲矣

季辛卑我 當用服虔注

申包胥 服虔曰楚大夫王孫包胥

封豕長蛇 高誘曰封大也豕蛇喻貪也

虐始於楚 高誘曰虐害也始先也言將以次至秦也

五年傳陽虎將以璵璠斂 高誘曰璵璠君佩玉也昭公在

外平子行君事入宗廟佩璵璠故用之正義曰璵璠是一

玉名案說文孔子曰美哉璵璠遠而望之奐若也近而視

之瑟若也一則理勝一則字勝明是兩玉正義非也

改步改玉 周語襄王謂晉文公曰先民有言曰改玉改行

韋昭曰玉佩玉所以節行步也君臣尊卑遲速有節案荀

子王霸篇云國者世所以新者也是憚憚非變也改王改

行也與周語同是玉從古文作王成二年齊侯朝于晉將授玉玉本作王故張平子誤以爲尊晉侯爲王乃知古文春秋玉字皆作王也

公山不狃 王符曰公山氏魯公族姬姓

奔楚爲堂谿氏 王符曰堂谿谿名在西平司馬彪郡國志云汝南吳房有堂谿亭廣韻引作棠古字通

藍尹亶涉其帑 廣韻引世本云楚大夫涉其帑則亶帑爲二人然外傳云載其孥則孥非人名未知世本何據

六年經仲孫忌 賈逵曰公羊曰仲孫何忌公羊疏云賈經無何字案下經云仲孫忌當無何字

傳小帷子 呂覽云小帷子陸氏釋文云本又作帷

八年傳士皆坐列

案坐謂坐作列謂表正行列

司馬法云徒以坐固

又云行慎行列

吾志其目也

鄭康成云志意所擬度也商書曰若射之有

志

主人焚衝

高誘淮南子注曰衝車大鐵著其轅端馬被甲

車被兵所以衝於敵城也

或濡馬褐以救之注馬褐馬衣

高誘淮南子注曰褐毛布

如今之馬衣

揆衛侯之手及挽

說文云揆推也挽唐石經初刻从定本

後作腕腕俗字也經傳皆作擊郊祀志云海上燕齊之間

莫不搯擊游俠傳云搯擊而游談師古曰擊古手腕字說

文曰擊手擊也从手収聲今傳作挽者儀禮士喪禮云設

決麗于擊

今作擊字之誤

鄭康成注云古文擊作挽史記樊於期

偏袒搯挽索隱曰挽古腕字史記多古文今人知者鮮矣

高誘呂覽注云擊讀如捲挽之挽

戒都車

案戒讀爲駮鄭康成云疾雷擊鼓曰駮易歸藏曰

君子戒車小人戒徒

林楚怒馬

高誘曰怒讀如强弩之弩方言曰弩猶怒也匡

謬正俗曰怒字古讀有二音今山東河北人讀書但知怒

有去聲不言本有二讀曾不尋究失其真矣

子言辨舍爵

辨古文徧

陽虎入于謹陽關以叛

謹應劭引作鄆云今泰山鉅平縣

陽關亭是也

九年傳茲陽貨所欲傾覆也 韓非子載其語曰陽虎有寵於季氏而欲伐季孫貪其家也今君富於季而齊大於魯陽貨所以盡詐也

蔥靈 賈逵云蔥靈衣車也尙書大傳云未命爲士不得有飛輪鄭康成注云如今窻車也輪與靈古字通

趙氏其世有亂乎 此語非實事春秋後事左氏不及知故云然案韓非子曰陽貨逐於魯疑於齊走而之趙趙簡王迎而相之左右曰虎善竊人國政何故相也簡王曰陽貨務取之我務守之遂執術而御之陽貨不敢爲非以善事簡王與王之強幾至於霸也

吾從子如驂之靳毛詩小戎云游環脅驅傳云游環靳環也沈重曰靳者言無常處游在驂馬背上以驂馬外轡貫之以止驂之出猛蓋言靳所以輔驂非相違也而相從也何仇難之有

龜焦焦說文引作𪔐云龜𪔐不兆𪔐讀若焦

哀二年龜𪔐同

皙幘傅遜曰皙白皙幘以巾髮卑賤所服此說非也古者有冠無幘秦漢以來始有其制此傳幘字說文引作𪔐云齒相值也故杜訓從之古省或以幘爲𪔐

衣狸製注製裘也子惠子曰說苑吳赤市使於智氏假道於衛甯文子具紵絺三百製將以送之左傳狸製注云裘此云紵絺非裘也乃衣耳裘名爲製不見經傳疑杜注誤

棟案傳曰狸製故注云裘謂狸裘也哀廿七年陳成子救鄭及濮雨成子衣製杖戈注云製雨衣也杜皆望文爲義然以製爲裘似有脫文

十年經鄆謹龜陰田 服虔曰三田汶陽田也龜山名陰之田得其田不得其山也

傳步左右皆至 劉熙曰徐行曰步步捕也如有所伺捕務安詳也

叔孫氏之甲有物注物識也 周禮閭人職云潛服賊器不入宮注云賊器盜賊之任器兵物皆有刻識棟案刻識之語出于漢時梁冀傳云刻其毛以爲識是也

十二年傳登武子之臺 酈元曰曲阜上有季氏宅宅有武



子臺王肅曰季孫宿所築

十三年傳歸告其父兄 服虔曰午之諸父兄及邯鄲中長老

戊也驕注戊文子之子 世本曰衛獻公生成子當當生文

子拔

傳作發

拔生朱爲公叔氏鄭康成云朱春秋作戊

十四年傳使死士 戰國策蘇秦曰厚養死士高誘曰死士  
勇戰之士也先鄭司農曰死士欲以死報恩者大公六韜  
曰有貧窮忿怒欲快其志者聚爲一卒名曰必死之士賈  
景伯以死士爲死罪人非也

哀元年傳如子西之素 案功命曰謂之素宣十一年令尹  
爲艾獵城沂三旬而成不愆于素是也

蔡人男女以辨 辨讀曰班徐廣史記注曰辨音班漢書王莽傳辨社諸侯義作班襄廿五年傳云男女以班賂晉侯劉炫曰哀元年蔡人男女以辨與此同士虞禮曰明日以其班祔鄭康成云古文班或爲辨是辨爲古文班也

敗越于夫椒 賈逵曰夫椒越地杜氏云夫椒吳縣西南大湖中椒山司馬貞曰賈說得之杜以爲大湖椒山非戰所夫椒與椒不得一旦夫差以報越爲志又伐越當在越地何乃不離吳境近在大湖中又案越語云敗五湖也

大夫種 高誘曰大夫種姓文字會楚鄣人

樹德莫如滋去疾莫如盡 戰國策引書曰樹德莫如滋除害莫如盡今在大誓與此異

滅夏后相 汲郡古文曰帝相九年居於斟灌廿六年寒浞使其子澆帥師滅斟灌廿八年寒浞使其子澆弑帝公羊傳云君死于位曰滅

生少康焉 服虔曰后緡遺腹子

而邑諸綸 司馬彪郡國志曰梁國虞縣有綸城少康邑

以收夏衆撫其官職 服虔曰引此基業稍收取夏遺民餘衆撫修夏之故官憲典

祀夏配天不失舊物 服虔曰以鯀配天也物職也

注猶言天與不取 漢書蕭何曰書云天與不取反受其咎欲與楚者右 此與絳侯右袒意同懷公意欲從吳故使與

楚者右

在軍熟食者分而後敢食 案劉向說苑載此事云在軍食孰者半而後食故服虔注云以其半分軍士而後自食其餘若簞醪注流也公羊傳曰師喪分焉分亦訓半杜訓爲徧古訓之亡自杜始

二年傳郢不足以辱社稷 服虔曰郢自謂己無德不足立以汚辱社稷

八人衰絰僞自衛逆者 服虔曰衰絰爲若從衛來迎太子也較杜注爲明

上大夫受縣下大夫受郡 周書作雒曰國方千里分以百縣縣有四郡郡有四鄙高誘曰周制天子地方千里分爲百縣縣有四郡郡有四鄙故言上大夫受縣下大夫受郡

周時縣大郡小秦始皇兼天下初置三十六郡以監縣耳  
志父注志父趙簡子之一名也杜意言趙鞅一名志父今  
俗本作改名誤

桐棺三寸不設屬辟荀卿子曰罪人之葬棺槨三寸衣衾  
三領不得飾棺鄭元引此傳作屬棊

樸馬荀卿子云若馭樸馬楊倞曰未調習之馬

羅無勇麋之

廣韻引作麋

八年傳云及路麋之注云麋亦束縛疑麋麋字通

無折骨無面傷

鄭仲師引云無破骨無面夷案外傳晉惠

公韓之誓曰將止無面夷死此求勝之辭故云無面夷

大命不敢請

晉語曰死不敢請韋昭曰言不敢請歸之神

也

三年傳鬱攸從之 尔正曰鬱氣也攸所也火氣出之所也  
襄九年傳云奔火所杜注欠分明

命藏象魏曰舊章不可忘也 服虔曰象闕也法令縣之朝  
謂其書爲象魏案象魏六官所縣之象如治政教刑之類  
繪爲圖象唐虞所謂畫象是也此說本程大昌棟案風俗  
通云光武中興以來五曹詔書題鄉亭壁歲補正多有闕  
謬永建中兗州刺史過翔箋撰卷別改著版上一勞而久  
逸漢之五曹猶周之六官又漢時教令皆奏可施行尙書  
掌之故謂之五曹詔書亦見應劭傳

拾藩汪藩汁也 釋名曰宋魯人皆謂汁爲藩高誘引作潘  
四年傳諸大夫恐其又遷也承注承音懲蓋楚言正義曰懲

創往年之遷也 棟謂承讀爲懲經傳無文詩魯頌曰戎狄是應荆荼是徵則莫我敢承毛傳曰承止也傳言承者謂諸大夫皆欲止之也

五年傳范氏之臣王生惡張柳朔 墨子所染篇云范吉射染於長柳朔王胜王胜卽王生也古張字省作長見楚相孫叔敖碑此古文也

齊燕姬 服虔曰燕姬齊景公之嫡夫人昭七年燕人所歸諸子鬻嬖之子 服虔曰諸子諸公子鬻嬖景公妾淳于人所納案諸子內官傅氏遜據管子辨正杜沿服氏之譌耳淳于人所納未詳所出

諸大夫恐其爲子也言於公曰君之齒長矣未有太子若之

何服虔曰爲子爲太子也荼少故恐立之言君長未有太子一旦不諱當若之何欲齊侯早立長也案今本爲子作爲太子疑後人所增杜無注或杜所增也

二三子閒於憂虞則有疾疾亦姑謀樂何憂於無君服虔曰言二三子當國家閒暇無憂虞恐疾疹在其間今無疹疾何爲不自謀樂何憂無君乎

賓羣公子於萊服虔曰賓置萊齊東鄙邑欲使遠齊

萊人歌之曰景公死乎不與埋三軍之事乎不與謀師乎師乎何黨之乎服虔曰萊人見五公子遠遷鄙邑不得與景公葬埋之事及國三軍之謀故愍而歌師衆也黨所也言公子徒衆何所適也



六年傳楚子使問諸周太史 服虔曰諸侯皆有太史主周  
所賜典籍故曰周太史一曰是時往問周太史棟案楚靈  
王言齊衛晉魯皆有分而楚獨無有則楚不當有周所賜  
典籍蓋自王子朝奉周之典籍以奔楚是時當有掌典籍  
之太史從子朝奔楚楚子在外而使問周太史也

三代命祀祭不越望 服虔曰謂所受王命祀其國中山川

爲望

冀方 高誘淮南子注曰冀九州中謂今四海之內穀梁傳  
曰鄭同姓之國也在乎冀州詳顧炎武日知錄

闕止 案呂覽以闕止爲宰子高誘曰宰子字子我史記亦  
言宰我與田常作亂皆秦漢人相傳之語未必然也

以安孺子如賴 古今人表作晏孺子晏與安古文通今文  
尚書欽明文塞晏晏今尚書文思安安司馬彪曰濟南管  
縣有賴亭

君大訪於陳子而圖其小 子惠子曰必欲殺孺子而先以  
政授陳子此齊之所以亡也一言喪邦朱毛之謂

七年傳執玉帛者萬國今其存者無數十焉 戰國策顏觸  
曰大禹之時諸侯萬國及湯之時諸侯三千今乃二十四  
邾茅夷鴻以束帛來封自請救於吳 告請者無庭實此云  
棄韋者賈公彥曰求救非法故有棄韋爲庭實也

社宮 鄭衆曰社宮中有室屋者

乃背晉而奸宋 賈逵曰以小加大

八年傳所託也則隱 所託也者謂所寄託之國則隱者隱  
本國之惡也杜注不明

魯雖無與立必有與斃 國於天地必有與立魯無與立言  
弱也必有與斃言公賓庚之屬

拘鄆人之漚管者 鄭康成注考工記引作漚管釋文漚烏  
豆反與漚同是漚爲古文漚也

何故使吾水滋 說文引作茲云黑也釋文云本又作茲  
景伯負載 鄭元詩箋云載猶戴也謂負戴器物劉光伯說  
是也

梓之以棘 說文曰以柴木槩也从木存聲本又作存釋文  
作荐音在薦反非也

遂殺之 悼公弱安能殺鮑子必陳乞之謀也陳乞所畏者  
鮑高國耳乞既除高國所畏者鮑氏耳故希公意并除之  
而後行篡弑以并齊耳有馬千乘之言亦乞所構

十年傳吳子三日哭于軍門之外 服虔曰諸侯相臨之禮  
十一年傳黨氏之溝 黨氏魯大夫猶云子駒之門也

注有子冉求也 正誤曰論語冉求稱冉子有若稱有子冉  
求字有亦稱冉有二者必有一誤春秋權衡曰案有子當  
爲子有子有者冉求字也仲尼門人字多云子某者不得  
云有子也傳寫誤之矣

見保者而泣 王肅曰保縣邑小城也案晉語尹鐸曰抑爲  
保障乎韋昭曰小城曰保禮記曰遇入保者

後世作堡

壤地同而有欲於我 呂覽載子胥語曰夫吳之與越接土  
鄰境壤交通屬習俗同言語通我得其地能處之得其民  
能使之越于我亦然故云有欲於我

得志於齊猶獲石田也無所用之 呂覽載子胥語曰夫齊  
之於吳也習俗不同言語不通我得其地不能處得其民  
不得使故謂之石田也

鳥則擇木 服虔曰鳥喻已木以喻所之國

如是則以邱亦足矣 邱賦作於前故云以邱亦足矣

十二年傳吳人藩衛侯之舍注藩籬 案杜注非也藩藩盾

扶胥之屬名爲宿衛實困之也

效夷言 觀此則春秋時已重吳音矣不始于晉也

十三年傳爲一隧注隧道也 軍法司空治軍隧道義見淮南子

彌庸見姑蔑之旗 墨子旗識篇曰建旗其署令皆明知之

曰某子旗

十四年經齊陳恒執其君寘于舒州 史記齊世家云田常執簡公于徐州司馬貞曰徐字从人說文作𡗗並音舒續漢志云薛本國六國時曰徐州戰國策齊一篇曰楚威王戰勝于徐州高誘曰徐州或作舒州是時屬齊棟案徐舒古字通易困之九四曰來徐徐子夏傳作茶茶先鄭考工注云茶讀爲舒舒徐也茶本古舒字是徐與舒同說文𡗗讀若塗易釋文云茶音圖然則舒亦有塗音歟非也司馬

貞得之

傳諸御鞅

世本曰陳桓子產子豐豐產子獻獻產鞅司馬

貞曰鞅爲僕御之官故曰御鞅

子行舍於公宮

服虔曰止于公宮爲陳氏作內閒也

成子兄弟四欒如公 服虔曰成子兄弟八人二人共一欒

杜氏云成子之兄弟昭子莊簡子齒宣子夷穆子安廩邱

子意茲芒子盈惠子得凡八人二人共一欒司馬貞案世

本曰陳僖子乞產成子常簡子齒宣子其夷穆子安廩邱

子尙鑿

意與鑿通

茲子芒盈惠子得凡七人杜預又取昭子莊

以充八人之數案世本昭子將來是桓子之子成子之叔

父又不名莊強相證會言四欒有八人耳今案田完世家

田常兄弟四人如公宮與此事同今此惟稱四藥不言人數知四藥謂兄弟四人藥車而入非二人共車也然其昆弟三人不見者蓋時或不在不同入公宮不可強以四藥爲八人添叔父爲兄弟之數服杜殊失之

正義引世本云僖子生昭子莊

云云豈亦因杜注而附會之歟

太史子餘 子餘陳氏黨

侍人御之 服虔曰閹豎以兵御陳氏

何以見魯衛之士 服虔曰子方將欲奔魯衛也

公文氏攻之 王符曰衛之公族有公文氏

十五年傳寡君是以寒心 高誘戰國策注曰寒心懼也

二人蒙衣而藥 服虔曰蒙衣爲婦人之服巾蒙其頭而共



乘也

孔氏之老嫗寧問之 服虔曰家臣稱老問其姓名

遂入適伯姬氏 服虔曰入孔氏家適伯姬所居

孔伯姬杖戈而先 服虔曰先至孔悝所

遂劫以登臺 服虔曰於衛臺上召衛羣臣

使告季子 子路二十字也季子五十字

召獲駕乘車 服虔曰駕乘車不駕兵車也言無距父之意

也

行爵食炙 王充曰車行酒騎行炙案古人皆以車騎行酒

肉嘯堂集古錄載周叔邦父簠云叔邦父作簠用征用行用從君王又叔夜鼎云叔夜鬻其饋鼎以征以行用饋

用羹知古人有行爵食炙之事故西都賦云陳輕騎以行烹騰酒車而斟

酌馬融廣成頌云清醪車湊燔炙騎將行爵食炙而行示無懼也正義以爲此句顛倒辭氣不允蓋未通於古

奉衛侯輒來奔 服虔曰召獲奉衛侯

弗及不踐其難 賈逵曰言家臣憂不及國不得踐履其難鄭衆曰是時輒已出不及事不當踐其難子羔言不及以爲季路欲死難也

無入爲也 服虔曰言輒已出無爲復入

必或繼之 王肅曰必有繼續其後攻太子

十六年傳旻天不淑不懋遺一老俾屏余一人以在位 應劭曰懋且詞也言旻天不善於魯不且遺一老使羣蔽我一人也鄭元所引與此同今不淑作不弔懋作懋王肅曰

屏輔也

熒熒余在疚

鄭康成許叔重引此傳皆作嬖嬖

嗚呼哀哉尼父

鄭元曰尼父因目字以爲之諡孔氏駁之

案字諡見穀梁非康成臆說以字爲諡左傳有明文孔氏之駁未爲得也

使貳車反柝於西圃

魯語曰天子有虎賁習武訓也諸侯

有旅賁禦災害也大夫有貳車備承事也士有陪乘告奔走也許叔重五經異義曰或曰卿大夫有主不答曰卿大夫非有土之君不得祫享昭穆故無主古春秋左氏傳曰衛孔悝反柝於西圃柝石主也言大夫以石爲主謹案大夫以石爲主禮無明文大夫士無昭穆不得有主今山陽

民俗有石主元之聞也

以下鄭氏駁

少牢饋食大夫祭禮也束

帛依神特牲饋食士祭禮也結茅爲菑主者神象也孝子

既葬心無所依以虞而立主以事之唯天子諸侯有主卿

大夫無主尊卑之差也卿大夫無主者依神以几筵故少

牢之祭但有尸無主三王之代小祥以前主用桑者始死

尚質故不相變既練易之遂藏於廟以爲祭主孔悝祔主

者祭其所出之君爲之主耳

以上皆鄭氏說鄭志張逸問許氏異義駁衛孔悝之反祔

有主者何謂也答云禮大夫無主而孔獨有者或時未代之君賜之使祀其所出之君者諸侯不祀天而魯郊諸侯

不祖天子而鄭祖厲王皆時君之賜也

正義曰以爲孔氏姑姓仕於衛己歷

多世不知本出何國安得有所出公之主知是僭爲之此

說非也管子山至篇曰君人之主弟兄三世則昭穆同祖

十世則爲祔三世則同祀所出之公故不立至十世爲祔所以別于宗也案世本莊叔達至孔悝凡七世上歷三世當在春秋之前至孔叔時合爲祔王春秋以來兼國多矣未必皆書于經何得以所出之公無考而遂謂之僭耶鄭氏之言不爲無本若以舊章放失追議先儒恐違闕疑之

義昭十九年傳云懼隊宗主服虔云祔主藏于宗廟故曰宗主

市南有熊宜僚 高誘曰熊宜僚勇士居楚市南請以戰備獻 子惠子曰戰備猶家備備甲兵也

齊管修 風俗通曰管修自齊適楚爲陰大夫

高府 淮南子曰闔閭伐楚五戰入郢燒高府之粟蓋宮中府名

史記卷一百一十五  
三  
圍公陽 史記曰惠王從者屈固

其徒微之 說文曰微隱行也

十七年傳戎州 司馬貞曰陳留濟陽縣東南有戎城濟陽  
與衛相近故莊公登臺望見戎州又隱七年云戎伐凡伯  
于楚邱是戎近衛

鄒般 說文曰鄒宋地也讀若讒疑般采邑

十八年傳宋殺皇瑗 汲郡古文曰敬王四十三年宋殺其  
大夫皇瑗于丹水之上丹水雍不流

廿年傳吳公子慶忌 高誘曰慶忌吳王僚之子又淮南子  
注云吳王僚之弟子

史黯 高誘曰史黯史墨也

廿一年傳使我高蹈 呂覽曰子胥高蹶高誘曰蹶蹈也傳

曰魯人之高使我高蹈瞑怒兒

高與阜通見釋名

廿二年傳甬東 賈逵曰甬東越東鄙甬江東也

廿三年傳其可以稱旌繁乎 繁說文引作緜云馬髦飾也

廿五年傳褚師聲子鞮而登席注古者見君解鞮 東昌彭

氏輒以爲古無見君解鞮之禮棟案燕禮云賓反入及卿

大夫皆說屨升就席鄭志云凡燕坐必說屨屨不在堂也

蕭山毛氏牲以爲脫屨非解鞮也棟又案少儀云凡祭於

室中堂上無跣燕則有之鄭志云祭不跣者主敬也燕則

有跣爲歡也毛氏曰燕飲君但脫屨而臣必解鞮記曰燕

則有跣跣者解鞮也 閩百詩曰陳氏禮書謂漢魏以後

朝祭皆跣韞又謂梁天監問尙書奏議案禮跣韞事由燕坐今極恭之所莫不皆跣清廟崇嚴旣絕常禮凡有履行者應皆跣韞蓋是時有不跣韞者故議者及之杜氏謂見君解韞見君字不確須易爲古者燕飲解韞耳棟又案宣二年左傳云晉侯飲趙盾酒其右提彌明趨登曰臣侍君宴過三爵非禮也遂扶而下服虔本作遂跣以下注云趙盾徒跣而下走此本書燕飲解韞之明文也左傳古本盡爲杜預所改故學者每有疑義莫能詳焉

君將韞之 說文引作韞云歐兒从口韞聲玉篇同案釋文作韞與說文合與石經異釋文是也

君何所不逞欲 說文引云何所不逞云楚人謂疾行爲逞



廿六年傳后庸

唐石經作舌庸廿七年傳同

吳語亦作舌庸

掘褚師定子之墓

掘玉篇引作掘云掘也釋文云本或作

掘

戰國策禽滑厘古今人表作禽屈厘

公遊于空澤

酈元曰獲水東南逕空桐澤北澤在虞城東

南左傳公遊于空澤卽此然則空澤者空桐之澤也

今君無疾而死

汲冢古文瑣語曰初刑史子臣謂宋景公

曰從今以往五祀曰臣死後五年五月丁亥吳亡後五祀

八月辛巳君薨刑史子臣至死日朝見景公夕而死後吳

亡景公懼思刑史子臣之言將死日乃逃於瓜圃遂死焉

求得己蠱矣

使祝爲載書

周書詛祝作盟詛之載辭

廿七年傳設棄車兩馬服虔曰一曰兩飾

及留舒鄭康成引作柳舒孔氏曰留柳不同蓋所據書異

棟案裴松之三國志注云古劉留聊柳同用𠂔字以从聲

故也

肆歷志云留孰於𠂔

吾乃今知所以亡子惠子曰恨其語不審

惠定宇先生左傳補註六卷向在京師假閱未及錄乾隆壬辰冬歷城周書昌寄副至羊城乃戴東原先生手校本予覆校其半將歸潮陽以付順德胡生亦常刻之明年癸巳三月胡生書至云刻未竣而病久之始知其是月已死其冬予再至羊城屬順德張君錦芳歲其事而胡生不及見矣胡能詩古文精六書子辛卯分校鄉

試所得士會試報罷與東原同舟行月餘慕其學歸益  
鑽研經義豁然有心得而天弗假以年惜哉甲午二月  
益都李文藻記

左傳補註卷六終



左傳補注跋

惠氏左傳補注援據精確出顧亭林杜解補正上然有故爲立異者襄九年以出內火徐邈音內爲納是也古書如出納五音出納王命往往連文漢書引此傳作人或所見本不同史記引書多代字鐘鼎彝器文尤參錯不足據司燿季秋內火夏小正亦有九月內火之文鄭戴不聞改字而謂內爲古入字襄廿八年歲在星紀而淫于元枵注星紀在丑斗牛之次元枵在子虛危之次說本釋天正義引孫炎云星紀日月五星之所終始也凡紀秣必起于冬至爾時日在斗牛故謂丑爲星紀周而復始所謂日窮于次月窮于紀星回于天也月建從子左行日躔從丑右行月建在子則日躔在丑乃誤

會律秣志文而以星紀丑元楊子爲俗說昭元年風淫末疾  
注末四肢也樂記奮末廣賁之音作管子內業氣不通于四  
末素問繆刺論上下左右與經相干而布于四末注皆訓爲  
四支此集解所本而必據賈逵說訓爲首穀之飛亦爲蠱注  
穀久積則變爲飛蟲名曰蠱外傳蠱之慝穀之飛實生之言  
慝則爲蠱可知論衡商蟲穀蟲曰蠱蠱若蛾矣粟米饑熟生  
蠱此集解所本而必據釋器文訓爲康又有不顧文義者如  
請與君之士戲猶外傳請與之戲彼注戲角力也朱國禎說  
戲者兵也雖本說文而請與君之士兵不辭甚矣以更豕韋  
之後注更代也此與更僕未可數也姓利相更寡人請更義  
向史記作受因古更字作豕形相近而譌若改以受豕韋之

後文義晦矣至慧種生聖癡種生狂語出越絕而誤憶爲大  
戴禮因其所生賜之姓也若夏吞薏苡而生則姓苡氏商吞  
燕子而生則姓子氏周履大人跡則姓姬氏義本白虎通非  
文而誤憶爲王充案傳因生而賜姓堯典正義云因其所生  
之地而賜之以爲其姓卽集解所謂若舜由滌汭故陳爲媯  
姓也外傳云黃帝以姬水成炎帝以姜水成成而異德故黃  
帝爲姬炎帝爲姜其義甚明若薏苡爲苡之說則王仲任固  
斥之矣何煩更舉乎伏讀

四庫全書提要云其長在博其短亦在于嗜博其長在古其  
短亦在于泥古二語盡之貸園叢書傳本甚少昭文張氏刊  
板又燬于火因重校付梓并識所疑辛丑長夏錢熙祚識

卷之四

